

Itota Codito ingantedö ante Wäo nänö watapæ ante yewæmongainta

*Wængonguï nänö Angainö ante nê ëmongaingä
Waocä bagacäimpa*

¹ Wëenëñedë pönï Wængonguï nänö mä badöñedë Wængonguï nänö Angainö ante nê ëmongaingä iñömö do ingacäimpa. Tömengä Wængonguï weca quëwengacäimpa. Ayæ adocä adobai nê Wængonguï inongä ingacäimpa.

² Wëenëñedë pönï tōmancoo badönämaï iñedë mäningä do Wængonguï weca quëwengacäimpa.

³ Wængonguï angä ëñëninque adocä tōmancoo badongacäimpa. Tömengä wii badongä bai Wængonguï nänö badongaincoo tōmancoo edæ dæ ancædonimpa. ⁴ Mäningä iñömö mönö quëwenguinö entawengacäimpa. Ayæ mönö quëwenguinö edæ entawëninque tömengä waodäni beyæ nê ñäö bai inongä ingacäimpa. ⁵ Tömengä nê ñäö bai ingaingä inte mönö wëmö iñömö ta tamongä ate adoyömö ñäö bai bayonte edæ mönö wëmö iñömö edæ mänii ñäö ædö cæte mönæ ëmonguü.

⁶ Onguïñængä adocanque ingante Wængonguï da pōnongä pōningä ingampa. Tömengä ëmōwo, Wäo, ante pēmōnte ingacäimpa. ⁷ Tömengä iñömö Wængonguï nänö ñäö ëmōmāmo ante edonque pönï bacäimpa, ante nê ñäö bai ingaingä ingantedö ante apæñecæte ante pongacäimpa. Adocä

apænecä beyænque waodäni tömänäni tömengä nänö nē apænedongä ingante pönencädänimpa, ante pongacäimpa. ⁸ Incæte mäningä wii ñäö bai ingaingä ingampa. Wæætē tömengä, Wacä waodäni beyæ nē ñäö bai ingaingä ingampa, ante apænecæte ante pongacäimpa. ⁹ Nē nō ñäö bai nē ingaingä iñömö waodäni tömänäni inänite tömengä nänö ñäö emömämo pönoncæte ante inguipoga wææ pongacäimpa.

¹⁰ Tömengä inguipoga iñömö quëwengacäimpa. Ayæ tömengä inguipoga nē badongaingä iñongante inguipogaque quëwänäni wæætē Baa äninque tömengä ingante ædö cæte ate bai pönenguinänii. ¹¹ Tömengä edæ tömengä qui weca pongacäimpa. Pongä ate tömengä guiidänäni incæ tömengä ingante ænämaï ingadänimpa. ¹² Incæte tömengä ingante nē ængainäni iñömö tömengä emöwo, Codito, ante nē wede pönänäni iñönänite tömengä tömönäni inänite Ao äninque edæ, Wængongui wänäni bacädänimpa, ante pönö cægacäimpa. ¹³ Ayæ Wængongui wänäni iñömö wii waocä ëñate bai inänipa. Waocä, Botö wë manguinque, ante änämaï iñongante ëñadänipa. Wii nänöogængä angä beyænque inänipa. Wæætē Wængongui tömenganque cæcä ate tömönäni tömengä wänäni badänipa.

¹⁴ Tömengä iñömö edæ, Wængongui nänö Angainö, ante nē emongaingä äninque Waocä ëñate bagacäimpa. Waocä ëñate badinque tömengä mönö weca quëwengacäimpa. Mæmpo Wængongui Wengä adocanque inte adocä godömenque ñænængä inte nē cædongä ingä atamönipa. Adocä Mæmpo weca quëwente nē pongä iñömö

tömengä nanguï waadete pönö cædongä inte nöingä änongå ingampa. ¹⁵ Wäo iñömö, Mäningä æbänö ingää, ante apænegäimpa. “Mäningä botö nē apænedongä ingantedö ante iïmai apænetabopa. Botö täno pömo ïmopa. Tömengä nē ayæ Ponguingä iñömö godömenque ñænængä inte cædongä ingampa. Edæ botö eñadämai iñedē tömengä do ingacäimpa,” ante nanguï pöni yedæ äninque Wäo apænegacäimpa.

¹⁶ Mäningä nē ayæ Ponguingä iñömö nanguï pöni waadete pönö cædinque tömengä wæætē wæætē nänö entwänö ante pönongä æninque tomompa. ¹⁷ Edæ Wængonguï tömengä nänö wææ angainö ante apænegä eñëninque Möitee wodi wæætē adodö ante yewæmöninque waodäni inänite godongacäimpa. Wængonguï nänö waadete pönö cægainö ante nöingä nänö angainö ante guiquënë Itota Codito beyænque eñëmompa. Itota Codito iñömö mönö nē Ponguingä ingaingä ingampa. ¹⁸ Mönö waocabo tömämö incæ Wængonguï ingante cöwē adämai ïmopa. Incæte tömengä adocanque Wengä Wængonguï weca nē quëwënongå inte, Mæmpo æbänö ingaingä ingää, ante tömengä odömongä ate pönëmompa.

Wäo æpænē guidönongä, Botö wü Codito ïmopa, angä

(Mäateo 3.11-12; Mäadoco 1.7-8; Odoca 3.15-17)

¹⁹ Oodeoidi awënëidi Eedotadëe quëwënäni iñömö Wængonguï qui, ante nē godönäni tönö Debii wodi pæinäni inänite da godönäni Wäo weca godänipa. Gote pöninque adodäni, Æbidö inömi imii, ante apænebi eñëmönie, äñönäni Wäo iïmai

äninque ²⁰ nämä wææ änämaï inte wæætë, Botö wïi
Codito inömo imopa, ante edonque pöni angantapa.

—Botö wïi Codito inömo imopa.

²¹ Äñongante tömënäni wæætë tömengä ingante,

—Æbidö inömi imii, Ediya wodi inömi imii.

Apænebi ëñëmönie.

Ante änäni ëñëninque tömengä,

—Wabo imopa.

Ante äñongä tömënäni wæætë,

—Wængonguï beyæ në apænebi ayæ Ponguïmi
inömi imitawo.

Änäni ëñëninque tömengä,

—Wabo imopa.

Ante angantapa.

²² Tömënäni iinque äninque,

—Æbidö inömi imii, ante apænebi ëñëmönie
töö. Mönitö imönite në da pönöninäni weca
godinque mönitö tömënäni inänite, Æbidö imii,
ante ancæmönimpa. İinque bitö nämä incæ æbänö
ämii.

²³ Äñönäni Wäö wæætë tömënäni inänite, Itaiya
wodi në Wængonguï beyæ në apænecä nänö an-
gainö bai ante iïmaï ante apænebo ëñencæminimpa.

—Önömæca incæ në aa pebo inömo inte botö
tömëmo pepämo iïmaï nani ëñënö impa. “Awënë
nänö ponguïnö ante töinö pïnonte bai tee möedäni,”
ante aa pebopa, angantapa.

²⁴ Paditeoidi në wadö tedete wadö cædäni nani
cabo inönäni inte tömënäni pancadäniya inänite da
godönäni Wäö weca në godänipa. ²⁵ Gote pöninque
mäninäni guiquënë,

—Bitö wïi Codito inömi inte wïi Ediya wodi inömi
inte ayæ wïi Wængonguï beyæ në apænebi ayæ

Ponguimi inömi imipa. Bitö ædö cæte waodäni inänite æpænē guidömi imii.

²⁶ Ante äñönäni Wäo wæætē,

—Botö önonque æpænē guidönömo imopa. Wæætē mīnitö weca adocanque a ongongä iñongante, Tömengä æcänö ingää, ante mīnitö eñenāmaï iminipa. ²⁷ Botö täno pömo imopa. Tömengä nē ayæ Ponguingä ingampa. Botö önonque wædænque cæbo inte ædö cæte tömengä awæncata incæ ñi cæte cæbo imoo.

²⁸ Betänia nāni quëwëñömö Oododänö æmæmäa Wäo æpænē nänö guidöñömö mänömaï bagatimpa.

Itota Wængonguï Codotedo

²⁹ Baänæ ate Itota bee tente pongä adinque Wäo apænecantapa. “Aedäni, iingä Wængonguï da pönongä pöningä ingampa. Ayæ tömengä waodäni inguipoga quëwënäni nāni wënæ wënæ cægäinö ante æninque teëmë mongænte wænguingä ingampa, ante Wængonguï tömengä ingante, Codotedo, ante pönö pemongacäimpa.

³⁰ Mäningä iñömö botö nē apænedongä iñongante botö iïmaï apænetabopa. ‘Botö täno pömo imopa. Onguïñængä nē ayæ Ponguingä iñömö godömenque ñænængä inte cædongä ingampa. Edæ botö eñadāmaï iñedé tömengä do ingacäimpa.’

³¹ Botö incæ adobaï, Tömengä æcänö ingää, ante eñenāmaï intabopa. Mönö idægocabo iñömonte, Mīnitö tömengä ingante eñencæmīnimpä, ante botö æpænē guidöninque pömo intabopa.”

³² Ayæ Wäo, Tömengä ingampa, ante äninque, “Botö æmö ayömete Wængonguï Önöwoca incæ

öönædē owote equemö bai wææ tömengäa næ gongængä atabopa. ³³ Wængonguï, Waodäni inänite æpænē guidöe, ante botö imote nē da pönöningä wii botö imo angä bai botö, Itota æcänö ingää, ante eññämäimo incædömoimpa. Incæte tömengä botö imote iïmai angantapa. ‘Wængonguï Önöwoca incæ æcänö onguïñængäa wææ næ gongængä ayömi mäningä iñömö nē æpænē guidönäni bai Wængonguï Tæiyæ Waëmö Önöwoca ingante da pönongä waodäni mimönoque pö guiquingä, ante cæcä ingampa.’ ³⁴ Mäninö botö adinö impa. Mänömai beyæ iïmai ämopa, Mäningä iñömö Wængonguï Wengä inongä ingampa,” ante Wäö apænegacäimpa.

Itota miñæ nē täno godäni

³⁵ Baänæ ate Wäö tönö tömengä emiñæna mänaa adoyömö ongöñönäni ³⁶ Itota wodo tebæ cægongä adinque Wäö angantapa.

—Aeda, tömengä iñömö Wængonguï Codotedo inongä ingampa.

³⁷ Mäninö angä eññenique Wäö nänö nē emiñæna inäna incæ Itota ingante tee empo godaimpa.

³⁸ Itota dadi emænte ayongä tee empo pöna adinque angantapa.

—Quinante pömiinaa.

Ante äñongä tömëna wæætë,

—Mäetodo, æyömönö owobi. Apænebi eññëmönae.

Änatapa. Mänine, Mäetodo, ante mönö tededö, Nē Odömongä, ante impa.

³⁹ Äna eññenique tömengä,

—Ægodöeda go aeda.

Äñongä tömengä miñæ godatapa. Goyöna ædæ wææicá intapa. Ayæ nänö owocönë gote adinque tömëna adoönæ tömengä weca a ongönapa.

⁴⁰ Wäo nänö äñinö eñëinque Itota ingante tee empo goda mënaa iñönte adocanque Æntade iñömö Timönö Pegodo tönñacä ingantapa.

⁴¹ Tömengä nänö tönñacä Timönö ingante ancæte ante diqui diqui minte gote adinque angantapa.

—Mëetiya mönö äñongä ingante atamönapa, angantapa. Tömengä iñömö Wængongui nänö në Pönongaingä Codito inongä ingampa.

⁴² Ayæ Timönö ingante Itota weca ænte mämongä pongä adinque Itota angampa.

—Bitö Wäo wë Timönömi imi abopa. Botö wæætë, Bitö tæimö dicabo bai imipa, ante bitö imite mönö tededö, Quepata, pönö pemömopa. Önonque adowo emöwo incæ guidiego tededö, Pegodo, äñanipa.

Pedipe tönö Näatänaedo inate Itota angä tee empo goda

⁴³ Baänæ ate Itota, Gadideabæ ante gocæboimpa, ante pönengäimpa. Pedipe ingante adinque Itota tömengä ingante,

—Botö miñæ pöe, ämo, angacäimpa.

⁴⁴ Pedipe iñömö Æntade tönö Pegodo bai Betaida nana quëwëñömö adoyömö quëwëningä inongäimpa. ⁴⁵ Pedipe Näatänaedo weca gocä adinque tömengä ingante iimañ äñinque,

—Wængongui nänö wææ angainö ante yewæmöninque Möitee wodi nänö në yewæmongaingä ingante mönitö atamönipa. Wængongui beyæ në apænegainäni adobai

mänigä ingantedö ante yewæmongadänimpa.
Tömengä iñömö Itota Näatadeta quëwëñongä inte
Ootee wengä ingampa, ante angantapa.

⁴⁶ Ante añongä Näatänaedo wæætë,

—Näatadeta quëwëñömö adocanque waa
quëwente pongä, ante mönitö dicæ ëñëmöniyaa.

Angä ëñëninque Pedipe iñömö,

—Pö ae, angantapa.

⁴⁷ Itota ayongä Näatänaedo pongä adinque
tömengä,

—İngä iñömö näwä idægocä inongä inte tömengä
në nö entawëñongä inte babæ cädämaï inongä
ingampa, ämopa.

⁴⁸ Angä ëñëninque Näatänaedo,

—Æbänö imoo, ante bitö æbänö cæte do ëñëmii,

Ante añongä Itota wæætë tömengä ingante,

—Pedipe iñömö bitö imite ayæ aa pedämaï iñedë
bitö iigowæncawa tæ contabi iñömite botö bitö
imite do atabopa, angacäimpa.

⁴⁹ Ayæ Näatänaedo,

—Awënë në Odömömi imi, bitö Wængongui Wëmi
inömi imipa. Idægoidi mönö cabo iñömönte bitö
mönitö Awënë Odeyebi inömi imipa, ämopa.

⁵⁰ Añongä Itota wæætë,

—Bitö iigowæncawa tæ contabi iñömite botö
bitö imite atabopa, ämo beyænque pönëmi imipa.
Mäninö ante adinque bitö godömenque botö
bamönengæ cæbo acæbiimpa, ämopa.

⁵¹ Tömengä godömenque angantapa.

—Bitö imite näwangä ämopa. Öönädë wi ænete
bayö Wængongui anquedoidi Waocä ëñagaingä
weca wæëninque æiyönäni bitö acæbiimpa.

2

Cānaa quēwēñōmō nāni monguimæno cæte bedāni

¹ Mēōnaa go adoönæque iñonte Cānaa quēwēñōmō Gadideabæ iñōmō monguimæno ante bedānipa. Itota wäänā adoyōmō ponte ongongacāimpa.

² Itota tōmengä emiñænāni tōnō tōmēnāni inānite adobai, Monguimæno mini bequinque, ante tē tē wente ænte pongadānimpa. ³ Ayæ yowepæ wædænque ti nāmæ biinōmæ nāni amæ dæ bedāni adinque Itota wäänā tōmengä Wengä ingante,

—Tōmēnāni biinōmæ dæ amæmpa.

⁴ Añongä Itota wæætē,

—Badä eñemi. Botō cæquēnēnō tōmēmoque cæquino impa. Botō cæyedē wii eyepæ impa, amopa.

⁵ Tōmengä wäänā iñōmō nē cædāni inānite,

—Minitō iminite æbānō angä eñente cædāni, angantapa.

⁶ Ayæ onompo æmæmpoque go adocadeque æpæcade dica inte badöincade iñōmō cō cædāni ongoncadepa. Wængongui weca guicæte ante waēmō bacæmōimpa, ante äate cædānipa, ante oodeoidi nāni äagaincade incadepa. İncade pancacadea otenta ditodo næ ongoncadepa. Ayæ pancacadea tiēē ditodo næ ongoncadepa. ⁷ Nē cædāni inānite Itota,

—Æpæcadcoco iñōmō æpæ eyede pōni pe ñiñædāni.

Angä eñēninqe pe ñiñængadānimpa. ⁸ Ayæ tōmēnāni inānite,

—Owæta ænte wædænque mā iyænte monguimæno ante nē cædongä ingante godōmini æncæcāimpa, amopa.

Angä eñëninque mänömaï cægadänimpa. ⁹ Ayæ monguïmæno ante nê cædongä æpæ inïmæ incæ biinömæ badimæ æninque, Æbänö imæ, ante bedinque tömengä, Itota nänö badönimæ impa, ante eñënämaï inongäimpa. Nê cædönäni Itota weca æpæ pe ñiñænänique eñënönänimpa. Ayæ monguïmæno ante nê cædongä iñömö nê monguingä ingante, Nänënë pöe, aa pecä pongä ate, ¹⁰ iïmaï angantapa.

—Wadäni tömänäni waimæ biinömæ täno godönäni bedänipa. Ayæ ate ææmæ becæ pönäni tömo pönï bedäni adinque tömënäni biinömæ wædænque godonte näni ænimæ wæætë godönäni bedänipa. Bitö guiquënë ñöwoyedë waimæ biinömæ bitö nänënë concædimæ ænte pömipa.

¹¹ Itota, Acædänimpa, ante mänömaï cædinque tömengä Cänaa quëwëñömö Gadideabæ iñömö mänii mä nänö bamönengæ cægacäimpa. Mänii tæi piñænte bamönengæ cæcä adinque waodäni, Tömengä waëmö pönï inte cæcampa, ante edonque agadänimpa. Ayæ tömengä ëmiñænäni iñömö tömengä ingante godömenque wede pönänäni bagadänimpa.

¹² Ayæ ate Capënaömö quëwëñömö Itota tömengä wäänä tönö tömengä biwiïdi tönö tömengä ëmiñænäni tönö wææ gogadänimpa. Mäniñömö godinque wædænque ëönæ quëwengadänimpa.

Wængonguï oncö tæiyæ waëmö baccëimpa, ante cæcä

(Mäateo 21.12-13; Mäadoco 11.15-18; Odoca 19.45-46)

¹³ Wodo pänta gogaïönæ, ante oodeoidi Patowa näni ææmæ cænguiönæ oo pönï bayedë Itota

Eedotadëe iñömö æigacäimpa. ¹⁴ Tömengä iñömö Wængongui oncö ñænæncönë yabæcönë pö guiidinque ayongä wagadaidi obegaidi tönö equemöidi inänite godonte æncæte ante në mänäni inänite acantapa. Ayæ wadäni campio næænte në godonte ænönäni iñömö näni godonte æimpaa tæ contayönänite tömengä acantapa. ¹⁵ Yæguincamë ñænæmömo nää wënëninque que cæte ate æninque tömengä Wængongui oncö ñænæncönë yabæcönë në ongönäni inänite tatodongä tao godänitapa. Adobaï obegaidi tönö wagadaidi inänite, Tao gobæwedäni, angä tao godänitapa. Ayæ campio næænte në godonte ænönäni tömënäni tigitamö æninque tömengä wido cæcä gueogæ gotimpa. Ayæ adodäni näni æimpaa bæ tacä guidömëmæ go wææntapa. ¹⁶ Ayæ equemöidi godonte æncæte ante në mänäni inänite Itota,

—Minitö equemöidi ænte tao gobæwedäni. Botö Mæmpo oncönë incæ minitö ædö cæte, Mönö godonte æiñömö bai impa, ante cæminitapa töö, angacäimpa.

¹⁷ Mäninö angä eñëninque tömengä emiñænäni Awënë Dabii nänö yewæmongainö ante iïmaï ante pönente wædänipa. “Bitö oncö ante woadäni waa acædänimpa, ante cæcæboimpa, ante botö nanguï cæinente wængui wæ,” ante yewæmongatimpa.

¹⁸ Ayæ oodeoidi awënëidi pancadäniya tömengä ingante,

—Bitö mänii tömää awënë bai cæbi incæ æbänö bitö bamönengæ cæte odömömi adinque mönitö, Mäningä në angä ingampa, ante eñencæmönimpa, ämönipa.

¹⁹ Äñönäni Itota wæætë tömënäni inänite,

—Wængonguï tæiyæ waëmö oncö incæ mīnitö iincö bæ tate ewēmīni īnīnque botö mēönaa go adoönæque iñö mīincö mænoncæboimpa, ämopa.

²⁰ Angä eñēnīnque oodeoidi awēnēidi pancadāniya,

—Wængonguï tæiyæ waëmö oncö coadenta ī tei wadepo ganca mænongadānimpa. Bitö iñömö ædö cæte, Botö mēönaa go adoönæque iñö mīincö mænoncæboimpa, ämii, ānānitapa.

²¹ Itota iñömö nāmā baö incæ ante, Wængonguï tæiyæ waëmö oncö bai impa, ante apæncä īnongäimpa. ²² Tömengä īncayæ wængä ate Wængonguï, Ñāni ömæmōe, angä ñāni ömæmongä ate, Æbānö angacāi, ante tömengä emiñænāni pönēnānitapa. Ayæ, Wængonguï angä eñente nāni yewæmongainö nö impa, ante pönēnāni inte ayæ Itota tömēnāni inānite nānö ānīnö ante adobai pönengadānimpa.

Itota, Mönö waocabo æbānö imö, ante eñengampa

²³ Patowa nāni ææmæ cæyedē Itota Eedotadēe iñömö ponte quēwēnīnque, Acædānimpa, ante bamönengæ nanguï cæcä adīnque waodāni tæiyænāni iñömö, Māningä mönö Codito ingampa, ante pönengadānimpa. ²⁴ Itota edæ, Waodāni tömānāni æbānö entawēnāni ināni, ante do eñēnongä inte tömengä, Wabānö pönēnāni, ante tömēnāni inānite gomö adongä ingantapa. ²⁵ Edæ tömengä waodāni nāni entawēnö ante do eñēnongä ingantapa. īnīnque waocä iñömö, Waodāni æbānö cædāni, ante apæncæcäimpa, ante Itota tömengä

ingante, Bitö botö imo adodö ancæbiimpa, ante änämaï ingacäimpa.

3

Itota tönö Nicodemö

¹ Paditeocä adocanque tömengä emöwo Nicodemö tömengä iñömö oodeoidi awënëidi tönö nē godongämæ cæcä ingacäimpa. ² Adocä woyowotæ Itota weca pöningue,

—Awënë nē Odömömi eñëmi. Wængonguï, Odömoncæbiimpa, ante bitö imite da pöngä pönimi imipa, do eñëmönipa. Edæ Wængonguï waocä tönö godongämæ cädämaï ingä inique mäningä ædö cæte bitö bai bamönengæ cæcä aquimöni.

³ Angä eñëningue Itota wæætë,

—Bitö imite näwangä ämopa. Nē mempoga eñadinganque Wængonguï Awënë Odeye nempo guite aquingä ingampa.

⁴ Äñongä Nicodemö,

—Waocä picængä ba ate ædö cæte mempoga eñaquingä. Tömengä nänö wäänä cæcadë ædö cæte mempoga guï ædinqe eñaquingä.

⁵ Angä eñëningue Itota angantapa.

—Bitö imite näwangä ämopa. Waocä æpænë guidengä iñongante Wængonguï Önöwoca cæcä beyænque mempoga eñadinganque Wængonguï Awënë Odeye nempo guite quëwengingä ingampa. ⁶ Baonga beyænque nē eñadäni iñömö edæ baonque eñate quëwänänipa. Wæætë Wængonguï Önöwoca cæcä beyænque nē eñadäni iñömö Wængonguï Önöwoca ingante ewocate

quëwënänipa. ⁷ Botö, Bitö mempoga ëñaquënëmi ìmipa, ante botö änö ëñëninque, Æbämë impa, ante änämaï incæbiimpa. ⁸ Woboyæ nänö cægai bai wayömö wayömö pæmænte gopa. Woboyæ nänö pæmæmämo ëñëmö incæ, Ædonö pæmænte pö, ædonö pæmænte go, ante ëñënämaï ìmompä. Wængonguï Önöwoca cæcä beyænque në ëñädäni tömänäni ìnänite tömengä æbänö cæcää, ante adobai ëñënämaï ìmompä, ämopa, ante Itota apænecantapa.

⁹ Apænecä ëñëninque Niicodemö,
—Æbänö inguüi.

¹⁰ Äñongä Itota wæætë,
—Idægoidi ìnänite në odömömi ìmi incæte mäninö ante ædö cæte ëñënämaï ìmii. ¹¹ Bitö ìmite näwangä ämopa. Mönitö quïëmë ante ëñënimöni inte mäninö ante apænemönipa. Mönitö quïëmë ante adimöni ìninque, Mänömaï ìmpa, ante apænemönipa. Minitö guiquënë möni änö ante apænemöni ëñëninque ayæ Baa ämïni inte pönënämaï ìminipa. ¹² Botö minitö ìminite, Inguipoga quëwënäni weca æbänö ì, ante apænedimo ìmo incæte minitö ëñënämaï ìminipa. Ìninque Wængonguï cæcä beyænque öönädë mïni quëwenguinö ante æbänö ì, ante apænebo bai ædö cæte pönenguimïni, ante apænecantapa.

¹³ Ayæ apænedinque, “Woadäni tömänäni öönädë æidämaï ingadänimpa. Waobo në ëñagaïmo inte öönädë quëwente në wææ pömo ìñömö botö adoboque öönädë æibo ìmopa. ¹⁴ Möitee wodi önomæca tæntæ nani badöninto æninque awäa ñä cædinque gö cæcä a ongongatimpa.

Waobo eñagaïmo ïmote adobaï awäa timpodique tiwadinque gö cædäni wægonguënëmo ïmopa. ¹⁵ Mänömaï botö ïmote cædäni adinque botö ïmote nê wede pönënaï ïñömö tömänäni cöwë wænämaï quëwencædänimpa,” ante Itota apænegacäimpa.

Wægonguï nänö waadete pönëno

¹⁶ “Edæ Wægonguï incæ inguipoga quëwënäni ïnänite nê waadete pönengä inte tömengä Wengä adocanque onguïñengä ïñongante pönongä pongacäimpa. ïninqe æcänö tömengä ingante nê wede pönëna ïñömö tömengä wë womönämaï inte cöwë wænämaï quëwencæcäimpa. ¹⁷ Edæ Wægonguï incæ tömengä Wengä ingante inguipoga ïñömö da pönongä pongacäimpa. Incæte, Inguipoga quëwënäni nänï pante wæquinque, ante apænte ancæte ante wïï pongacäimpa. Wæætë inguipoga quëwënäni ïnänite tömengä ængä beyænque quëwencædänimpa, ante tömengä ingante da pönongä pongacäimpa.”

¹⁸ “Æcänö tömengä ingante nê wede pönëna ïñömö Wægonguï tömengä ingante, Bitö pante wæquinque cæbipa, ante apænte änämaï incæcäimpa. Æcänö guiquënë wede pönënaï ïna ïñömö Wægonguï tömengä ingante, Botö Wengä adocanque ïñongante bitö tömengä ëmowo ante pönënaï ïnömi inte wæcæbiimpa, ante do apænte angä ingampa. ¹⁹ Wægonguï nänö apænte änö ïñömö ïmaï impa. Nê ñäö baï ïnongä ïñömö, Wægonguï æbänö ingää, ante inguipoga ïñömö ancæte ante pongacäimpa. Incæte waodäni tömënäni nänï cædimämo wënæ wënæ i beyænque wëmö ïñömö ante waadete pönënaï ïnänipa.

Wæætē nē ñäö bai ïnongä ingante waadedämaï inänipa. ²⁰ Nē wēnæ wēnæ cædönäni inte ñäö ïñömö ante pīinque Baa äninque, Mönö cædinö edonque pönï badämaï ingæimpa, ante ñäö ïñömö pönämaï inänipa. ²¹ Waodäni Wængonguï näwangä nänö ämaï nē cædönäni guiquënë, Mönö cædinö ante Wængonguï mönö tönö godongämæ cæcä beyænque cætamompa, ante edonque pönï acædänimpa, ante cædinque ñäö ïñömö pöninque cædänipa.”

Wäö nē guidönongä Itota ingantedö ante apænecä

²² Ayæ ate Itota tömengä emiñænäni tönö Oodeabæ wædænque näni quëwēñömö godänitapa. Gote pöninque mäniñömö tömēnāni tönö wædænque quëwēninque Itota angä beyænque tömēnāni waodäni inänite æpænē guidönäni guiigadänimpa. ²³ Ënöö quëwēñömö æpæ nangui mä adinque Wäö mäniñömö guidongä guiigadänimpa. Ayæ waodäni, Wäö mönitö imönite æpænē guidonguingä, ante cöwē tömengä weca pönäni inänite guidongä guiidänimpa. Ënöö quëwēñömö Tadii quëwēñömö eyequei inimpa. ²⁴ Mäniñedē Wäö ingante ayæ tee mönedämaï ingadänimpa.

²⁵ Wäö emiñænäni pancadäniya oodeocä adocanque tönö apænedinque, Mönö oodeocabo æbänö cæte Wængonguï weca guicæte ante waëmö bacæmöimpa, ante tömēnāni nāni pönēnö ante guëadö guëa ante tedewänäni. ²⁶ Adodäni Wäö weca ponte apænedinque,

—Nē odömömi ēñēmi. Oododänö æmæmāa bitō weca nē pōningā ingantedō ante bitō, Māningā ingampa, ante apænebitawo. Edæ māningā onguĩñængä iñömö adobaĩ æpænē guidongä guidānipa tōö. Waodāni tōmänāni tōmengä weca godānipa, ante wädānitapa.

²⁷ Ante wädāni ēñēninque Wäö,

—Wængonguĩ öönædē quēwēnongä pönö angä æninque waocä mänömaĩ beyæ cæcampa. ²⁸ Botō wii Codito inömo imopa. Iñæmpa Wængonguĩ botō imote täno da pōnongä pönimo imopa. Tōmengä ayæ Ponguingä, ante apænetabopa. Mänömainö ante apænebo ēñēnimini inte mīnitō tōmēmīni mäninö ante nē apænequēnēmīni imīnipa. ²⁹ Monguingä iñömö mongä ate tōmengä onquiyængä nänöogængä bacampa. Tōmengä guidengä iñömö nē monguingä ante wänö cōninque ēñēñongä monguingä apænecä ēñēninque, Monguingä apænecä ēñēmopa, ante watapæ tocampa. Botō adobaĩ Codito apænecä ēñēmopa, ante māningä bai nanguĩ watapæ tobo imopa. ³⁰ Tōmengä iñömö godömenque ñænængä inte cædongä baquēnengä ingampa. Botō guiquēnē pönömenque wädāmo inte cædōmo baquēnēmo imopa, ante Wäö apænegacäimpa.

Öönædē nē quēwente wææ pongä

³¹ Ayæ Wäö godömenque apænecantapa. Öönædē nē quēwente wææ pongä iñömö tōmengä iñömö wii wadāni bai wädangä inte wæætē ñænængä inte cædongä ingampa. Öönædē nē quēwente wææ pongä iñömö tōmengä godömenque ñænængä inte cædongä ingampa. Inguipoga

iñömö nē ēñacā guiquēnē waodāni bai quēwēnongā inte inguipogaque ante apænecampa. ³² Tömengā Wængonguī weca quiēmē adingā inte quiēmē ēñēningā inte mäninö ante apænecā ēñēningue wadāni wæætē, Nāwangā impa, ante änāmaī inānipa töö. ³³ Mäninö ante nē Ao angā guiquēnē tömengā, Wængonguī nāwangā angā ingampa, ante edonque pōnī angā inongā ingampa. ³⁴ Edæ Wængonguī nānō da pönöningā iñömö Wængonguī nānō änō ante apænecampa. Tömengā ingante Wængonguī iñömö tömengā Önöwoca ingante godongā æninqe tömengā ædæmō ewocate quēwengampa. ³⁵ Mæmpo Wængonguī iñömö tömengā Wengā ingante nē waadete pönengā ingampa. Wængonguī tömengā ingante, Bitō nempo quinö inincoo tömancoo pönömo æninqe bitō awēnē bacæbiimpa, ante pönö cægacäimpa. ³⁶ Æcänö Wængonguī Wengā ingante nē wede pönēna iñömö tömengā cōwē wænāmaī quēwencæcäimpa. Æcänö Wængonguī Wengā ingante nē Baa ante pönēnāmaī ina guiquēnē tömengā wīī cōwē wænāmaī quēwencæcäimpa. Edæ Wængonguī tömengā ingante ænguī nānō panguimāmo cōwē cædongā ingampa, ante Wäo māniñedē iinqe apænegacäimpa.

4

Itota Tämadiabæ onquiyængā ingante apænecā

¹ Paditeoidi inānite iīmaī ante tededāni ēñēnānitapa. Itota pönö cædinque æpænē guidongā guidinque tömengā nānō emiñænāni iñömö wīī Wäo emiñænāni bai wædænque badāni inte nanguī

ināni badānīpa, ante tededānitapa. ² Mānōmaī ānāni incæte wīi Itota nē guidongā inongāimpa. Wæætē tōmengā ēmiñænāni waodāni inānite guidōnāni guigadānimpa. ³ Mānīnō ante Paditeoidi do ēñēnānīpa, ante ānāni ēñēnīnque Awēnē Itota Oodeabæ quēwēnīnque wadæ go Gadideabæ iñōmō ocæ ēmænte gogacāimpa.

⁴ Gadideabæ taadō Tāmadiabæ iñōmō tæcæguedē inō godō tōmengā goquēnengā inongāimpa. ⁵ Tāmadiabæ iñōmō godīnque tōmengā Ticada nāni añōmō pongantapa. Mānīi Ticada quēwēñōmō eyequeī docā Aacobo wodi tōmengā wengā Ootee wodi ingante, Pancabaa bitō omæ baquiñōmō, ante tōmengā ingante nānō godongaīmæ inimpa.

⁶ Ayæ æpāamōnicæ Aacobo wodi nānō ææ wogaīmōnicæ adoyōmō inimpa. Itota taadō gobæ inō godīnque nangæ badīnque æpāamōnicæ iñōmō pō tæ contayongā māniñedē tæcæ bæcā bagatimpa. ⁷ Tæ contate ongōñongā Tāmadiabæ quēwengā onquiyængā æpæ iyænte tadonte æncæte ante pongā adīnque Itota tōmengā ingante,

—Æpæ pōnōmi beboe, angantapa. ⁸ Edæ tōmengā miñæ nē godāni mānīnāni quēwēñōmō cængui godonte æncæ godāni inōnānimpa.

⁹ Tāmadiaidi inānite oodeoidi cōwē gomō adāni inānīpa, ante ēñengā inte Tāmadiabæ quēwengā onquiyængā iñōmō Itota ingante,

—Bitō oodeobi imi incæte botō Tāmadiabæ quēwēmo iñōmote bitō ædō cæte botō imote, Æpæ pōnōmi beboe, āmīi, āmopa.

¹⁰ Añongā Itota wæætē,

—Bitō, Wængongui quīnō nānō pōnōni i, ante ēñente bai ayæ, Æbodō inōmo inte bitō imite,

Æpæ pönömi beboe, ante apæneboo, ante eñente bai bitö wæætë botö imote, Æpæ pönömi beboe, ancædömiimpa. Ayæ botö bitö imite æpæ quëwenguimæ pönömo becædömiimpa, ämopa.

¹¹ Angä eñëninque onquiyängä,

—Awënë, bitö æpæ mä iyæncade dæ ampa. Ayæ æpäamönicæ guibæ impa. Mänimæ æpæ quëwenguimæ bitö në apænedimæ ædönö mä iyænte ænguimii. ¹² Mönö docä mäempo Aacobo wodi iñömö, Botö æmæwo wæmo adinque botö æpäamönicæ mïnitö qui bacæimpa, ante iimönicæ mönö imonte godongacäimpa. Tömengä adomönicæ æpæ begacäimpa. Tömengä wënäni tönö tömengä cæningäidi adobai adopæ begadänimpa. Adocä mönö docä wædangä iñongante bitö godömenque ñænæmi inte në cædömi imitawogaa, ämopa.

¹³ Añongä Itota wæætë,

—Æcämenque iñömö mänimæ bedinque wæætë gæwænte bacæcäimpa. ¹⁴ Æcämenque botö godonguimæ në becä guiquënë tömengä gæwænämäi cöwë quëwencæcäimpa. Wæætë botö tömengä ingante tömëmo godonguimæ godömo bedinque tömengä botö quëwënö entawente quëwencæcäimpa. Æpäamönicæ cöwë cægö bai botö tömengä mïmöno godonguimæ beyænque tömengä wænämäi nänö quëwenguinö do æninque quëwencæcäimpa, ämopa.

¹⁵ Onquiyängä tömengä ingante,

—Awënë, äninque, Botö gæwænämäi bacæboimpa, ante mänimæ botö imote pönömi beboe, ämopa. Ayæ mäniñömö cöwë æpæ iyæncæ pönämäi incæboimpa.

16 Ante añongä tömengä wæætë,
 —Goe, bitö nänöogængä ingante aa pedinque
 ænte mämömi pongäe, angantapa.

17 Añongä tömengä wæætë,
 —Botö nänöogængä dæ ampa.
 Angä eñëninque Itota tömengä ingante,
 —Bitö, Botö nänöogængä dæ angampa, äninque
 nö ante ämipa. 18 Iñæmpa bitö nänöogæidi önompo
 æmæmpoque iñönänite bitö tömënäni inänite
 mönimi imipa töö. Ayæ ñöwoyedë onguïñængä
 bitö weca nē quëwengä iñömö wii bitö näwä
 nänöogængä ingampa. İninque ñöwo bitö änö
 iñömö edæ näwangä impa, ämopa.

19 Angä eñëninque onquiyængä,
 —Awënë, Bitö Wængonguï beyæ nē apænebi imi
 adinque eñëmopa. 20 Mönitö dodäni mæmpoidi
 wodi, İi onquiyabo inö gote Wængonguï ingante,
 Bitö Awënë Wængonguï imidö anguënë, ante
 ædæ wææninque angadänimpa. Minitö nē
 oodeoidi imini guiquënë, Wængonguï ingante
 waa ate apæ necæte ante Eedotadëë quëwëñömö
 mänïñömonque godinque ædæ wæænte
 apæ necæimpa, äminipa töö.

21 Añongä Itota wæætë,
 —Onquiyæmi eñëmi. Botö änö eñëninque pönëe.
 Minitö iñömö ædæ wææninque botö Mæmpo
 ingante, Bitö Awënë Wængonguï imidö anguënë,
 ante İi onquiyabo inö incæ Eedotadëë mänïñömö
 incæ minitö mäninö ante änämaï anguiönæ oo pönï
 impa. 22 Minitö tãmadiadi iñömö nē Wængonguï
 ingante, Bitö Awënë Wængonguï imidö anguënë,
 ante ædæ wææninque apænemini incæte adocä

ingante, Æbänö ingää, ante eññämaï iminipa töö. Mönitö guiquënë nē ædæ wææninque Wængonguï ingante waa ate apænemöni inte adocä, Æbänö ingää, ante do eññemöni imönipa. Edæ, Nē wënæ wënæ cædäni wæncæ cædinäni incæ quëwencædänimpa, ante nē Ængä iññömö oodeocä inongä ingä apa änewëë. ²³ Botö Mæmpo ingante, Bitö Awënë Wængonguï imidö anguënë, ante ædæ wææninque näwangä ante apænedönäni inte apænecædänimpa. Adodäni, Näwangä impa, ante nö pönente ëwocadäni inte ædæ wææninque Wængonguï ingante mäninö ante watapæ apænecædänimpa. Mäninö ante näni apænequïönæ iññömö edæ oo pönï impa. Edæ do iinque batimpa. Wængonguï, Mänömaï entawente nö pönänäni baï inäni inänite diqui diqui mininque, Mäninäni que botö imote, Bitö Awënë Wængonguï imidö anguënë, ante ædæ wææninque watapæ apænecædänimpa, angampa. ²⁴ Wængonguï Önöwocaque ëwocate quëwengä ingampa. Iinque nē ædæ wæænte tömengä ingante watapæ apænedäni iññömö tömönäni, Näwangä impa, ante nö pönente ëwocadäni inte ædæ wææninque tömengä ingante watapæ apænequënenäni inänipa, ämopa.

²⁵ Angä eññeninque onquiyängä,

—Botö, Mëetiya näni Codito änonngä poncæcäimpa, ante do eññëmopa. Tömengä pongä ate, Æbänö inguï, ante mönö imonte tömänö odömonte apænecä eññencæmönimpa.

²⁶ Äñongä Itota wæætë,

—Botö nē apænebo iññömö Codito inömo imo apa cæbii, ämopa.

27 Tæcæ apæneyongante tömengä miñæ nē godäni ocæ emænte ponte ayönäni tömengä iñömö onquiyængä ingante apænecä adinque, Æbänö cæ wæmönii, ante guiñente wädänitapa. Incæte, Æbänö ämii, ante, Quinante tömengä ingante tedebii, ante adocanque incæ änämaï ingantapa.

28 Ayæ onquiyængä tömengä iyæncade emö cæte nāni quēwēñömö ocæ emænte gote pöningue waodäni inänite apænedinque,

29 —Ægodöedäni, onguiñængä iñömö botö imote tæcæ adinque, Botö æbänö cæboo, ante tömänö ante botö imo nē apænecä ingante pö aedäni. Mäningä wabänö mönö Codito inongä ingantawo, ante ämopa.

30 Angä eñëninque tömënäni nāni quēwēñömö tao godinque tömengä weca gogadänimpa.

31 Onquiyængä nāni quēwēñömö tæcæ goyongä Itota nänö nē emiñænäni iñömö tömengä ingante,

—Awënë nē Odömömi imi wædænque cæe, ämönipa.

32 Ante äñönäni tömengä wæætë tömënäni inänite,

—Botö cængui botö eadö ante quinä i, ante munitö guiquënë tömää eñënämaï iminipa töö.

33 Angä eñëninque tömengä emiñænäni godongämæ nämanque apænedinque,

—Wabänö wacä tömengä ingante cængui ænte pongantawo.

34 Äñönäni Itota,

—Botö imote nē da pönongä nänö änö bai botö cädö iñömö mänii tömömo cængui bai impa. Ayæ, Tömengä nänö cädö ante tömänö inque cæbopa, ante botö cädö iñömö botö cængui bai

adobaï impa. ³⁵ Minitö iñömö, Mëa go mëa apäicä bayonte amiñayedë tömëmoncodë gæcæmönimpa, ante wii ämïnitawo. Botö guiquënë mïnitö imïnite ämopa. Waodäni inänite wi æmonte aedäni. Edæ mäninäni tömëmoncoo gæyedë bai inänipa. ³⁶ Itota, Botö beyæ ante waodäni inänite në gædongä ingante botö, Bitö cæbipa, ante paga cædinque ñowoyedë incæ do pönömo ængampa. Wænämäi wantæpiyæ quëwencædänimpa, ante cædinque ñowoyedë incæ tömengä tömënäni inänite do gædongä ingampa. Inique botö änö ante waodäni mïmöno në quiyadingä tönö në gædingä tönö guëa tocædaïmpa. ³⁷ Mänömaï wëenëñedë nani angainö ante, Waocä adocanque tömëmö quiyacä ate wacä guiquënë në gædongä ingampa, ante näwangä ante impa. ³⁸ Tömëmoncodë iñömö cædäni bai cædämaï imïni incæte mïnitö tömëmoncoo gæquinäni bai bacæmïnimpa, ante botö, Waodäni botö quinäni inänite gæcæmïnimpa, ante mïnitö imïnite da godömo gomïnitapa. Wadäni iñömö do mänincodë nanguï pönï quiyate cædinque botö änö ante waodäni inänite apænecadänimpa. Minitö guiquënë mïni cædämaï iñömö incæ önonque gædimïni imïnipa, ante Itota apænecäïmpa.

³⁹ Onquiyængä guiquënë tãmadiaidi mänïñömö nani quëwëñömö quëwënäni inänite, “Tömengä iñömö botö imote tæcæ adinque, Botö æbänö cæboo, ante tömänö ante botö imote apænecantapa,” ante apænecä ëñëninque tömënäni nanguï inäni Itota ingante pönengadänimpa. ⁴⁰ Tãmadiaidi tömengä weca godinque, Bitö mönitö weca a ongöe, änäni ëñëninque tömengä mëönaa iñonte tömënäni weca

owocantapa. ⁴¹ Tömengä nänö owoyedē tömengä nänö änö beyænque godömenque tæiyænñäni iñömö tömengä ingante wede pönente badänitapa. ⁴² Adodäni onquiyængä ingante,

–Wii bitö apænete änonque ante eñëninque pönëmöni inte mönitö tömengä apænecä adobaï eñënimöni imönipa. Ayæ, Mäningä iñömö inguipoga mönö quëwencabo iñömönte tömengä näwangä mönö imonte nē Ænongä ingampa, ante do eñëmönipa, apænegadänimpa.

Itota cæcä beyænque awënë tönö cæcä wengä waa bacäi

⁴³ Mëönaa go ate tömengä mäniñömö quëwëninque wadæ godinque, Gadideabæ gocæboimpa, ante gocantapa. ⁴⁴ Itota incæ wëenëñedē, İimaï impa, ante änongäimpa. Wængongui beyæ nē apænecä inte tömengä nänö pægaimæ incæ mäniñömö apæneyongä tömengä tönö pægainäni guiquënë tömengä ingante wii waa adänipa töö, ante änongäimpa. ⁴⁵ Tömengä mäni Gadideabæ nänö ponque pongä adinque gadideaidi edæ Eedotadëe iñömö Patowa näni ææmæ cæyedē Itota bai mäniñömö gote ongöñönäni, Tömengä æbänö cæcää, ante tömäa adinäni inte, Bitö pömi waa amönipa, ante tömengä ingante apænegadänimpa.

⁴⁶ Ayæ Gadideabæ godinque Itota wæætē Cänaa näni quëwëñömö, Æpæ incæ biinömæ bacäimpa, ante wëenëñedē nänö cædiñömö adoyömö gocantapa. Capënaömö näni äñömö quëwëninque adocanque pancabaa awënë tönö godongämæ cæcä iñömö tömengä wëñængä

onguiñængä wënæ wënæ ïnongäimpa. ⁴⁷ Adocä onguiñængä ïñömö, Itota Oodeabæ quëwente Gadideabæ pongä, änäni ëñëninque tömengä Itota weca gote angantapa. Botö wëñængä onguiñængä wæncæ cæcä ïñongante bitö tömengä ingante cæbi waa bacæe. Ægodöe. ⁴⁸ Itota tömengä ingante,

—Botö, Acæminimpa, ante bamönengæ cæbo ate wæmini inte minitö mäninö beyænque botö ïmo pönëmini awædö.

⁴⁹ Ante apænecä ëñëninque pancabaa awënë tönö godongämæ cæcä,

—Awënë, botö wëñængä ayæ wænämai ïñedë ægodöe gocäimpa.

⁵⁰ Ante äñongä Itota wæætë,

—Ñowo wadæ goe. Bitö wëñængä ïñömö quëwencæcäimpa, ämopa. Angä ëñëninque onguiñængä, Itota nänö änö nö impa, ante pönëninque wadæ gogacäimpa. ⁵¹ Tömengä, Botö oncö, ante taadonque goyongante tömengä beyæ në cædönäni tömengä ingante apænecæte ante pö bee tənänitapa. Pö bee tëninque,

—Bitö wëñængä waa bacäi.

⁵² Ante apænedäni ëñëninque tömengä tömënäni ïnänite, Botö wëñængä æyedënö waa bacäi, ante äñongä tömënäni wæætë tömengä ingante,

—Ïmö ædæ gowayedë mäniñedë tömengä gancæ bacantapa, ante apænedänitapa. ⁵³ Ayæ wëñængä mæmpo, Bitö wëñængä quëwencæcäimpa, ante Itota botö ïmote nänö äniñedë adoyedë botö wëñængä do waa bacantapa, ante wædinque tömengä tönö tömengä näni quëwencabo tömancabo Itota ingante wede pönënäni bagadänimpa. ⁵⁴ Itota

oodeoidi weca quëwente Gadideabæ ocæ ëmænte
pöninge tömengä mäninömö ii bamönengæ
cædinque mempoga nänö cædö bamönengæ
bagatimpa.

5

*Itota cæcä beyænque pæ opa pæ opa gocä waa
bacäi*

¹ Ayæ ate oodeoidi, Mönö Wængongui beyæ,
ante nani ææmæ cæyedë Itota Eedotadëë inömö
æidinke ado ante gogacäimpa. ² Eedotadëë
wææ cæte inömö obegaidi nani pö guidemö
gäänë gäwapæ impa. Mänimæ gäwapæ ebedeo
tededö Betadapæ nani ämæ yæwedeca onompo
æmæmpoque ñoncæcate inoncöimpa. ³ Mänincönë
wënæ wënæ inäni tæiyænäni cöwë öñönönänimpa.
Pancadäniya babetamönäni inte pancadäniya pæ
opa pæ opa godönäni inte pancadäniya cömante
inönäni inänipa. ⁴ Adodäni, Æpæ incæ gopæ,
ante wänö cönönäni inönänimpa. Edæ Wængongui
anquedo wæætë wæætë, Mänimæ incæ incæ
gopængæimpa, ante wææ pöninge cædongäimpa.
Gäwapæ incæ incæ go cæpæ adinke æcänö
täno mänimænë guida inte adocä quiëmë wënæ
wënæ i waa badongäimpa. ⁵ Mäninömö öñönäni
weca adocanque në öñönongä inömö todëinta i
ocho wadepo ganca wënæ wënæ inte wægaingä
inongäimpa. ⁶ Adocä mäninömö öñongä ingante
Itota ponte ayongä wadäni, Mäningä wantæpiyæ
mänömai wënæ wënæ inte wægaingä ingampa,
ante apænedäni ëñëninge Itota tömengä ingante,
—Bitö, Waa bainëmo, ämitawo.

⁷ Ante äñongä në wënæ wënæ ingä wæætë,

—Awënë, gäwapæ incæ incæ gopæñedē æcänö botö ïmote ænte guiquinaa edæ dæ angampa. Ayæ botö, Æpænē guicæboimpa, ante goyömo wacä pöningue do täno guicä.

⁸ Ante wæyongante Itota,

—Ængæ gantie, bitö bee podonte möïmo ænte goe. ⁹ Äñongä onguïñængä ïñömö ïñontobæ waa badingä inte tömengä bee podonte möïmo ænte cægonte gocantapa. Oodeoidi nani guëmanguïönæ ïñonte Itota mänömaï cæcantapa. ¹⁰ Mänömaï beyæ oodeoidi awënëidi ïñömö onguïñængä nē waa badingä ingante,

—Ñöwoönæ guëmanguïönæ ïñonte mönö æbänö cæquiï, ante do wææ yewæmonte impa cæbii. Bitö bee podonte möïmo næænämaï incæbiimpa.

¹¹ Ante pïñönäni tömengä wæætē,

—Botö ïmote, Waa bae, ante nē cædingä ïñömö adocä incæ, Bitö bee podonte möïmo ænte goe, angä cætabopa.

¹² Angä ëñëningue tömënäni tömengä ingante,

—Mäningä ïñömö bitö ïmite, Bitö bee podonte möïmo ænte goe, ante nē angä ïñömö æcänö ingää. Apænebi ëñëmönie, änänitapa.

¹³ Itota guiquënë do waodäni nanguï ïnäni ongönäni tæcæguedē go wadæ godongäimpa. Mänömaï beyæ onguïñængä nē waa badingä ïñömö, Nē cædingä æcänö ingää, ante ëñënamäï ingantapa. ¹⁴ Ayæ ate Itota Wængonguï oncö ñænæncö yabæcönē go guidinque tömengä ingante bee téninque,

—Ëñëmi, bitö wæætē waa babi ïmipa. ïninque godömenque wënæ wënæ cädämaï incæbiimpa.

Bitö mäninö wənæ wənæ bitö cægainö ante ñimpo cædāmaï imi ininque wabänö bitö wæwenguinque godömenque babaïmipa, ämopa.

¹⁵ Angä eñëninque onguiñængä wadæ gote oodeidi awënëidi weca pöninque angantapa. Botö imote, Waa bae, ante nē cædingä iñömö Itota ingampa, ante apænecantapa. ¹⁶ Mänömaï beyæ Itota mäninö nänö cædinö ante guëmanguiönæ iñonte cæcä adinque oodeidi awënëidi iñömö tömengä ingante togænte wənæ wənæ cædänitapa.

¹⁷ Itota tömënäni inänite,

—Botö Mæmpo ñöwoönæ ganca tömengä nänö cædö ayæ cæcä ingampa. Ayæ botö adobaï cæbo imopa, ante apænecantapa.

¹⁸ Mäninö angä eñëninque tömënäni godömenque pïininque, Mönö tömengä ingante æbänö cæte wænömö wænguingää, ante godömenque nanguï cægadänimpa. Tömënäni, Tömengä guëmanguiönæ iñonte do cæcä ingampa. Ayæ godömenque, Wængongui botö Mæmpo inongäimpa, ante tededinque tömengä, Botö Wængongui bai imopa, ante bai cæcampa töö, ante tömënäni godömenque pïingadänimpa.

Tömengä Wengä ingante Wængongui pönö cæcä ate Awënë bacampa

¹⁹ Itota adodäni inänite iïmaï äninque, “Botö mïnitö imïnite näwangä ämopa. Botö Wængongui Wëmo inömo incæ ædö cæte adoboque nämanque cæbo imoo. Botö Mæmpo æbänö cæcää adinque botö adodonque cæbopa. Edæ botö Mæmpo nänö cædö bai botö Wængongui Wëmo inte adobaï cæbopa. ²⁰ Edæ Mæmpocä Wëmo iñömote

tömengä botö imote waadete pönëninque tömengä nänö cädö tömänö ante botö imote odömongä abo imopa. Ayæ minitö, Æbänö cæcä wæmöö, ante wæcæminimpa, ante cædinque tömengä godömenque bamönengæ nänö cädö ante botö imote odömongä ate botö wæætë cæbo acæminimpa. ²¹ Edæ botö Mæmpo iñömö æmæwo wængainäni inänite, Ñäni ömæmöninque minitö miimäni quëwencæminimpa, ante pönö cæcä bai botö tömengä Wëmo iñömö adobai cæbo imopa. Æcänö ingante, Bitö mi quëwencæbiimpa, ante äinëmo inte botö tömengä ingante pönö cæbo ate miingä quëwencæcäimpa. ²² Adobai botö Mæmpo iñömö waodäni inänite adinque, Æcänö waa cæcantawo, ante, Æcänö wënæ wënæ cæcantawo, ante apænte änämai ingampa. Wæætë edæ botö tömengä Wëmo iñömote tömengä, Bitö mäninö ante waodäni tömänäni inänite apænte ancæbiimpa, ante cægacäimpa. ²³ Mänömai cædinque botö Mæmpo, Waodäni botö imo nani waa abai adobai botö Wengä ingante tömänäni waa acædänimpa, ante cægacäimpa. Botö tömengä Wëmo iñömote në waa adämai ingä iñömö tömengä botö Wæmpocä botö imote da pönongä ingante adobai waa adämai ingampa töö,” ante Itota apænecantapa.

²⁴ Ayæ apænedinque, “Minitö iminite näwangä ämopa. Waocä botö änö ëñëninque botö imote në da pönongaingä ingante në wede pönengä iñömö tömengä nänö apænte pante wæwenguinö godämai incæcäimpa. Wæætë tömengä nänö wænämai quëwenguinö gocæcäimpa. Edæ tömengä mönö æmæwo wænguino ñimpo cædinque wænämai mönö quëwenguinö do gocäimpa. ²⁵ Minitö

iminite näwangä ämopa. Waodäni nē quēwēnāni incæ tōmēnāni æmæwo wængaināni bai inōnāni inte tōmēnāni iñōmō Wængongui Wēmo botō tedepāmo oo ēñencädānimpa. Nōwoönæ tōmēnāni nāni ēñenguionæ do batimpa. Nē ēñēnāni iñōmō tōmēnāni nāni wænāmaï quēwenguinō gocädānimpa. ²⁶ Wængongui nāmā nē quēwēnongä inte tōmānāni nāni quēwēmāmo ante nē godongä ingampa. Mänōmaï beyænque botō tōmengä Wēmo adobaï nāmā nē quēwēnōmo inte tōmānāni nāni quēwēmāmo ante nē godōmo imopa. ²⁷ Ayæ Waobo ēñagaïmo iñōmote tōmengä pōnō cæcā beyænque botō nē ämo badinque nāmā tæï piñænte cædinque edæ, Æcänō waa cæcantawo, ante, Æcänō wēnæ wēnæ cæcantawo, ante nē apænte angui mo imopa. ²⁸ Botō mänōmainō ante apænebo ēñēninque mīnitō, Æbänō angä wæmōö, ante änāmaï incæminimpa. Edæ æmæwo wængaināni tōmānāni tōmēnāni nāni wodido nē oñongaināni iñōnānite edæ botō tedepāmo incæ tōmēnāni nāni ēñenguionæ oo pōni impa. ²⁹ Botō tedepāmo ēñēninque tōmēnāni tōmānāni ta poncädānimpa. Nē waa cægaināni iñōmō wænāmaï nāni quēwenguinō nāni goquinque ñāni omæmoncädānimpa. Nē wēnæ wēnæ cægaināni guiquēnē nāni apænte pante æmæwo wæwenguinō nāni goquinque omæmoncädānimpa cæminii,” ante Itota apænegacäimpa.

Æcänō äna ēñente cæbii, ante Itota ingante änānipa

³⁰ Ayæ godōmenque apænedinque Itota iïmaï apænecantapa. “Botō ædō cæte nämanque adoboque cæbo imoo. Wæætē Wængongui botō

ïmote æbänö angä eñëninque botö mäninö ante, Æcänö waa cæcantawo, ante, Æcänö wënæ wënæ cæcantawo, ante apænte ämopa. Ayæ botö apænte änö ïñömö cöwë nöinö ante impa. Edæ botö tömëmo ämaï cædämaï ïmopa. Wæætë botö Mæmpo botö ïmote nē da pönongaingä nänö ämaï cæbo ïmopa. ³¹ Botö nämanque äninque, Æbänö cæboo, ante apænebo bai minitö, Önonquedö ante impa, ancædöminimpa. ³² Botö æbänö cæboo, ante wacä botö beyæ ante nē apænecä ingampa. Tömengä botö ïmotedö ante nänö apænedö ïñömö edæ nö impa, ante eñëmopa. ³³ Minitö botö ïmotedö ante, Æbänö cæcää, ante eñencæte ante Wäo nē æpænē guidönongä weca wadäni ïnänite da godöminitapa. Ayæ Wäo mäninäni ïnänite botö ïmotedö ante nö apænecä eñënanitapa. ³⁴ Botö æbänö cæboo, ante waodäni botö beyæ apænecædänimpa, ante botö änämaï ïmopa. Wæætë, Minitö botö æmo beyænque quëwencæminimpa, ante cædinque botö mänömainö ante apænetabopa. ³⁵ Wäo nē æpænē guidönongä tömengä ïñömö ti wodönoincade bæco bai ingacäimpa. Ayæ, Tömengä nänö angainö ñäo bai impa, ante adinque minitö wantæyö ïñonte, Waa impa, ante watapæ tominitapa. ³⁶ Botö æbänö cæboo, ante Wäo nē æpænē guidönongä nänö angainö beyæ waodäni mäninö ante do ewocadäni ingadänimpa. Ayæ botö Mæmpo, Bitö iïmaï cæe, ante, Tömää ïinque cæcæbiimpa, ante botö ïmote nänö angainö bai ante do cædömo ïmopa. Botö Mæmpo botö ïmote da pönongaingä ingampa, ante wadäni botö cædinö beyæ do eñënanimpa. ³⁷ Ayæ botö Mæmpo botö ïmote nē

da pönongaingä iñömö adobaï, Botö æbänö cæboo, ante apæneca eñengadänimpa. Minitö guiquënë tömengä ingante adämaï imini inte tömengä nänö tedepämo incæ cöwë eñenämaï iminipa töö. ³⁸ Ayæ botö Mæmpo botö imote da pönongä pönimo imopa, ante minitö pönenämaï imini inte edæ tömengä nänö angainö ante entawenämaï quëwëmini iminipa. ³⁹ Wængongui angä eñëninque nani yewæmongainta ædæmö adömini inte edæ minitö, Mäninö nani yewæmongainta amöni beyenque mönitö wænämaï möni quëwenguinö gocæmönimpa, ante pönëmini iminipa. Iñæmpa mänintaa yewæmöninque botö imotedö ante apænedinque yewæmongadäni apa quëwëminii. ⁴⁰ Botö, Minitö wænämaï mini quëwenguinö ante pö æedäni, añömote minitö wæætë Baa äninque botö weca pönämaï iminipa,” ante Itota apænecantapa.

⁴¹ Ayæ apænedinque tömengä, “Waadäni botö imote waa adinque apænecädänimpa, ante änämaï imopa, angantapa. ⁴² Iñæmpa, Minitö æbänö cæminii, ante botö do eñëmopa. Wængongui nänö waadete pörente entawënö minitö entawenämaï quëwëminipa, ante do eñëmopa. ⁴³ Wængongui angä eñëninque botö wææ pönimo adinque minitö Baa ante botö imote pönenämaï iminipa. Wacä guiquënë nämä äninque pongä ininque minitö mäningä ingante Ao ante pönëmaïminipa, ante awædö. ⁴⁴ Minitö wacä ingä wacä ingä, Botö imote waa adinque waa apænecädänimpa, ante cæmini awædö. Incæte minitö, Mönö Wængongui në adocanque ingaingä ingampa, ante, Tömengä mönö imonte waa adinque apænecæcäimpa, ante

cædāmaī īminīpa. Mänōmaī beyæ mīnitō botō īmote ædō cæte pōnēmīni īminīi. ⁴⁵ Botō Mæmpo weca ongōninque mīnitō īmīnitedō ante botō, Īnāni wēnæ wēnæ cædāni īnānitapa, ante ancæboimpa, ante mīnitō pōnēmīnitawo. Mänōmaīnō ante edæ pōnēnāmaī iedāni. Wæætē Mōitee wodi nānō angainō ēñente beyænque mōnō quēwengæimpa, ante pōnēmīnīpa. Īñæmpa adocā Mōitee wodi mīni nē pōnēnongā īñōmō, Nē wēnæ wēnæ cæmīni īminīpa, ante ancæcāimpa cæmīnīi. ⁴⁶ Mīnitō Mōitee wodi ingante pōnente baī adobaī botō īmote pōnencædōmīnīpa. Edæ tōmengā botō īmotedō ante yewæmongacāimpa. ⁴⁷ Mōitee wodi nānō yewæmongainō ante pōnēnāmaī īmīni īnīnque mīnitō ædō cæte botō apænedō ante ēñēnīnque pōnenguīmīnīi,” ante Itota māniñedē īnīnque apænegacāimpa.

6

5.000 ganca īnāni īnānite Itota godongā cænānīpa

¹ Mānīnō īnīnque apænete ate wantæyō īñonte Itota wadæ godīnque gāwapæ Gadideapæ nāni āmæ æmæmāa tao gogacāimpa. Mānīmæ Tibediapæ nāni āmæ impa. ² Tōmengā wogaa tao gocā adīnque waodāni tæiyænāni pō tee empo godānitapa. Tōmengā, Acædānīmpa, ante cædīnque wēnæ wēnæ īnāni īnānite bamōnengæ cæte odōmongā do adīnāni inte godānitapa. ³ Ayæ Itota tōmengā nānō ēmīñænāni īnānite ānanquidi ænte mæicā ædīnque tōmēnāni tōmengā tōnō tæ contadānitapa. ⁴ Wodo pænta gogaīōnæ, ante oodeoidi Patowa nāni ææmæ cæōnæ oo

pöni ingatimpa. ⁵ Itota gomö ayongä waodäni tæiyæñäni tömengä weca pönäni adinque tömengä Pedipe ingante,

—Mäninäni waodäni beyæ ædönö gote päö godonte æninque godömöni cænguïnänii, angantapa.

⁶ Edæ Itota iñömö, Æbänö cæbaimoo, ante do ëñëningä inte mäninö ante, Pedipe æbänö cæquiringä, ante acæte ante angantapa. ⁷ Pedipe wæætë tömengä ingante,

—Iñæmpa päö ante tömänäni wædænque cæncædänimpa, ante ocho apäicä cæte beyæ paga æinta æninque mänimpota godonte æninque edæ wii eyepæ imaimpa, angantapa. ⁸ Ayæ tömengä ëmiñængä Timönö Pegodo biwi Æntade iñömö Itota ingante,

⁹ —Mönitö weca në ongongä edëningä iñömö tebada näni awënënimö guiyä päö önompo æmæmpoque tönö guiyä gæyæ mëa pöni næængä ingampa. Incæte mänii cænguï tæiyæñäni beyæ ædö cæte eyepæ i, ante wæbopa.

¹⁰ Angä ëñëninque Itota,

—Minitö tæiyæñäni godongämæ ongönäni inänite ämïni tæ contaedäni, angantapa. Tömengä nänö ämaï änäni ëñëninque waodäni önömæcaque inö nanguï gaguimæ pæyömö do tæ contadänitapa. Onguiñænäni incæ önompo æmæmpoque miido ganca inäni inte tæ contadäni ingadänimpa.

¹¹ Itota päö æninque, Wængonguï, Bitö waa pöni pönömi ænte cænguïmöni, ante apænedinque tömengä nänö ëmiñænäni inänite godongä æninque tömënäni wæætë tæ contadäni inänite di mëñænäni cænänitapa. Ayæ tömengä gæyæ

æninque adobaï cæcantapa. Tömänäni iñömö nāni cæinēnō ante eyepæ cængadānimpa.

¹² Tömēnāni tōmo pōnī cænāni ate tōmengä ēmiñænāni inānite tōmengä,

—Cænguī nāni ao mæ ao mæ ñönōnī ee öñoncoo wote badāmaï ingæimpa, ante pædæ wææmpo ö ædāni.

¹³ Angä ēñente cædinque nē cænāni päö önompo æmæmpoque tebada nāni awēnēnimō nāni ao mæ ao mæ ñönōnī ee öñoncoo ö ænte da wēnāni ate edæ otodē tipæmpoga go mentodēa cænguī eyede da wēnāni contagatimpa. ¹⁴ Waodāni iñömö Itota bamönengæ nānō cædi adinque,

—Nāwangä iingä iñömö Wængonguī beyæ nē apæneca ingampa. Tōmengä inguipoga Pongu- ingä, ante nāni angaingä inongäimpa, ante tæcæ änānitapa.

¹⁵ Tömēnāni, Bitō mönitō Awēnē Odeye bacæbiimpa, ante botō imote bæi ongoncæte ante poncæ cædānipa, ante wædinque Itota wadæ godinque adocanque änanquidi wæætē æigacäimpa.

Itota æpæ yædopæ dao dao gocä

(Mäateo 14.22-27; Mäadoco 6.45-52)

¹⁶ Gäwadecæ pōnī bayö tōmengä ēmiñænāni iñömö gäwapæ yæwedeca wæi gogadānimpa.

¹⁷ Itota angä ēñēninque mänñömö wæi wipodē guidinque tōmēnāni, Gäwapæ æmæmäa Capēnaömö nāni quēwēñömö mönō taocæimpa, ante tæcæ wogaa tao goyönāni dobæ wēmö bayö Itota ayæ tōmēnāni weca pönāmaï inongäimpa.

¹⁸ Ayæ woboyæ nanguī pæmænte pōñö æpæ mæ conta mæ conta cæyonte, ¹⁹ tōmēnāni wodo tinco

quidömetodo wiyate cæyönäni Itota iñömö wipo gämænö pöningue æpæ yædopæ wænömænæcapæ dao dao pongä adinque ancai guiññänitapa. ²⁰ Ancai guiñññönänite Itota iñömö tömënäni inänite,

—Botö imopa. Guiññänamai ïedäni, angantapa.

²¹ Ante añongä tömënäni Ao ante tömengä ingante wipodë æninque tömënäni nani goinññömö emönaiya do tao gogadänimpa.

Waadäni Itota ante diqui diqui minte pönäni

²² ïimö ate tæiyænäni gäwapæ imæ wedeca a ongönönänimpa. ïinque tömënäni, Wipo adoque pöni mänññömö wäi wocæ incæte Itota iñömö mänimpodë guidämai iñongante tömengä miññæ godäni adodänique guii wadæ tao godänitapa, ante adinque wädänitapa. ²³ Awënë Itota do Wængongui ingante, Bitö waa pöni pönömi cænguimöni, ante apæneca ate waodäni nani päo cæniññömö pancadäniya ayæ ongönänimpa. Nöwo iñömö wapocoo Tibedia nani quëwëññömö wo cæwodinque mänññömö tömënäni nani cæniññömö eyequei pönäni adänitapa. ²⁴ ïinque Itota tönö tömengä nänö emiññænäni edæ dæ änäni wædinque tæiyænäni iñömö wipodë guiite Capënaömö godinque Itota ante diqui diqui mincæte ante wogaa gogadänimpa.

Itota, Mönö quëwenguinque, ante cængui bai ingampa

²⁵ Adodäni gäwapæ æmæmäa tao godinque tömengä ingä adinque,

—Awënë nē Odömömi ïmi æyedënö ïñömö pömitawo, änänitapa.

²⁶ Äñönäni Itota wæætë,

—Minitö iminite nāwangä ämopa. Minitö tömo pönī päö cænīmīni inte botö imote ante diqui diqui mincæ pömīnitapa töö. Wæætë edæ botö, Acæminimpa, ante bamönengæ cæbo beyæ mīnitö wīi pömīni awædö. ²⁷ Minitö, Mönö cænguī, ante æncæte ante cæmīni incæte inguipogaque mīni woquīnonque ante æncæ cædāmaī quēwēedāni. Wæætë edæ, Mönö cænguī ïinque bayedë cænguī mæ öñongæimpa, ante cædinque mīnitö, Mönö wænāmaī quēwenguīnque gocæmöimpa, ante pönente quēwēedāni. Botö nē Waobo ëñagaīmo ïmo mänī cænguī mīnitö iminite pönömo æncæminimpa. Botö Mæmpo botö imotedö ante, ïngä nö cæcä ingampa, ante odömongacäimpa.

²⁸ Angä ëñëninque tömënäni tömengä ingante,

—Mönitö, Wængonguī nänö cæquīmāmo ante cæcæte ante quīnö cæquënëmöni imönii, ante wæmönipa.

²⁹ Äñönäni Itota wæætë,

—Botö Wængonguī nänö nē da pönongaīmo ïñömote mīnitö botö imote mīni wede pönënö ïñömö edæ mäninö Wængonguī nänö cædö impa, angantapa.

³⁰ Mänömaī beyæ tömënäni godömenque tömengä ingante,

—Bitö, Ëñencædänimpa, ante bamönengæ bitö cædö ante æbänö cæte odömömi adinque pönëmaīmönipa. Æbänö cæquīmīi, ante änewënänitapa. ³¹ Mönö wæmæidi önömæca nāni quēwēñedë cænguī mänää nāni angāi

cængadänimpa. Ìimainö ante yewæmongatimpa. “Tömengä, Minitö cænguï, ante tömënäni inänite öönæde inö mäwææ godongacäimpa,” ante nani yewæmongainö bai impa, ante apænedänitapa.

³² Itota wæætë tömënäni inänite,
—Nawangä ämopa. Minitö iminite öönæde mäwææ cænguï nê pönongaingä inñömö tömengä wii Möitee wodi ingacäimpa. Wæætë botö Mæmpo inñömö tömengä minitö iminite öönæde nani näwä cænguï bai pönongä cæncæminimpa. ³³ Öönæde quëwente wææ pongaingä inñömö tömengä inñömö, Cænguï bai ingampa, ante Wængonguï nanö nê angaingä ingampa. Adocä inguipoga quëwënäni inänite, Mini wantæpiyæ wænämai quëwenguinö ante pönongä æninque quëwënänipa.

³⁴ Ante Itota apænecä ëñëninque tömënäni,
—Awënë, ñowo mänii cænguï iimö inñö iimö inñö pönömi cæmönie.

³⁵ Äñönäni Itota godömenque apænedinque,
—Botö inñömö, Mini quëwenguinque, ante mini cænguï bai inömo imopa. Botö weca nê pongä inñömö cöwë cænguï gue ænënämai bai quëwencæcäimpa. Ayæ botö imote nê wede pönengä inñömö cöwë tepæ gæwænämai bai quëwenguingä ingampa, ante apænecantapa. ³⁶ Ayæ wæætë, Minitö iminite do botö änö bai impa. Botö imote do adimini incæte minitö ayæ wede pönënämai iminipa. ³⁷ Botö Mæmpo, Bitö quinäni bacædänimpa, ante cædinque botö imote pönongä æmo ininque botö quinäni nê badäni inte tömënäni tömänäni inñömö botö weca edæ do pönänipa. Ayæ æcämenque botö weca pöna inate, Botö weca pönämai imipa, ante cöwë änämai

incæboimpa. ³⁸ Edæ öönæde quëwëninque botö wii tömö ämaï cæcæboimpa, ante wææ pontabopa. Wæætë botö imote nê da pönongaingä nänö ämaï cæcæboimpa, ante wææ pontabopa. ³⁹ Ayæ botö imote nê da pönongaingä botö imo nänö angainö iñömö iïmaï impa. Waodäni bitö quinäni bacædänimpa, ante pönömo æninque bitö quinäni badingue adocanque incæ wë womonte wænämaï incæcäimpa. Wæætë iinque baquiönæ iñonte bitö, Ñäni ömæmöedäni, ämi ëñëninque bitö quinäni tömänäni edæ ñäni ömæmoncædänimpa. ⁴⁰ Edæ botö Mæmpo nänö angainö iñömö iïmaï impa. Botö Wængongui Wëmo iñömote botö imote ædæmö adinäni inte edæ botö imote nê pönënäni tömänäni cöwë wænämaï wantæpiyæ quëwencædänimpa. Mänömaïnö ante impa. Ayæ iinque baquiönæ iñonte botö mäninäni inänite, Minitö ñäni ömæmöedäni, ämo ate ömæmoncædänimpa. Itota mänömaï apænecantapa.

⁴¹ Apænecä ëñëninque oodeoidi iñömö, Tömengä, “Botö cænguï bai imopa, ante öönæde inö wææ pontabopa,” angampa, ante tömengä ingantedö ante tæcæ pïinte tedewënanitapa. ⁴² Tömënäni,

—İngä iñömö wii Ootee wengä Itota ingantawo. Tömengä mæmpo tönö wäänä wii mönö adöna inatawo. Tömengä ædö cæte, Botö öönæde quëwente wææ pontabopa, angä änewëë.

⁴³ Ante pïiñönäni Itota wæætë,

—Minitö nämanque godongämæ pïinte tededämaï iedäni. ⁴⁴ Botö Mæmpo botö imote nê da pönongaingä wii pönö cæcä bai æcämenque incæ botö weca pönämaï incædongäimpa.

Ayæ iinque baquïönæ iñonte botö weca në pongä ingante, Ñäni ömæmöe, ämo ñäni ömæmoncæcäimpa. ⁴⁵ Wængonguï beyæ në apænegainäni näni yewæmongaintaa iïmaï ante yewæmongadänimpa. “Wængonguï waodäni tömänäni inänite odömonte apænecä eñencädänimpa.” Botö Mæmpo apænecä në eñenäni iñömö tömengä nänö odömonte apænedö ante në eñenäni inönäni iinque tömënäni tömänäni botö weca pönänipa, ante Itota apænecantapa.

⁴⁶ Ayæ apænedinque, “Mini waocabo tömämïni incæ botö Mæmpo ingante cöwë adämaï imïnitapa. Botonque iñömö Wængonguï weca në quëwente pömo inte botö Mæmpo ingante në adïmo iñömö adoboque pöni imopa. ⁴⁷ Minitö imïnite näwangä ämopa. Botö imote në wede pönengä iñömö tömengä cöwë wantæpiyæ nänö quëwenguïmämo do entawente quëwengä ingampa. ⁴⁸ Botö iñömö, Mini quëwenguinque, ante mïni cænguï baï imopa. ⁴⁹ Mini wæmæidi önömæca quëwëñedë cænguï mänää näni angai cængainäni incæte edæ do wængadänimpa. ⁵⁰ Botö iñömö cænguï baï inömo inte öönädë quëwente wææ pömo imopa. Iinque waocä, Cænguï cænte baï quëwengæimpa, ante botö imote pönengä iinque tömengä cöwë wænämaï quëwëmaingampa. ⁵¹ Botö cænguï baï imo inte öönädë quëwengäimo incæ wææ pontabopa. Æcänö cænguï cænte baï botö imote pönëna tömengä iñömö cöwë wænämaï quëwencæcäimpa. Ii cænguï botö godonguï botö nämä baö impa. Inguipoga quëwënäni inänite, Minitö quëwenguïmïni, ante botö nämä baö incæ godoncæboimpa,” ante Itota

mänömaï apænecantapa.

⁵² Mäninö angä eñente wædinque oodeoidi nāni cabo iñömö godongämæ nāmanque tededinque wæætē godö wæætē godö ānewēnānitapa.

—Māningä iñömö mönō imö tömengä nāmā baö ædö cæte pönongä cænguimōnii.

⁵³ Ante tedewēñōnāni Itota wæætē tömēnāni inānite,

—Mīnitō imīnite nāwangä āmopa. Botō Waobo eñagaimo iñömote mīnitō botō baö cænāmaï inte botō wepæ bedāmaï imīni ininque ædö cæte Wængonguï wantæpiyæ nānō quēwenguimāmo entawēmīni inguimīnii. ⁵⁴ Botō baö nē cængä ayæ botō wepæ nē becä tömengä iñömö Wængonguï wantæpiyæ nānō cōwē quēwenguimāmo do entawente quēwengä ingampa. Ayæ iinque baquiönæ iñonte botō māningä ingante, Bitō ñāni ömæmōe, āmo ñāni ömæmoncæcāimpa. ⁵⁵ Edæ botō baö nāwä cænguï baï impa. Ayæ botō wepæ nāwä bequï baï impa. ⁵⁶ Botō baö nē cængä inte ayæ botō wepæ nē becä iñömö tömengä botō nempo ee quēwēnongä ingampa. Ayæ adobaï tömengä botō imote entawēnongä ingampa. ⁵⁷ Botō Mæmpo nē Quēwēnongä inte botō imote da pönongä pönimo imopa. Tömengä pönō cæcä ate quēwēmo imopa. Botō imote nē cængä iñömö adobaï botō cæbo beyænque quēwencæcāimpa. ⁵⁸ Botō cænguï baï imo inte öönædē wææ pönimo iñömö māniï cænguï baï imopa. Mönō wæmæidi cænguï mānāā nāni angai cængaināni incæ edæ do wængadānimpā. Wæætē ñōwo wææ pōmo iñömote, Cænguï impa, ante nē cænongä iñömö

tömengä cöwë wænämaï quëwencæcäimpa, ante Itota apænegacäimpa.

⁵⁹ Tömengä mäninö ante Capënaömö nani quëwëñömö nani odömöincönë ongöningue tömënäni inänite odömonte apænegacäimpa.

Itota nänö änö beyænque mönö wænämaï quëwengæimpa

⁶⁰ Mäninö odömonte apænecä ëñëningue tömengä ëmiñænäni nanguï inäni,

—Tömengä nänö odömonte apænedinö iñömö waadedämainö impa. Edæ æcänö ëñëmaïnaa, ante änänitapa.

⁶¹ Mäninö nänö odömonte apænedinö ante tæcæ pïinte tedewënäni wædingue Itota tömënäni inänite,

—Minitö botö äninö ante oda cæmini inte pïimïni iminitawo, angantapa. ⁶² Ayæ godömenque apænedinque, Botö Waobo ëñagaïmo imo öönædë quëwente wææ pongaïmo inte adodö adoyömö æibo adinque minitö æbänö ante ämaïminii.

⁶³ Wængonguï Önöwoca pönö cæcä beyænque waocä quëwengä ininque tömengä baonque nänö ëñayö beyænque ædö cæte quëwëmaingää. Botö Wængonguï Önöwoca tönö apænedinque minitö iminite botö apænedinö beyæ minitö önöwoca ëwocate quëwencæminimpa. ⁶⁴ Incæte minitö weca pancadäniya iñömö botö imo pönënämaï inänipa töö, ante Itota apænecantapa.

Edæ tömënäni weca æcänö tömengä ingante pönënämaï ingää, ante Itota do ëñënongäimpa. Ayæ tömengä ingante në godö odömonguingä æcänö imaingää, ante tömengä adobaï do ëñënongäimpa.

⁶⁵ Itota godömenque apænedinque,

—Botö mänüi beyæ mīnitö iminite do antabopa. Botö Mæmpo wīi pönö cæcä bai æcämenque incæ botö weca pönämaī incædongäimpa, ante apænegacäimpa.

⁶⁶ Māniönæ ganca tōmengä miñæ nē godāni incæ nanguī ināni wadæ godinque tōmengä miñæ ayæ tee empo godāmaī ingadānīmpa. ⁶⁷ Tōmēnāni wadæ godāni adinque Itota önompo tipæmpoga go mēa ganca ināni inānite,

—Mīnitö diyæ æbānō cæquīmīni. Mīnitö tōmēnāni bai adobaī botö imote emö cæte, Wadæ goinēmōnīpa, āmīnitawo.

⁶⁸ Añongä Timönö Pegodo wæætē,

—Awēnē, æcānō miñæ gobaīmōni. Wacä mōnitö imōnite nē emiñængä iñömō edæ dæ angampa. Wantæpiyæ wænāmaī mōni quēwenguinō ante æbānō gocæmōnīmpa, ante wæyömōni bitö iñömō nē apænebi imīpa. ⁶⁹ Bitö iñömō Wængonguī nānō da pönönōmi inte tōmengä nānō Tæiyæ Waēmō inōmi imīpa, ante pönēmōni inte eñēmōnīpa.

⁷⁰ Ante apænecä eñēnīnque Itota,

—Mīnitö önompo tipæmpoga go mēa ganca imīni inte wīi botö apænte ænōmīni imīnitawo. Incæte mīni cabo incæ adocanque iñömō wēnæ quī ingampa, ante apænegacäimpa.

⁷¹ Timönö Icadīote wengä Codaa ingantedö ante Itota mānōmaī angacäimpa. Tōmengä önompo tipæmpoga go mēnaa nāni cabo adocanque inongä incæte ayæ ate Itota ingante odōmonte nē godonguīgä inongäimpa.

7

Itota biwüidi tömengä ingante pönenämaï inäni

¹ Ayæ ate Itota Gadideabæ tömämæ wayömö wayömö gocä ingacäimpa. Oodeabæ iñömö oodeoidi awënëidi botö imote wænoncæ cædänipa, ante wædinque Itota, Oodeabæ wii goinëmopa, ante mäniömæ godämaï inongäimpa. ² Oodeoidi, Mönö wæmæidi oncontaicoo mænöninque quëwengadänipa, ante pönëninque tömënäni ææmæ oo pönï ingatimpa. ³ Itota biwüidi tömengä ingante,

—Bitö emiñænäni bitö bamönengæ cæbi acædänimpa, ante cæcæte ante bitö iñömö ongönämaï inte wæætë Oodeabæ goquënëmi imipa. ⁴ Waodäni tömänäni ayönäni cæbo edonque acædänimpa, ante cæinengä iñömö tömengä wii awëmö cæcampa. Bitö mänii cædinö do cæbi inte waodäni tömänäni bitö imite edonque pönï acædänimpa, ante odömonte cæe, ämönipa.

⁵ Edæ tömengä biwüidi incæ tömengä ingante pönenämaï inäni inönänimpa. ⁶ Mänömaï beyæ Itota tömënäni inänite,

—Botö wii ñowo goquënëmo imopa. Minitö guiquënë æyedëmë gomini incæ cöwë waa impa. ⁷ Inguipogaque quëwënäni minitö iminite ædö cæte piinte badäni. Wæætë botö tömënäni inänite, Minitö wënæ wënæ cæmini iminipa, ante apænebo beyæ tömënäni botö imo piinänipa. ⁸ Minitö ææmæ cædäni weca æite goedäni. Botö goquiönæ wii eyepæ impa, ante pönëninque botö ayæ mänimæ cædäni weca godämaï imopa.

9 Mäninö äninque tömengä godömenque Gadide-abæ ongonte quëwengacäimpa.

Itota nāni ææmæ cæyömö gote pongacäimpa

10 Incæte tömengä biwīdi ææmæ ante godāni ate tömengä adobaī godinque wīi waodāni nāni ayömö gocampa. Wæætē awēmö gocantapa. 11 Ayæ nāni ææmæ cæyömö oodeoidi awënēidi iñömö,

—Māningä onguīñængä æyömönö ingää, ante tömengä ingante ante diqui diqui minte wææ wänönānitapa.

12 Tæiyæñāni ponte a ongönāni godongämæ nāmā tededinque tömengä ingantedö ante wæntæ wæntæ tededānitapa. Pancadāniya, “Tömengä waa cæcä ingampa.” Añönāni wadāni iñömö, “Baa, māningä waodāni inānite wapiticæ mäödinque, Oda cæquinānimpa, ante cæcä ingampa,” ante apænedönānimpa.

13 Oodeoidi awënēidi ināni adinque guīñente wædinque wadāni tömānāni tömengä ingantedö ante waodāni eññönāni apænedāmaī inönānimpa.

14 Tömēnāni ææmæ do cæyedē Itota iñömö Wængonguī oncö ñænæncönē yabæcönē æite pö guīdinque waodāni inānite mä odömonte apænecä eñngadānimpa. 15 Tömengä odömonte apænecä eññenique oodeoidi ancai guīñenique,

—Æbānō cæte nanguī eñngä ingää. Edæ tömengä ecoeda adāmaī inongä ingampa.

16 Añönāni Itota wæætē,

—Botö odömonte apænedö ante wīi nāmā pönēninque odömonte apænebo imopa. Wæætē Wængonguī botö imote nē da pönongaingä nānō angainö ante odömonte apænebopa. 17 Minitö,

Wængonguï nänö angainö ante Itota odömonte apæñecampa, ante pönëminitawo. Wæætë, Nämä pönëninque Itota odömonte apæñecampa, ante pönëminitawo. Ìñæmpa waocä, Wængonguï nänö ämaï cæcæboimpa, ante æcänö änaa tömengä ìñömö, Æcänö angä ëñëninque Itota odömonte apæñecää, ante do ëñencæcäimpa. ¹⁸ Në nämä pönëninque apæñecä ìñömö tömengä nämä ante, Botö ìmo waa acædänimpa, ante aïñente apæñecä ingampa. Wæætë edæ, Botö ìmo në da pönongainque ingante waa acædänimpa, ante në aïñente cæcä ìñömö tömengä edæ në nö cæte quëwëngä ingampa. Adocä, Waodäni oda cæquïñänimpa, ante tömëñäni ìñänite wïi wapiticæ mäocä ingampa, ante Itota apæñecantapa. ¹⁹ Ayæ apæñedinque, “Wængonguï nänö wææ angainö ante Möitee wodi wïi minitö beyæ ante yewæmongacäi. Incæte minitö tömämïni Wængonguï nänö wææ angainö adinque ëñente cædämaï ìminipa töö. Minitö quïñante botö ìmote, Wænöinëmönimpa, ante pönëninque cæminii.”

²⁰ Ante awëñëidi ìñänite äñongante nanguï ìñäni adoyömö ongönäni wæætë,

—Bitö wënæ tönö cæbi ìmipææ, ante tömengä ingante äñinque, Bitö ìmite æcänö wænöinente cæcää.

²¹ Ante äñäni ëñëninque Itota godömenque tömëñäni ìñänite,

—Guëmanguïönæ ìñonte botö adopoque bamönengæ cæbo adinque minitö tömämïni ancai guññente wæminipa edæ. ²² Möitee wodi ìñömö, Minitö wëñængä ëñacä ate öñompo æmæmpoque go mëönaa go adoönæque ìñonte mäniönæ tömengä yabæque ëö togæncæminimpa,

ante mīnitō īmīnite odōmonte apænegacāimpa. Wīi Mōitee wodi mǎnōmaī mā cēcā ingacāimpa. Wæætē wēēnēñedē incæ mīnitō wæmæidi do adodō cægadānimpa. Incæte Mōitee wodi, Māniōnæ iñonte eō togæncæmīnimpa, ante pōnō angā beyænque mīnitō guēmanguiōnæ ī incæte mīnitō wēñængā onguiñængā ingante eō togæmīni īmīnipa tōō. ²³ Mōitee wodi nānō wæe yewæmongainō wido cædāmaī ingæimpa, ante cædinque mīnitō guēmanguiōnæ iñonte edæ wēñængā onguiñængā ingante do eō togæmīnipa. Incæte edæ guēmanguiōnæ iñonte botō wēnæ wēnæ īningā ingante āmo ate tōmengā baō tōmāñō waa bacā beyænque quīnante botō īmote pīimīni īmīni. ²⁴ Waocā wabānō nānō cædi wēnæ wēnæ ī, ante pōnēninque ædæmō ēñēnāmaī īmīni inte mīnitō tōmengā ingā, Bitō wēnæ wēnæ cæbi īmīpa, ante apænte ānāmaī īedāni. Wæætē, Æbānō ī, ante ædæmō ēñēninque nōingā ante ancæmīnimpa, ante Itota mǎnōmaī apænegacāimpa.

Itota iñōmō Codito mōnō nē Ponguingā ingampa

²⁵ Mǎnōmaī beyæ Eedotadēē quēwēnāni pancadāniya,

—Māningā ingante wænōmōni wæncæcāimpa, ante awēnēidi wīi ānānitawo, ante māniñedē tæcæ tedewēnānitapa. ²⁶ Aedāni, tōmengā iñōmō edonque pōni a ongōninque waodāni īnānite apæneyongā incæ mōnō awēnēidi tōmengā ingante ānāmaī pæ wēēnete īnānipa tōō. Tōmēnāni wabānō, Māningā iñōmō nāwangā Codito mōnō ānongā ingampa, ante pōnēnānitawo. ²⁷ Īñæmpa, Māningā onguiñængā æyōmōnō quēwēnte pongā

ingää, ante do eñemöpa. Mönö Codito, Nē Ponguingä, ante nāni angaingä iñömö æyömönö quēwente pongää, ante mönö waocabo tömämö incæ eñenāmai inguimö imompa, änānitapa.

²⁸ Ayæ Itota Wængonguī oncö ñænæncönē yabæcönē odömonte apænedinque aa pecantapa.

—Ao, Botö æbodö imoo, ante mīnitö eñemīnyaa. Ayæ botö, Æyömönö quēwente pömoo, ante mīnitö adobai eñemīnyaa. Botö wīi nāmā pönēninque pontabopa. Botö imote nē da pönongaingä nāwangä inongä ingampa. Mīnitö, Tömengä æbänö ingää, ante eñenāmai imīnīpa töö. ²⁹ Botö wæætē edæ tömengä weca quēwēmo iñömote tömengä botö imote da pönongä pönimo inte edæ botö iñömö edæ tömengä ingante do agaimo inömo imopa, angacäimpa.

³⁰ Mäninö angä eñēninque tömēnāni, Quinö cæte tömengä ingante bæi ongonguimönimpa, ante pönengädänimpa. Incæte tömengä nänö wænguionæ wīi eyepæ i beyæ tömengä ingante ö ænāmai ingädänimpa. ³¹ Tæiyænāni adoyömö pö ongönāni weca ongöninque nanguī ināni tömengä ingante wede pönēnānitapa. Tömēnāni,

—Mäningä onguinængä iñömö nanguī bamönengæ cæcä inongäimpa. Mönö Codito iñömö tömengä pongä ate godömenque bamönengæ cæquingä ingantawogaa.

Itota ingante bæi ongoncæte ante cædāni

³² Tæiyænāni mäninö mö ongönāni iñömö Itota ingantedö ante mänömainö ante wæntæ wæntæ tedeyönāni Paditeoidi eñenānitapa. Ayæ, Wængonguī qui, ante nē godönāni ñænænāni

tönö Paditeoidi iñömö Wængongui oncö ñænæncö wææ wänönäni inänite, Minitö goedäni. Tömengä weca godinque tömengä ingante bæi ongonte ænte pöedäni, änänitapa. ³³ Itota godömenque apænedinque,

—Minitö weca wantæyö quëwëninque botö ayæ ate botö imote nê da pönongaingä weca ocæ ëmænte gocæboimpa. ³⁴ Botö ocæ ëmænte gobo ate mīnitö botö imote ante diqui diqui mīmīni incæte adāmaī inguīmīni imīnīpa. Ayæ botö go quëwëñömö mīnitö adoyömö ædö cæte ponguīmīni imīnīi.

³⁵ Angä ëñëninque oodeoidi awënëidi nāmanque tededänitapa.

—Mänīngä, Gocæboimpa, ante ædönö goyongante mōnitö diqui diqui mīninque adāmaī inguīmōni imōnīi. Tömengä, Edæ mōnö guidēnāni do panguīmæ godinque guidiegoidi weca wayömö wayömö nāni quëwëñömö tömengä wabānö goquīngää. Ayæ guidiegoidi māññömö quëwënāni inänite odömōnte apænebo ëñencædānimpa, ante apænequīngää. ³⁶ Tömengä iñæmpa, “Botö imote ante diqui diqui mīmīni incæte mīnitö botö imote adāmaī inguīmīni imīnīpa, angampa töö. Ayæ, Botö go quëwëñömö mīnitö adoyömö dicæ ponguīmīniyaa,” ante māññö ante æbānö ante apænecantawo, angadānimpa.

Waëmö æpæ tayömö ta gopæ mōnö quëwenguīmæ impa

³⁷ Ayæ tömēnāni nāni ææmæ iinque cæönæ iñonte, Ñænæ ææmæ impa, ante godömenque nangui cæyönāni Itota iñömö ængæ gantidinque yedæ yedæ tedecantapa.

—Nē gæwænte wæcä iñömö tömengä botö weca poncæcäimpa. Ayæ botö tönö godongämæ becæcäimpa. ³⁸ Æcämenque botö imote nē wede pönengä iñömö tömengä quëwenguimæ ænte entawencæcäimpa. Ayæ waëmö æpæ tayömö ta gote cægömæ bai tömengä adobai tömengä nänö entawënö godonte bai cædinque, Wadäni bete bai quëwencædänimpa, ante godö cæcæcäimpa. Wængongui angä eñente nani yewæmongainö bai ante mänömainö ante impa.

³⁹ Mänömainö ante Itota iñömö, Botö imote nē wede pönänani inte ayæ ate Wængongui Önöwoca ingante ænte entawenguinani inänipa, ante pönëninque mäningä Wængongui Önöwoca ingantedö ante apænecäcäimpa. Edæ Itota ayæ wænämai inte öönädë ocæ emænte æidämai nänö iñedë Wængongui iñömö Tæiyæ Waëmö Önöwoca ingante ayæ da pönönämai inongäimpa.

Wadäni wæætë godö wæætë godö nani anewënö

⁴⁰ Mäninö nänö änö eñëninque wadäni pancadäniya,

—Näwangä impa. Mäningä iñömö, Wængongui beyæ nē apænecä nē Ponguingä, ante nani angaingä adocä inongä ingampa.

⁴¹ Ante añönäni wadäni guiquënë,

—Mönö Codito nē Ponguingä, ante nani angaingä mäningä ingampa.

Änani eñëninque wæætë wadäni,

—Mönö Codito ædö cæte Gadideabæ quëwente pongä ingää, änänitapa. ⁴² Iñæmpa mönö Codito iñömö Awënë Dabii pæingä inguingäimpa. Ayæ Bedë Dabii nänö quëwengaiñömö adoyömö

ẽñaquingä ingampa, ante Wængonguĩ angä ẽñente nãni yewæmongainö ongö adãmai ìmĩnitawo.

⁴³ Angä ẽñëninque waodãni, Itota æcãnö ingää, ante mãnõmai wadö wadö ante pönente tedewengadãnimpa. ⁴⁴ Pancadãniya, Tömengä ingante bæi ongöinëmõnipa, änãni incæte tömengä ingante bæi ongonte ænãmai ingadãnimpa.

Awënëidi Itota ingante pönënamaĩ inönãni

⁴⁵ Wængonguĩ oncö tæiyæ waëmö oncönë wææ wãnönãni iñömö, Wængonguĩ quĩ, ante në godönãni ñænænãni tönö Paditeoidi weca ocæ emænte pönãnipa. Ocæ emænte pönãni adinque tömënãni,

—Quĩnante tömengä ingante ænte pönãmai ìmĩni.

⁴⁶ Ante añönãni wææ wãnönãni wæætë,

—Mãningä onguĩñængä waa apænecã bai æcãnö adobaĩ tedecã iñömö edæ dæ angampa.

⁴⁷ Änãni ẽñëninque Paditeoidi guiquënë,

—Tömengä mĩnitö ìmĩnite adobaĩ wapiticæ mäocã oda cæte gobaimĩni bamĩnitawo. ⁴⁸ Äninque tömënãni godömenge, Awënëidi incæ Paditeoidi incæ adocanque tömengä ingante pönengä ingantawogaa. ⁴⁹ Nanguĩ inãni iñömö ongönãni guiquënë tömënãni në önönãnique inte Wængonguĩ nãnö wææ angainö ante ẽñënamaĩ inãni inte tömengä ingante pönënãni inãnipa. Mãnõmai beyæ tömënãni Wængonguĩ nãnö pangaimãmo ante wæquĩnãni inãnipa.

⁵⁰ Niicodemö iñömö wëenëñedë Itota weca në godingä adobaĩ tömënãni bai Paditeocã inongä inte apænecantapa.

⁵¹ —Waocã, Æbãnö cæboo, ante nãmä beyæ wææ änãmai iñongante mönö, Tömengä ingante

pangæimpa, ante ædö cæte apænte anguii. Edæ, Wææ änāmaï iñongante pangæimpa, ante dicæ wææ yewæmongadāniñaa.

⁵² Ante añongä tōmēnāni,

—Bitō adobaï Gadideabæ quēwente ponte baï tede bipææ. Wængonguï beyæ nāni yewæmongainta ae. Adinque bitō, Wængonguï beyæ nē apæ necä wii Gadideabæ quēwente pongä ingampa, ante do eñencæbiimpa, ante angadānimpa.

Onquiyængä nänö towēnō

⁵³ Mäninō änāni ate tōmānāni oncōnē ocæ emænte gogadānimpa.

8

¹ Itota guiquēnē Odibowænquidi nāni anquidi gocantapa. ² Iimō ate ñäö bayedē tōmengä Wængonguï oncō ñænæncōnē yabæcōnē wæætē pō guicä adinque waodāni tōmānāni tōmengä nänö ongōñömō goto pōnāni adinque Itota tōmēnāni inānite odōmonte apæ necæte ante tæ contacantapa.

³ Mäniñedē onquiyængä adocanque tōmengä nänöogængä ināmaï iñongante wacä onguïñængä tōnō tæcæ godō guëa mongä adāni ate nē odōmōnāni tōnō Paditeoidi iñömō mäningä onquiyængä ingante ænte pōnānitapa. Tōmengä ingante tæcæguedē gö cædāni ongōñongä ⁴tōmēnāni Itota ingante,

—Awēnē nē Odōmōmi imi, iingä onquiyængä iñömō wacä ingante tæcæ godō guëa mongä adāni wæmōnipa. ⁵ Wængonguï nänö angainō ante Möitee wodi iimāi ante wææ yewæmongacäimpa.

Onquiyænäni mäningä onquiyængä bai cädäni
iñönänite mīnitō tōmēnāni inänite dicaca tacamīni
wæncädänimpa. Bitō guiquēnē quīnō ämii.

⁶ Mäninō ante tōmēnāni iñōmō, Æbänō
apænecää, äninque, Wabänō pancadea wapiticæ
tedecæcäimpa, ante cädänitapa. Edæ wapiticæ
tedecä ininque mōnitō, Adocä wēnæ wēnæ cæcä
ingampa, ante ancæmōnimpa, ante cädänitapa.
Itota guiquēnē ædæ wæænīnque onguipoga
tōmengä önongompoga yewæmongacäimpa.

⁷ Tōmēnāni godōmenque tōmengä ingante eñencæte
ante añönāni Itota ængæ gantite tōmēnāni inänite,

—Mīnitō weca adocanque ongōnīnque nē
wēnæ wēnæ cädāmaī ingä ininque mäningä tāno
onquiyængä ingante, Wænguīmi, ante dicaca
tacacæcäimpa, ante angantapa.

⁸ Äninque wæætē ædæ wæænīnque onguipoga
yewæmongacäimpa. ⁹ Mäninō angä nē eñēnāni
iñōmō adocanque wadæ go wacä wadæ go wacä
wadæ go tōmānāni wadæ godānīpa. Picænāni
tāno wadæ godāni ayæ wadāni wadæ godānitapa.
Tōmānāni dæ godāni adīnque Itota adocanque
ee ongōñongä onquiyængä ayæ adoyōmō næ
gongængantapa. ¹⁰ Itota ængæ gantīdīnque

onquiyængä ingante,

—Æyōmōnō inānii. Bitō īmite apænte äninque
tacadāmaī inānitawo.

¹¹ Äñongä tōmengä wæætē,

—Awēnē, tōmānāni mānōmaī cädāmaī inānitapa.

Angä eñēnīnque Itota,

—Botō adobaī bitō īmite apænte äninque
tacadāmaī incæboimpa. Ñōwo goe ämopa. Bitō

wënæ wënæ cæte quëwënimämo ñimpo cæte waa quëwëe, angacäimpa.

Inguipoga quëwënäni beyæ Itota ñäö bai inongäimpa

¹² Ayæ Itota wæætë waodäni inänite apænedinque,

—Botö iñömö inguipoga quëwënäni beyæ ñäö bai imodö angüenë. Æcänö botö miñæ tee empo goda tömengä wëmö iñömö cöwë cægönämaï ingampa. Wæætë tömengä nänö quëwënö taadö edonque acæcäimpa, ante botö tömengä beyæ ñäö bai imopa, ante apænecantapa.

¹³ Paditeoidi guiquënë tömengä ingante,

—Bitö iñömö nämä äninque, Æbänö imoo, ante apænebi imipa töö. Mänömaï nämanque ante apænebi beyæ bitö äninö önonquedö ante impa, ämönipa, püinänitapa.

¹⁴ Itota wæætë,

—Botö iñömö nämä äninque, Æbänö imoo, ante apænebo incæ botö apænedö näwangä impa. Edæ, Botö æyömönö quëwente pömo imoo, ante ayæ, Ædönö gobo imoo, ante do ëñëmopa. Minitö guiquënë, Botö æyömönö quëwente pömoo imoo, ante ayæ, Ædönö gobo imoo, ante wüi ëñëmünipa töö. ¹⁵ Waodänique, ïimaï cæedäni, ante nani wææ ante cægai bai munitö wacä ingante apænte ämini imünipa. Botö guiquënë waodäni tömänäni inänite adinque, Æcänö waa cæcantawo, ante, Æcänö wënæ wënæ cæcantawo, ante apænte änämaï imopa. ¹⁶ Incæte botö mänömaï apænte ämo bai, Æbänö apænte ämoo, ante pönëninque tömëmo nö ante apænte ämopa. Edæ wüi botonque apænte

ämopa. Wæætē botō Mæmpo botō imote nē da pōnongaingā iñōmō tōmengā iñōmō botō tōnō godongāmæ cæcā ate apænte ämopa. ¹⁷ Mīnitō mīni wææ yewæmongaintaa iīmaī ante wææ yewæmongatimpa. Mēnaa onguĩñæna nē adīna inte tōmēna nāna adīnō ante apæneda eñēninque mīnitō wæætē, Nō impa, ante eñencæminimpa. ¹⁸ Botō iñōmō nāmā āninque, Æbānō imoo, ante apænebo imopa. Ayæ botō Mæmpo botō imote nē da pōnongaingā iñōmō tōmengā botō imotedō ante, Æbānō ingāā, ante adobaī apæneca eñencæminimpa.

¹⁹ Angā eñēninque tōmēnāni tōmengā ingante,
—Bitō Mæmpo æyōmōnō quēwengāā.

Äñōnāni Itota wæætē,
—Mīnitō iñōmō, Botō incæ æbānō imoo, ante, Botō Mæmpo incæ æbānō ingaingā ingāā, ante eñēmīni imīnitawogaa. Botō æbodō imoo, ante eñēmīni inte baī mīnitō, Botō Mæmpo æbānō ingaingā ingāā, ante adobaī eñēmīni incædōminimpa, ante apænegacāimpa.

²⁰ Itota Wængonguī oncō ñænæncōnē yabæcōnē go guidinque, Wængonguī quī, ante nāni da wencade gāānē ongonde apænedinque mānīnō ante apænegacāimpa. Incæte tōmengā nānō wænguīōnæ wīi oo pōnī i beyænque tōmengā ingante bæi ongonde ænāmaī ingadānimpā.

Itota, Botō goquĩñōmō mīnitō ædō cæte goquīmīni, angā

²¹ Itota wæætē tōmēnāni Inānite āninque,
—Botō wadæ goquīmo imopa. Gobo ate mīnitō botō imote ante diqui diqui minguīmīni imīnīpa.

Minitö wënæ wënæ cædömîni inte wæncæmînipa. Botö goquĩñömö mînitö ædö cæte ponguĩmîni, angantapa.

²² Mänînö beyæ oodeoidi awënëidi, Tömengä iñömö, Botö goquĩñömö ante mînitö ædö cæte ponguĩmîni, ante quĩnante angää. Tömengä nämä incæ, Wænguimo, ante pönëinique iimaĩ angantawo, ante änänitapa.

²³ Itota godömenque,

—Mînitö iñömö inguipoga quëwëmîni imînipa. Botö guiquënë öönædë quëwente põmo imopa. Mînitö iñömö iĩ inguipogaque nâni quëwencabo tönö adomîni imînipa. Botö guiquënë iĩ inguipogaque nâni quëwencabo tönö adobo inâmaĩ imopa. ²⁴ Mänömaĩ beyæ botö, Mînitö wënæ wënæ cædömîni inte wæncæmînipa, ante mînitö imînite apænetabopa. Botö, Æbänö imoo, ante ämo ëñëinique pönënamaĩ imîni inique mînitö wënæ wënæ cædömîni inte nö wæmaimînipa.

²⁵ Ante apæneçä ëñëinique tömënâni,

—Æbidö imitawo.

Ante añönâni Itota wæætë,

—Botö do mînitö imînite, Æbodö imoo, ante në änîmo imopa. ²⁶ Botö mînitö imînitedö ante nangui anguënëmo imopa. Mînitö imînitedö ante ämo bai mîni botö änö mîni apænte anguinqe imaimpa. Incæte botö imote në da pönongaingä iñömö tömengä nöingä inte tömengä, Quinö botö imote angää, ante botö ëñëninö ante botö adodö ante inguipoga quëwënâni inänite apænebo imopa, angantapa. ²⁷ Incæte tömënâni, Itota tömengä Mæmpo ingantedö ante mönitö imönite

apænecampa, ante eññenāmaï ingadānimpa.
²⁸ Mänōmaï beyæ Itota,

—Botö Waobo eññagaïmo iññomote mīnitö botö imote awāa timpodinque tiwadinque gö cæmīni wægöññomo mīnitö māññedē edæ, Botö æbodö imoo, ante eññencæmīnimpa. Ayæ botö nāmā pönēninque cædāmaï imopa. Wæætē Wæmpo nānō odōmonte apænedö ante botö imote apæneca botö eññenīnō ante adodö ante apænebopa, ante mīnitö adobaï māññedē eññencæmīnimpa. ²⁹ Botö imote nē da pönongaingā botö imote emö cædāmaï inte cōwē botö tōnō godongāmæ ongongā ingampa. Edæ botö cōwē, Æbānō cæbo ate tōmengā waa aquingāā, ante cæbopa, ante Itota apænegacāimpa.

³⁰ Mänīnō añongā nanguï ināni iññomö tōmengā ingante pönengadānimpa.

Wēncæ beyænque nē cædāni

³¹ Oodeoidi pancadāniya nē pönēnāni iññōnānite Itota iññomö,

—Mīnitö cōwē botö odōmonte apænedīnō baï cæmīni īinque botö mīñæ nō gomīni īmaimīnīpa. ³² Ayæ botö ānō nōinō impa, ante eññencæmīnimpa. Mänīnō nō botö ānō beyænque mīnitö ñimpo cæte quēwencæmīnimpa.

³³ Ante añongā tōmēnāni wæætē,

—Mōnitö iññomö Abadāö nānō pæimōni imōni inte mōnitö cōwē waocā æcāmenque beyænque nē cæmōni ināmaï intamōnīpa tōö. Bitö iññomö, Wacā beyænque mīnitö godōmenque cædāmaï inte ñimpo cæte quēwencæmīnimpa, ante ædö cæte āmīi.

³⁴ Aññōnāni Itota wæætē,

Minitö iminite näwangä ämopa. Nē wēnæ wēnæ cæcä iñömö tömengä wacä beyænque cæte nē quēwengä bai wædongä inte edæ tömengä nänö wēnæ wēnæ cægainonque ante cædinque ædö cæte aamö cæte goqingää. ³⁵ Wacä beyænque cæte nē quēwengä iñömö tömengä awēnē nāni wencabo tönö wii cōwē godongämæ quēwengä ingampa. Awēnē wengä guiquēnē tömengä mæmpo tönö nāna wencaya ina beyænque tömengä awēnē tönö cōwē guëa quēwengä ingampa. ³⁶ Mänömai beyæ Wængongui Wengä minitö iminite ñimpo cæcä inique minitö nö ñimpo cæte quēwēnque wacä beyænque nē cæcä bai ināmai inte quēwenguimīni imaīmīnipa. ³⁷ Minitö iñömö Abadäö nänö pæimīni imīnipa, ante do eñēmopa. Incæte botö änö ante mimōnē entawēnāmai quēwēmīni beyæ minitö botö imote, Wænömōni wæncæcäimpa, ante pönēmīni imīnipa. ³⁸ Botö iñömö botö Mæmpo weca tömēmo adinö ante minitö iminite apænebo imopa. Minitö guiquēnē mīni mæmpo nänö angainö mīni eñēninö ante cæmīni imīnipa.

³⁹ Ante apæneyongä tömēnāni wæætē,

—Abadäö mönö docä mæmpo ingaingä ingampa.

Änāni eñēnque Itota,

—Minitö nö Abadäö wēmīni inte bai minitö tömengä nänö cægainö bai adobai cæcædōmīnipa töö. ⁴⁰ Nōwo iñæmpa botö, Wængongui näwangä nänö angainö ante botö eñēninö ante minitö iminite nē apænebo iñömote minitö, Mōnitö æbänö cæte wænömōni wænguingää, ante pönēmīni imīnipa. Abadäö mänii mīni cægai bai cædāmai ingacäimpa.

⁴¹ Mīnitō iñōmō tōmēmīni mæmpo nānō cægai bai adobai cædōmīni imīni awædō.

 Äñongante tōmēnāni,

 –Mōnitō wīi wegōwæ wēmōni imōnipa tōō. Wængonguī incæ tōmengä adocanque mōnitō Mæmpo inongäimpa.

⁴² Änāni eñēnīnque Itota tōmēnāni inānite,

 –Wængonguī nāwangä mīnitō Wæmpocä ingä bai mīnitō botō imote waadete pōnencædōmīnīmpa. Edæ botō Wængonguī weca quēwente mīnitō weca ñōwo wææ pontabopa. Botō wīi nāmā pōnēnīnque pontabopa. Wæætē tōmengä botō imote da pōnongä pongäimo imopa. ⁴³ Mīnitō imīnite botō quīnō apæneboo, ante mīnitō quīnante eñēnāmaī imīnī. Edæ botō änō ante, Quīnō apæneboo, ante mīnitō babetamō ināni bai inōmīni inte ædō cæte eñēnguīmīnī. ⁴⁴ Wēnæ iñōmō mīnitō mæmpo inongäimpa. Ayæ mīnitō mæmpo nānō cæinēwēnō ante mīnitō adodō ante, Mōnitō cæinēmōnipa, ante cæmīnipa. Wēēnēñedē inguipoga mā badōñedē tōmengä, Botō wænonguīmo, ante do entawengä ingacäimpa. Tōmengä, Quīnō nāwangä impa, ante cōwē änāmaī ingampa. Ayæ edæ, Quīnō änō nōinō impa, ante tōmengä entawēnāmaī inongäimpa. Adocä babæ tededīnque tōmengä babæ nānō entawēnonque ante tedewengä ingampa. Edæ tōmengä nē babæ ämongä ingampa. Ayæ tōmengä iñōmō mā babæ angaingä ingampa. ⁴⁵ Incæte botō nāwangä ämo beyænque mīnitō botō änō ante pōnēnāmaī imīnipa tōō. ⁴⁶ Mīnitō weca ongongä iñōmō æcāmenque incæ botō imote apænte änīnque, Bitō wēnæ wēnæ cæbi imīpa, ante, Nāwangä impa, ante odōmōnatawogaa. Botō nāwangä ämo bai

mīnitō quīnante botō angainō ante pōnēnāmaī
 imīnīpa. ⁴⁷ Wængonguī wēnāni nē inōnāni iñōmō
 Wængonguī nānō angainō ante ēñēnāni inānīpa.
 Mīnitō guiquēnē tōmengā wēmīni ināmaī imīni
 beyæ, Tōmengā quīnō angāā, ante ēñēnāmaī
 imīnīpa, ante Itota apænegacāimpa.

*Abadäo ayæ ēñadāmaī iñedē mönō Codito do in-
 gaingä*

⁴⁸ Oodeoidi wæætē tōmengā ingante,

—Bitō Tāmadiabæ quēwēmi imipææ. Ayæ wēnæ
 tōnō cæbi imipææ, ante wīi nāwangā ämöni in-
 tamōnii.

⁴⁹ Ante pūināni ēñēnīnque Itota wæætē
 apænedīnque,

—Botō wīi wēnæ tōnō cædōmo imopa. Wæætē
 botō iñōmō, Botō Mæmpo ingante waa acæboimpa,
 ante cæbo imopa. Mīnitō guiquēnē botō imote
 waa adāmaī imīnīpa tōō. ⁵⁰ Waodāni, Bitō waēmō
 imīpa, ante botō imote apænecædānīpa, ante
 botō cædāmaī imopa. Wæætē wacā iñōmō,
 Waodāni bitō imite apænedīnque, Waēmō imīpa,
 ante apænecædānīpa, ante nē cæcā ingampa.
 Māningā nē apænte ānongā ingampa. ⁵¹ Mīnitō
 imīnite nāwangā ämopa. Botō angainō ante nē
 ēñēnte cæcā tōmengā iñōmō wantæpiyæ wænāmaī
 quēwencæcāimpa, angantapa.

⁵² Ante apænecā ēñēnīnque oodeoidi,

—Bitō wēnæ tōnō cæbi imīpa, ante ñōwo
 ædæmō ēñēmōnīpa. Abadäo wodi iñæmpa
 do wængacāimpa. Ayæ Wængonguī beyæ nē
 apænedāni adobaī do wængadānīpa. Incæte
 bitō, “Botō angainō ante nē ēñēnte cæcā tōmengā

iñömö wantæpiyæ wænāmaï quëwencæcäimpa, ante apænebi töö.”⁵³ Mönö docä mämpo Abadäo wodi ñænængä inte cægaingä incæte bitö iñömö edæ, Abadäo wædangä iñongante botö iñömö godömenque ñænæmo inte cædömo ïmopa, ämitawo. Tömengä iñömö edæ do wængacäimpa. Ayæ Wængongui beyæ nē apænedäni adobaï do wængadäni apa änewëe. Bitö nämä äninque, Æcämē bai ïmoo, ante ämi.

⁵⁴ Äñönäni Itota wæætē,

—Botö nämä äninque, Waodäni, Bitö waëmö ïmipa, ante botö ïmote apænecædänimpa, ante eñëinente wæbo bai waodäni botö ïmote näni waa apænedö wæætē önonquedö ante incædönimpa. Botö Mämpo incæ mïnitö, Mönö Wængongui ingampa, ante mïni änongä guiquënë tömengä iñömö, Bitö waëmö ïmipa, ante botö ïmote pönö apænecaä apa quëwëminii.⁵⁵ Mïnitö tömengä ingante wii adinque pönënāmaï ïmïnipa töö. Botö guiquënë tömengä ingante do agaïmo inte pönëmo ïmopa. Botö tömengä ingante adāmaï ïmopa, ante bai botö mïnitö bai babæ ante ancædömoimpa. Wæætē tömengä ingante do adinque nē pönengaïmo inte botö iñömö edæ tömengä nänö angainö bai nē cæbo ïmopa.⁵⁶ Inguipoga botö ponguïönæ ante mïnitö docä mämpo Abadäo wodi incæ, Codito ponguïönæ pongä acæboimpa, ante pönëninque do edæ watapæ togacäimpa. Ìninque tömengä mäniönæ Codito nänö ponguïönæ adinque godömenque togacäimpa, ante Itota apænecantapa.

⁵⁷ Oodeoidi tömengä ingante,

—Bitö eñagai iñömö tincoenta wadepo inämaï i incæte bitö ædö cæte, Botö Abadäo ingante atabopa, ante ämii.

⁵⁸ Ante püññönäni Itota wæætë,

—Minitö iminite näwangä ämopa. Abadäo wodi ayæ eñadämaï iñedë botö iñömö edæ do quëwëmo ingaïmo imopa, ante apænecantapa.

⁵⁹ Mäninö ante apænecä eñëninque tömënäni iñömö tömengä ingante dicaca tacacæte ante cædinque dicacoo wææmpo ænänitapa. Incæte Itota wë womöninque Wængongui oncö ñænæncodo tao wadæ gogacäimpa.

9

Babetamö eñagaingä incæ waa bamonte acampa

¹ Itota gomonga godinque onguïñængä babetamö eñagaingä ingante acantapa. ² Tömengä emiñænäni iñömö tömengä ingante,

—Awënë në Odömömi imi, mäningä onguïñængä incæ tömengä mæmpoda incæ æcänö wënæ wënæ cæda beyæ tömengä babetamö eñacantawo, ante eñencæte ante änänitapa.

³ Itota tömënäni inänite,

—Iingä onguïñængä incæ tömengä mæmpoda incæ tömänäni wënæ wënæ cædämaï inänitapa. Wæætë tömengä babetamö eñagaingä inte quëwëñongante Wængongui nänö cædö iñömö edonque pönï acäimpa, ante mäningä mänömaï ingacäimpa. ⁴ Iñänäni eñëedäni. Botö imote në da pönongaingä tömengä nänö cædö ante mönö müi quëwenganca mönö cæquënëmö imopa. Mönö wænguiönæ iñonte mönö ædö cæte ayæ cæquïmöö.

⁵ Botö inguipoga quëwëñedë botö inguipoga quëwënäni beyæ ñäö bai ñömo ñmopa.

⁶ Mäninö ante äninque Itota onguipoga towæ tänöningue wëä wëä gopodique aquimæ bayonte æninque babetamongä awinca öni öni pæmongantapa. ⁷ Ayæ tömengä ingante,

—Goe. Gäwapæ Tidoe nani ämæ godinque bitö awinca ñäö mëmöe, ämopa, angantapa. Tidoepæ nani ämæ ññömö mönö tededö, Da godömæ, ante impa.

Angä ëñente godinque onguïñængä ñä mëmöningue tömengä oncönë ocæ ëmænte pöningue do acä ingacäimpa. ⁸ Tömengä mänömaï do acä inte pongä adinque godongämæ quëwënäni tönö wëenëñedë tömengä, Pönömi æmoe, añongante në adinäni tönö,

—Æ, ñngä onguïñængä diyæ, Pönömini æmoedäni, ante në äncöningä wïi adocä ingantawo.

⁹ Änäni ëñëningue pancadäniya,

—Mäningä ingampa, änänitapa.

Wadäni guiqüënë,

—Wïi tömengä ingä, önonque tömengä nänö ëmö bai ëmönongä ingampa.

Ante tedeyönäni onguïñængä tömenganque,

—Botö mänimodö ñömo ñmopa, angantapa.

¹⁰ Ayæ tömënäni,

—Æbänö cæte bitö waa bamonte abii.

¹¹ Äñönäni tömengä wæætë,

—Onguïñængä ññömö tömengä ëmöwo Itota ññömö onguipoga towæ tänöningue wëä wëä gopodique aquimæ bayonte æninque botö

awinca öni öni pæmongantapa. Ayæ botö imote, “Goe. Gäwapæ Tidoepæ nāni ämæ godinque bitö awinca ñā mēmōe” angantapa. Angä eñëninque botö wadæ gote ñā mēmōninque do waa bamonte abopa, angantapa.

¹² Tömënāni tömengä ingante,

—İingä onguĩñængä bitö änongä iñömö æyömönö ingää.

Ante aññönāni tömengä wæætë,

—Botö eñënāmaĩ imopa, angacäimpa.

Babetamö iningä ingante Paditeoidi ancaa änāni

¹³ Ayæ Paditeoidi weca onguĩñængä nē babetamö eñagaingä ingante ænte māmönāni pongantapa. ¹⁴ Itota mänĩĩ aquimæ badōninque babetamö iningä awinca wi æmonte bai nānō cæönæ iñömö oodeoidi guëmanguiönæ inönimpa.

¹⁵ Mänōmaĩ beyæ Paditeoidi iñömö adobai eñencæte ante babetamö iningä ingante edæ, Æbānō cæte bitö waa bamonte abii, ante aññönāni tömengä wæætë,

—Māningä iñömö aquimæ æninque botö awinca öni öni pæmongantapa. Ayæ botö tömëmo awinca ñā mēmōninque ñōwo waa bamōmo inte abopa, angantapa.

¹⁶ Paditeoidi pancadāniya,

—İingä onguĩñængä iñömö wĩĩ Wængonguĩ weca quëwente pongä ingampa. Edæ tömengä mönō guëmanguiönæ iñonte guëmānāmaĩ inte do cæcampa, änānitapa.

Wadāni guiquënë,

—İñæmpa waocä nē wēnæ wēnæ cæcä inongä inte ædö cæte mänömaï, Acæminimpa, ante mä cæquingää, änänitapa.

İninqe tömēnāni wadö wadö ante pönente tedewengadänimpa. ¹⁷ Ayæ tömēnāni wæætē babetamö iningä ingante,

—Tömengä cæcä ate bitö waa abi inte bitö edæ tömengä ingantedö ante quinö ämii.

Ante äñönāni onguĩñængä wæætē,

—Tömengä Wængonguĩ beyæ nē apæ necä ingampa, angantapa.

¹⁸ Babetamö iningä iñömö, Waa bamömo imopa, ante apæ necä eñēninqe oodeoidi awēnēidi ayæ pönēnāmaï inänitapa töö. Tömengä mæmpoda inate aa pedāni ponte apæ neda ate māniñedē pönēnānitapa. ¹⁹ Tömēnāni tömēna inate,

—İngä onguĩñængä edæ minatö wengä ingantawo. Māningä nē babetamö eñagaingä minatö änongä adocä ingantawo. Æbänö cæte tömengä ñöwo waa bamonte acäi.

²⁰ Ante äñönāni tömengä mæmpoda wæætē, Nē babetamö eñagaingä iñömö tömengä mönatö wengä ingampa, ante eñēmönapa. ²¹ Incæte mönatö, Æbänö cæte tömengä ñöwo waa bamonte acää, ante, Æcänö tömengä awinca wi æmonte bai cæcää, ante eñēnāmaï imönapa. Minitö tömengä ingante eñencæte ante äedāni. Tömengä do picængä ingampa. Tömenganque apæ necä eñencæminimpa, änatapa.

²² Tömengä mæmpoda oodeoidi awēnēidi inänite guĩñēninqe mäninö ante apæ nedatapa. Edæ oodeoidi awēnēidi iïmaï ante do apæ nedönänimpa.

Æcänö Itota ingante Ao ante, Mönö Codito ingampa, äna eñëinque edæ, Mönitö odömöincönë ongönämaï incæbiimpa, ante tömengä ingante da tadömöni tao gocæcäimpa, ante godongämæ pönente apænedönänimpa. ²³ Mänömaï beyæ tömengä mæmpoda, “Tömengä do picængä ingampa. Minitö tömengä ingante eñencæte ante äedäni,” angadaimpa.

²⁴ Onguiñængä në babetamö ìningä ingante wæætë aa pedäni pongä ate tömengä ingante,

—Bitö Wængongui eñëñongä näwangä ante apænee, ämönipa. Edæ ìngä onguiñængä mäninö në cædingä wënæ wënæ cæcä ingampa, ante edæ do amönipa.

²⁵ Ante püñönäni tömengä wæætë,

—Mäningä wënæ wënæ cæcä incæ wüi wënæ wënæ cæcä incæ botö eñënämaï ìmopa. Botö babetamömo ìnimo incæ ñöwo waa bamonte abopa. Mäinque eñëmo ìmopa.

²⁶ Ante apænecä eñëinque tömënäni tömengä ingante,

—Tömengä ìñömö bitö ìmite æbänö cæcantawo. Æbänö cæte bitö waa bamonte abii, änänitapa.

²⁷ Tömengä wæætë,

—Minitö ìminite do antabopa. Botö äñömote minitö eñënämaï ìmìnipa töö. Quinante wæætë adodö ante eñëinëminii. Minitö adobai, Mönitö tömengä ëmiñæmöni baquimöni, ante äminitawo, ante angantapa.

²⁸ Ayæ tömënäni tömengä ingante pünte wënæ wënæ badete toduinque,

—Bitö mäningä ëmiñæmi ìmipa töö. Mönitö guiquënë Möitee ëmiñæmöni ìmöni apa quëwëmi,

änänitapa. ²⁹ Wængonguï Möitee ingante apænegacäimpa, ante do eñëmönipa. Ìngä guiquënë æyömönö quëwente pongää, ante eñënämaï ìmönipa.

³⁰ Äñönäni onguïñængä wæætë,

—Mäninö minitö äninö wiwa impa äminii. Tömengä pönö cæcä waa bamonte abo incæte tömengä æyömönö quëwente pongää, ante minitö eñënämaï ìminipa. ³¹ Në wënæ wënæ cædäni iñömö Wængonguï ingante apæneyönäni tömengä tömënäni inänite eñënämaï ingampa, ante do eñëmompa. Wæætë Wængonguï ingante, Bitö adobique mönö Wængonguï imidö anguënë, ante në apænecä iñömö tömengä Wængonguï nänö angainö në eñente cædongä inte apæneyongante Wængonguï tömengä ingante eñencæcäimpa.

³² Waocä në babetamö eñagaingä iñongante wacä tömengä awinca wi æmonte bai cæcä ante æyedëmenque incæ inguipoga quëwënäni dicæ änäni eñënänitawogaa. ³³ Ìngä onguïñængä iñömö wiï Wængonguï nänö da pönongä pongaingä inte bai tömengä tömänö cædämaï incædongäimpa, angantapa.

³⁴ Mäninö angä eñëninque tömënäni wæætë,

Bitö eñagaïñedë do wënæ wënæ cæte eñagaïmi ìmipa. Incæte bitö mönitö ìmönite ædö cæte, Eñencæminimpa, ante odömonte apænebi ìmipa töö.

Änäni ìninque tömënäni, Bitö mönitö odömöincönë ongönämaï tao gobäwe, ante tömengä ingante da tadönäni tao gogacäimpa.

Në babetamö bai inäni inänite ante Itota apænecampa

³⁵ Tömënäni tömengä ingante da tadönänipa, ante tededäni eñëninque Itota tömengä ingante ante diqui diqui minte gote adinque.

—Bitö Waocä nê eñagaingä ingante pönëmitawo.

³⁶ Angä eñëninque onguĩñængä,

—Awënê, mäningä æcänö ïnaa. Botö tömengä ingante pönencæboimpa, ante apænebi eñëmoe.

³⁷ Ante añongä Itota wæætê,

Bitö tömengä ingante do abitapa. Ayæ bitö ïmite nê apænebo ïñömö tömëmo ïmopa.

³⁸ Angä eñëninque onguĩñængä,

—Awënê, botö wede pönëmo ïmopa. Ayæ, Bitö Wængonguĩ Wëmi ïmidö anguënê, ante tömengä Itota weca ædæ wææninque apænecantapa.

³⁹ Itota ïñömö edæ,

—Botö, Inguipoga quëwënäni æbänö cædänii, ante apænte ancæte ante pöninque ïimaĩ cæbopa. Botö nê babetamönäni bai ïnäni waa bacædänimpa, ante cædinque pontabopa. Ayæ wæætê, Mönitö waa amönipa, ante nê änäni ïnänite, botö, Babetamömini bai ïminipa, ante edonque odömoncæte ante pontabopa.

⁴⁰ Mäninö angä eñëninque Paditeoidi pancadäniya tömengä weca nê ongönäni guiquënë tömengä ingante,

—Æbänö ämii. ïñæmpa mönitö adobai babetamömöni bai ïmönitawogaa.

⁴¹ Ante añönäni Itota wæætê,

—Minitö babetamömini bai inte bai wënæ wënæ cædämaĩ incædöminimpa. Wæætê minitö, Mönitö waa amönipa, ante nê änömini inte mini wentamö mongæncoo ee mongæmini inguĩminidö anguënê, ante apænegacäimpa.

10

Në aacä tönö tömengä obegaidi

¹ Itota ayæ iimaï apæncantapa. “Minitö iminite näwangä ämopa. Onguiñængä obegaidi nani wææ cæyömö guidemö në guidämaï inte wæætë wayömö da ëwa æi guicä iñömö tömengä iñömö në awëmö ö ængä inongä inte adobaï wadäni ayönäni në pö ö ænte gocä ingampa. ² Odemö në guicä guiquënë tömengä obegaidi inänite në aacä ingampa. ³ Në aacä beyæ odemö në wææ cæcä wi ænecampa. Wi ænecä ate në aacä pö guiite tedeyongä obegaidi tömengä nänö tedepämo ëñente inänipa. Tömengä obegaidi inänite nani ëmöwo nani ëmöwo ante aa pecä pöñönänite tömengä tömënäni inänite ænte taocampa. ⁴ Tömengä obegaidi tömänäni inänite ænte taodinqe tömengä önömæca iñömö täno beyænte gocä ate tömengä obegaidi tömengä nänö tedepämo ëñëninque tömengä ingante tee empo godänipa. ⁵ Wacä ingante guiquënë tömënäni tee empote godämaï inänipa. Wæætë wacä nänö tedepämo ëñënämaï inäni inte tömënäni tömengä wecä ongönämaï wodii gocädänimpa,” ante Itota apæncantapa.

⁶ Tömengä mänömaï tömënäni inänite odömoncæte ante, Në aacä æbänö cæcää, ante odömonte apæncä incæte tömënäni tömengä nänö äninö ante ëñënämaï ingadänimpa.

Itota mönö imonte në Aacä ingä

⁷ Mänömaï beyæ Itota wæætë äninque, “Botö minitö iminite näwangä ämopa. Botö iñömö në obegaidi bai inäni nani wææ

cæyömö, Guicædänimpa, ante odemö bai ïmopa. ⁸ Wëenëñedë botö ayæ pönämaï ïñedë wadäni odömonte apæneceæ pongadänimpa. Tömënäni tömänäni waodäni ïnänite në awëmö ö ænänï bai ïnönäni inte adobai wadäni ayönäni në pö ö ænte gogainäni bai ingadänimpa. Incæte waodäni ïñömö në botö obegaidi bai ïnönäni inte në ö æñinänï ïnänite wæætë ëñënämaï ingadänimpa. ⁹ Botö në odemö bai ïmopa. Odemö në guicä bai ïñömö tömengä botö ïmote pönengä ïñongante botö æmo beyænque quëwencæcäimpa. Adocä në obega bai inte tömënäni nänï wææ cæyömö guidemö në guicä bai ïninqe tömengä piyænë cæte quëwencæcäimpa. Ayæ tömengä wæætë në taocä bai ïninqe tömengä nänö cængui mä öñö adinqe eyepæ cæncæcäimpa,” ante Itota apænecantapa.

¹⁰ Ayæ apænedinqe, “Në awëmö ængä guiquënë tömengä ïñömö awëmö æncæte ante pongä ïnongä inte adobai wænoncæte ante wo ëwencæte ante mäninganca cæcæte ante pongä ingampa. Botö ïñömö, Waodäni quëwencædänimpa, ante ayæ, Tömënäni nänï quëwenguinque ante watapæ pönï quëwencædänimpa, ante pontabopa. ¹¹ Botö obegaidi bai ïnäni ïnänite në waa aacä bai ïmopa. Në waa Aacä ïñömö nämä incæ obegaidi beyænque wæncæcäimpa. ¹² Godonte æinta ante wacä ingante në cæcä ïñömö tömengä ïñömö obegaidi në ëacä ïnämaï ïnongä inte në aacä ïnämaï ingampa. Mänömaï beyæ adocä ïñömö mëne bai ingä pongä adinqe tömengä obegaidi ïnänite ëmö cæte wodii winongampa. Tömengä

wodii winongä adinque mēne bai ingä wæætē obegaidi weca pogodo ponte obega ingante yao ongōninque, Obegaidi pangocæ goquināni, ante cæcampa. ¹³ Godonte æintaque ante nē cæcä iñömō, Æbänō cæte obegaidi waa quēwenguināni, ante änāmaï inongä inte edæ wodii winongampa,” ante Itota apænecantapa. ¹⁴⁻¹⁵ Ayæ apænedinque, “Obegaidi inānite waa aacä bai edæ botō iñömō nē waa Aabo imopa. Botō Mæmpo edæ botō imote do ate pōnengä bai botō adobaï tōmengä ingante do adinque pōnēmopa. Ayæ tōmēmo obegaidi bai ināni inānite do adinque tōmēnāni inānite pōnēmopa. Ayæ tōmēnāni guiquēnē botō imote do adāni inte botō imote pōnēnānipa. Botō nāmā incæ obegaidi bai ināni beyænque wæncæboimpa. ¹⁶ Ayæ wadāni iñömō botō obegaidi bai nē ināni incæ wii māniñömō wææ cæyōmō quēwēnāni inānipa. Botō mānināni inānite adobaï ænte māmō ponguēnēmo imopa. Adodāni adobaï botō tedepāmo, Æbänō ämo, ante ēñenguināni inānipa. Mänōmaï beyæ mānināni iñömō do botō quīnāni tōnō tōmānāni adocabodānique baquināni inānipa. Ayæ nē Aabo adoboque iñömō tōmānāni beyæ cæcæboimpa.” ante Itota apænecantapa.

¹⁷ Ayæ apænedinque, “Botō nāmā incæ Ao ante wæninque ñāni òmæmoncæboimpa, ante cædinque wæætē tōmēmo mii quēwenguimo incæboimpa. Mänōmaï beyæ botō Mæmpo botō imote waadete pōnengä ingampa. ¹⁸ Wadāni iñömō ædō cæte botō imote wænguīnānii. Botō nāmā incæ Ao āninque wæncæboimpa. Botō nāmā tæi piñæmo iñömō, Wænguimo, ante nē ämo inōmo imopa. Ayæ adobaï botō nāmā tæi piñænte nē ämo inte botō,

Ñäni ömæmoncæboimpa, ante cædinque wæætë tömëmo müi quëwenguïmo incæboimpa. Botö Mæmpo iñömö botö imote nänö wææ angainö botö ëñëninö ante ëñente cæbopa,” ante apænecantapa.

¹⁹ Mäninö apænecä ëñëninque oodeoidi wæætë wadö wadö ante pönente tedewengadänimpa.

²⁰ Oodeoidi nanguï inäni iñömö,

—Tömengä wënæ tönö cæcä inte edæ ömæcacä inongä ingampa. Ædö cæte tömengä ingante ëñëmïni imïni.

²¹ Äñönäni oodeoidi incæ wadäni guiquënë,

—Tömengä wënæ tönö cæcä inte bai tömengä iïmai nänö äninö ante wïi angä incædongäimpa. Në wënæ inte quëwente cæcä iñömö babetamönäni awinca wi æmonte bai cæcä waa bamönäniyaa.

Oodeoidi Itota ingante Baa änäni

²² Yogueite tedæ iñonte waodäni Eedotadëë quëwënäni, Wængonguï oncö tæiyæ waëmö oncö ante dodäni mænongadänimpa, ante pönente ææmæ cæyönäni. ²³ Itota Wængonguï oncö ñænæncönë yabæcönë Tadömöö nani änoncönë iñömö cægongantapa. ²⁴ Oodeoidi tömengä weca pö godongämæ gongænte änäni,

—Bitö æbänö imii, ante æpoönædö ayæ äinënämai imii. Bitö mönitö Codito imi ininque mönitö imönite edonque pönï apænebi ëñëmönii.

²⁵ Ante äñönäni Itota wæætë,

—Minitö iminite do antabopa. Incæte minitö pönënämai iminipa töö. Botö edæ botö Mæmpo ëmöwo ante bamönengæ cæbo adinque minitö, Botö æbänö imoo, ante ëñënguënëmïni iminipa.

²⁶ Minitö wïi botö obegaidi bai inömïni inte botö

imote pönenämaï iminipa töö. ²⁷ Waodäni botö obegaidi bai në inäni inte botö tedepämo, Æbanö ämo, ante do ëñenäni. Ayæ botö tömënäni inänite adinque pönëmo iñömote tömënäni wæætë botö imote tee empote godänipa. ²⁸ Botö adodäni inänite wantæpiyæ nani quëwenguinö godömo æninque quëwencædänimpa. Ayæ cöwë wænämaï incædänimpa. Tömënäni tömëmo önönempo ongöñönänite æcänö tömënäni inänite gä pe æmpoda iñömö edæ dæ angampa. ²⁹ Botö Mæmpo edæ adodäni inänite botö imote në pönongaingä inongä ingampa. Tömänäni wædänäni iñönäni tömengä iñömö godömenque ñænængä inte nanguï cædongä ingampa. Ininque tömengä önönempo ongöñönänite æcänö tömënäni inänite gä pe æmpoda iñömö edæ dæ angampa. ³⁰ Botö iñömö botö Mæmpo tönö ääwocaque bai ewocamöna imönapa, ante Itota apænegacäimpa.

³¹ Mäninö angä ëñëninque oodeoidi wæætë tömengä ingante dicaca tacacæte ante cædinque dicacoo wææmpo ænänipa. ³² Tömënäni dicacoo wææmpo æñönänite Itota tömënäni inänite,

—Botö minitö weca botö Mæmpo nänö angäi bai nanguï bamönengæ odömönte cætabopa. Ædö botö bamönengæ cædinö ante adinque minitö botö imote dicaca tacacæ cæminii.

³³ Ante äñongä oodeoidi wæætë,

—Mäninö bitö waa cædinö beyæ ante mönitö wii bitö imite dicaca tacacæ cæmönipa. Wæætë bitö babæ ante Wængonguï ingante godö wënæ wënæ ämipa, ante bitö imite tacacæ cæmönipa. Edæ mönitö waömöni bai inte bitö adobai waobi imi

incæte bitö, Botö Wængonguïmo ïnömo ïmopa, ante ämipa töö.

³⁴ Ante wæyönäni Itota wæætë tömënäni ïnänite,
 –Minitö mini wææ yewæmongainö wïi
 iïmaï ante yewæmongatïi. “Minitö ïñömö
 wængonguïdi ïminipa, ante do antabopa,” ante
 yewæmongadänimpa. ³⁵ Wængonguï angä eñente
 nänï yewæmongainö ante waodäni ædö cæte Baa
 äninque wido cæquinänii. Wængonguï nänö angainö
 ante apæ necä nē eñënäni ïñönänite tömengä,
 Minitö wængonguïdi ïminipa, angantapa. ³⁶ Ayæ
 botö Mæmpo botö ïmote inguipoga da pönoncæte
 ante, Botö adoboque quïmi ïmipa, ante botö ïmote
 apænte ængacäimpa. ïninque edæ botö tömengä
 quïmo ïnömo inte tömengä nänö nē da pönongaïmo
 ïñömote edæ botö ïmote edæ æbänö anguïi.
 ïñæmpa botö ïñömö Wængonguï Wëmo ïnömo
 ïmopa, äñömote edæ minitö wæætë, Bitö babæ
 ante Wængonguï ingante godö wënæ wënæ ämipa,
 ante quinante äminitawo. ³⁷ Botö edæ Mæmpo
 nänö cædö bai cædämaï ïmo bai minitö mänïñedë
 botö ïmote pönënämaï ïmini bai waa incædönimpa.
³⁸ Minitö botö ïmote pönënämaï ïmini incæte botö
 guiquënë botö Mæmpo nänö cædö bai adobai cæbo
 ïninque minitö, Botö æbänö cæboo, ante adinque
 pönencæminimpa. Mänömaï cædinque, Botö Mæmpo
 ingante botö ewocabo ïmopa, ante ayæ, Botö adobai
 botö Mæmpo nempo quëwëmopa, ante eñenguïmini
 inte ayæ eñëninque pönencæminimpa, ante Itota
 angacäimpa.

³⁹ Mäninö angä eñëninque tömënäni wæætë
 tömengä ingante bæi ongoncæ cæyönäni tömengä

do aamö cæte gocantapa.

⁴⁰ Ayæ Eedotadëe wadæ godinque Oododänö æmæmäa ocæ emænte taodisque tömengä Wäo wëenëñedë waodäni inänite æpænë nänö guidöniñömö adoyömö gote ongongä ingantapa.

⁴¹ Ayæ tömengä mäniñömö ongöñedë waodäni nanguï inäni tömengä weca goto pöningue änänitapa.

—Ate eñencæminimpa, ante Wäo wodi cöwë bamönengæ cædämaï ingä incæte tömengä mäningä Itota ingantedö ante nänö angainö tömänö näwangä ante angantapa, ante apænedänitapa.

⁴² Ayæ mäniñömö ongöningue waodäni nanguï inäni Itota ingante wede pönënanäni bagadänimpa.

11

Datado wængäimpa

¹ Mäniñedë wacä onguïñængä tömengä emöwo Datado wënæ wënæ badinque öñönongäimpa. Mäadiya tönö Mäadota tömengä tönïñada nänä quëwëñömö tömengä adoyömö Betänia iñömö quëwëngäimpa. ² Ìngä Mäadiya guiquënë ayæ ate oguï wapæ ænte Awënë Itota ingante öni pædinque nämä ocaguï inte tömengä önöwa amimö cæquiringä adocä Mäadiya iñongä tömengä tönïñacä Datado ñöwo wënæ wënæ bacä inongäimpa. ³ Ìningue Datado tönïñada iñömö, Itota ingante aa pebi pongæ, äna eñente wacä gote,

—Awënë eñëmi, Bitö në waadecä iñömö wënæ wënæ ingampa cæbii, ante änapa, ante apænecantapa.

⁴ Mäninö nänä änö ante apænecä eñëningue Itota,

—Mäninö wənæ wənæ inte nänö wädö iñömö wii wængui impa. Wæætē waodāni, Wængongui ñäo apäite emönongä ingampa, ante acädänimpa. Ayæ botö imote, Bitö Wængongui Wëmi adobaï ñäo apäite emönömi imipa, ante apæ necädänimpa, ante mäningä wənæ wənæ ingampa, angantapa.

⁵ Mäadota tönö tömengä tönĩñacä Mäadiya nāna caya inate ayæ Datado ingante Itota tömēnāni inānite waadete pönēnongäimpa. ⁶ Datado wənæ wənæ ingampa, ante apæ necä eñngä incæte Itota nänö ongöñömö adoyömö meönaa ayæ ongongan-tapa. ⁷ Tömengä ayæ ate tömengä emĩñænāni inānite,

—Ægodöedāni, wæætē Oodeabæ mönö gocäimpa.

⁸ Äñongä tömēnāni wæætē tömengä ingante,

—Awēnē nē Odömömi imi, wantäyö intapa ood-eoidi bitö imite dicaca tacacæ cädāni incæte bitö ñöwo wæætē, Mänĩñömö goquimo, ämitawo.

⁹ Ante änāni Itota wæætē,

—Iñampa nænque wii tömää itädē apäitawo. Itädē nē gocä mönö nænque inguipoga apäicä ate beyæ tēwadāmaï gocampa. Botö iñömö itädē gocä baï adobaï miimo botö quēwenganca botö cæquēnēnö iinque cæquinque gobopa. ¹⁰ Woyowotæ nē gocä baï guiquēnē tömengä wæætē ñäo dæ ä beyæ tēwate baï gocampa, angacäimpa.

¹¹ Mäninö angä ate tömengä godömenque tömēnāni inānite,

—Mönö æmigo Datado iñömö mö ñongä. Botö ñöwo tömengä weca gote, Ñāni ömæmoe, ämo ñāni ömæmonguingä, ante apæ necantapa.

¹² Tömengä emĩñænāni wæætē tömengä ingante,

—Awënë Itota, tömengä mö ñongä ïinque edæ gancaë baquingä, apænedänitapa.

¹³ Itota Datado nänö æmæwo wænïmāmo ante apæneçä incæte tömengä ëmiñænāni guiquënë, Datado önonque mö ñongampa, ante Itota apæneçampa, ante pönënönänimpa. ¹⁴ Mänömaï beyæ Itota tömënāni ïnānite,

—Datado æmæwo wængäimpa, ante edonque pönï apæneçantapa. ¹⁵ Minitö pönencæminimpa, ante botö, Tömengä wæncæ cæyongä botö tömengä weca ongönāmaï intabopa, ante minitö beyæ ante tobopa. Ægodödäni, tömengä weca mönö gocæimpa, angantapa.

¹⁶ Ayæ Tömato Äancadënaque nāni änongä ïñömö Itota ëmiñænāni wadāni ïnānite,

—Ægodödäni, äinque, Tömengä tönö godongämæ wæncæte ante tömengä miñæ gocæimpa, angacäimpa.

Itota mönö ömæmonguimāmo mönö mü quëwenguimāmo ante në pönongä ingampa

¹⁷ Ayæ Itota ponte ëñëñongä, Datado baö tömënāni nāni wodintatodë mëönaa go mëönaa do daga wënānitapa, ante apænedāni ëñengacäimpa.

¹⁸ Betānia ïñömö nāni taadö godö Eedotadë nāni quëwëñömö godö eyequeï ïnönimpa. Mänü taadö wodo tedete quidömetodo ganca ïnönimpa. ¹⁹ Oodeoidi nanguï ïnāni ïñömö Mäadota tönö Mäadiya weca pöninque, Minatö tönïñacä wængä ate wæwëmīna incæte piyænë cæte quëwencæminäimpa, ante waadete apæneçæte ante pönänitapa. ²⁰ Itota oo pönï pongampa, ante änāni ëñëñinque Mäadota tömengä ingante

bee tencæte ante gocantapa. Mäadiya guiquënë oncönë ee ongongantapa. ²¹ Mäadota Itota weca pöninge tömengä ingante,

—Awënë Itota, bitö mönitö weca ongömi bai botö töninäcä wii wæncædongäimpa. ²² Tömengä æmæwo wængä incæte bitö ñowo Wængongui ingante quiëmë ante apænebi tömengä pönö cæcä ænguimi imipa, ante botö ëñëmopa, ante apænecantapa.

²³ Angä ëñëninge Itota tömengä ingante,

—Bitö töninäcä wodi ñäni ömæmonguingä.

²⁴ Ante apænecä ëñëninge Mäadota wæætë,

—Ao, inguipoga inque bayedë mönö ñäni ömæmöñedë tömengä do wængaingä incæte ñäni ömæmoncæcäimpa, ante botö do ëñëmopa, angantapa.

²⁵ Itota tömengä ingante äninge,

—Botö në ñäni ömæmonguimo inömo inte cæbo beyænque minitö ñäni ömæmoncæminimpa. Mini wantæpiyæ quëwenguinge ante në Quëwëmo inömo imopa. Botö imote në wede pönengä inömö do wængä incæte ayæ ate wantæpiyæ quëwencæcäimpa. ²⁶ Ayæ në mü quëwengä inte botö imote wede pönengä inömö tömengä cöwë wænämaï quëwencæcäimpa. Bitö mäninö ante pönëmitawo.

²⁷ Angä ëñëninge Mäadota tömengä ingante,

—Awënë Itota Ao ämopa, ante apænecantapa. Bitö mönitö Codito inömi imipa, ante pönëmopa. Wængongui Wëmi inömi inte bitö inömö edæ, Inguipoga në Ponguingä, ante näni angäimi imipa, ante pönëmopa, ante apænecantapa.

Itota Datado wodintatodë gote wæcä

²⁸ Mänömaï ante apænedinque Mäadota ocæ emænte gote Mäadiya ingante aa pecä pongä ate Mäadota tömengä ingante awëmö äninque,

—Mönö në Odömongä do pöninque bitö imite aa pecampa.

²⁹ Angä ëñëninque Mäadiya quingæ ængæ gantite tömengä weca gocantapa. ³⁰ Itota Betänia iñömö ayæ guiidämaï inongäimpa. Mäadota tömengä ingante nänö bee tēniñömö tömengä adoyömö ayæ a ongönongäimpa. ³¹ Oodeoidi Mäadiya tönö oncönë godongämæ ongöninque, Tömengä piyænë cæcæcäimpa, ante tæcæ waadete apæneyönäni tömengä quingæ ængæ gantidinke taocä adinke tömënäni, Tömengä Datado wodi nänö wodintatodë wæcæte ante gocampa, ante pönente tömengä ingante tee empote godänitapa.

³² Itota nänö ongöñömö pöninque Mäadiya tömengä ingante adinke tömengä önöwa ædæ wæænte apænedinque,

—Awënë Itota, bitö mönitö weca ongömi baï botö töninñacä wii wæncædongäimpa, ante wæcantapa.

³³ Mäadiya mänömaï wæyongä oodeoidi tömengä tönö godongämæ në pöninäni adobaï wædäni adinke Itota wæwente entawëninque wæcantapa.

³⁴ Ayæ,

—Datado wodi baö æyömönö da wëmïnitawo,

Angä ëñëninque tömënäni,

—Awënë Itota, pö ae.

³⁵ Ante äñönäni Itota Ca wæcantapa. ³⁶ Tömengä mänömaï wæcä adinke oodeoidi,

—Aedäni, tömengä Datado wodi ingante nö waadete pönengä ingantapa.

³⁷ Ante tedeyönäni pancadäniya,

—Tömengä iñæmpa nē babetamongä awinca wi æmonte bai cædingä inte adocä Datado wodi ingante cæcä bai tömengä wii wæncædongäimpa, ante wægadänimpa.

Datado nänö ñäni ömæmömämo

³⁸ Itota wæætē wæwente entawëninque Datado wodintatodē pongacäimpa. Tömengä wodido ontatodē i iñonte dicabo ñænængade da pæñæ pönö tee mönodäni. ³⁹ Adinque Itota,

—Dicabo da tæ ñæedäni, äñongä Datado wodi tönïñacä Mäadota wæætē,

—Awënē Itota, ëñëmi. Mëönaa go mëönaa tömengä wodido öñöninque tömengä wodi do öö wadingä ingampa.

⁴⁰ Ante wææ angä ëñëninque Itota,

—Bitö wede pönëmi ïninque edæ Wængonguï æbänö ñäö apäite ëmönongä inte cæcää, ante bitö acæbiimpa, ante bitö ïmite wii antawo, angacäimpa.

⁴¹ ïninque tömënäni dicabo tæ ñænänitapa. Ayæ Itota æmö adinque,

—Mæmpo botö apænedinö ante do ëñëmitapa, ante adinque botö bitö ïmite waa ate pönëninque apænebopa. ⁴² Botö apænedö ante æyedëmë apænebo incæ bitö cöwë ëñëmipa, ante botö do ëñëmopa. Wæætē edæ waodäni botö weca godongämæ gongænäni beyæ ante botö mäninö ante apænetabopa. Bitö botö ïmote da pönömi pontabopa, ante tömënäni pönencædänimpa, ante apænetabopa.

⁴³ Mänömainö ante Wængonguï ingante apænedinque Itota,

—Datado ta pöe, ante yedæ aa pecantapa.

⁴⁴ Nē wæningä iñömö edæ do ta pongantapa. Tömengä önompo weocoo inte nāni wīni wīni cædincoo ayæ empodique önöwa nāni wīni wīni cædincoo ayæ ewadique tömengä awinca weocoo nāni ñāne cæmönincoo ayæ emongä inte ta pongä adique Itota tömēnāni inānite,

—Mānincoo ñī cæmīni gocæe, angacäimpa.

Itota ingante bæi ongonte ængcæimpa, ante tedewēnāni

(Mäateo 26.1-5; Mäadoco 14.1-2; Odoca 22.1-2)

⁴⁵ Mänömaī beyæ oodeoidi nanguī ināni Mäadiya weca eñacæ nē pönināni inte iñāni iñömö Itota mänömaī cæcä adique tömengä ingante wede pönēnāni bagadānimpa. ⁴⁶ Pancadāniya guiquēnē Paditeoidi weca godinque, Itota quīnō cæcää, ante adodö angadānimpa. ⁴⁷ İinque Wængonguī quī, ante nē godönāni ñænænāni tönö Paditeoidi iñömö wæætē tömēnāni ömæ nāni Apænte Äincabo tömänāni inānite, Mönö godongämæ apænecäimpa, ante adoyömö pödäni, ante äñönāni pönāni adique tömēnāni,

—İingä iñömö, Acädänimpa, ante nanguī bamönengæ cæcä ingä. Mönö quīnō cæquimöö.

⁴⁸ Ante wædinque mönö tömengä ingante, Bitö mänömaī godömenque cædämaī incæbiimpa, ante wīi wææ ämō İinque waodāni tömänāni tömengä ingante pönēmaīnānipa. Tömengä ingante pönēnāni İinque, Itota oodeoidi Awēnē bacæte ante cæcampa, ante pönente wædinque odömānoidi incæ edæ wææ cæbainānipa. İinque tömēnāni pöninque mönö tæiyæ waëmö oncö wo ewēmaīnānipa. Ayæ

mönö ömæ iñömö mönö quëwencabo incæ nämä
 nē ämō iñömonte tömënäni pō ö ænte bai cædinque
 tömënänique nē änäni babainänipa, änänitapa.

⁴⁹ Tömënäni weca adocanque Caiapato mänii
 wadepo, Wængongui qui, ante nē godongä
 ñænængä pönï inongä inte tömengä iñömö,

—Minitö tömänö ante eñenämaï iminipa töö,
 apæncantapa. ⁵⁰ Mönö ömæ quëwencabo wii
 tömämö wængæimpa, ante wæätë tömëmö beyæ
 ante adocanque onguiñængä wængä ininque
 godömenque waa imaimpa, ante minitö eñenämaï
 imini inte tedewëmini awædö.

⁵¹ Mänömainö ante apænedinque Caiapato
 mä nänö pönënonque ante wii angacäimpa.
 Wæätë tömengä mänii wadepo iñonte, Wængongui
 qui, ante nē godongä ñænængä pönï inongä
 inte Wængongui beyæ apænedinque, Itota
 iñömö oodeoidi beyæ ante wæncæcäimpa,
 ante apænegacäimpa. ⁵² Ayæ wii Oodeabæ
 quëwënänique beyæ ante wænguingä. Wæätë,
 Wængongui wënäni wayömö wayömö pangote
 godinäni inte adodänique badinque adoyömö
 godongämæ poncädänimpa, ante tömengä
 wæncæcäimpa. ⁵³ Caiapato mäninö ante nänö
 äniönæ iñonte täno godongämæ pönëninque
 oodeoidi ömæ näni Apænte Äincabo iñömö, Äbänö
 cæte Itota ingante wænömö wænguingää, ante
 cöwë tedewënönänimpa.

⁵⁴ Mänömaï beyæ Itota ayæ oodeoidi weca wii
 edonque gocä inongäimpa. Wæätë wadæ god-
 inque tömengä önömæca eyequei Epadaimë nani
 äñömö godinque mäniiñömö tömengä emiñænäni
 tönö ongönongäimpa.

55 Wodo pænta gogaïönæ, ante Patowa nāni cæönæ oo pōni inōnimpa. Māniñedē Oodeabæ wayōmō wayōmō quēwēnāni nanguī ināni Eedotadēē quēwēñōmō pō æidinque tōmēnāni Patowa nāni ææmæ ayæ cædāmaī iñedē dodāni angai bai cædinque, Mōnō wēnæ wēnæ cægainō ante mōnō mēnongate bai waēmō bacæimpa, ante nāmā incæ āacæte ante cædinque æi gogadānimpa. 56 Adodāni Wængonguī oncō ñænæncōnē yabæcōnē pō guiidinque adiyæ gongæninque, Itota æyōmōnō ingāā, ante pōnente gomō adinque nāmāneque godongāmæ apænedinque,

—Māningā iñōmō ææmæ beyæ ante edæ pōnāmaī ingantawo. Æbānō ante pōnēmīni, ante apænedōnānimpa.

57 Wængonguī quī, ante godōnāni ñænænāni tōnō Paditeoidi wæætē waodāni inānite wææ änōnānimpa. Æcānō Itota nānō a ongōñōmō ante nē ēñengā iñōmō tōmengā mōnitō imōnite angā ēñēninque mōnitō wæætē Itota ingante yao on-gonte æmaimōnipa, ante do wææ änōnānimpa.

12

*Awēnē Itota önōwa oguī wapæ gao cæwacampa
(Māateo 26.6-13; Māadoco 14.3-9)*

1 Önompo æmæmpoque go adoönæque ate Patowa nāni āmæ bacæ cæyedē Itota Betānia iñōmō pongantapa. Itota do angā ate nē ñāni ömæmōningā Datado iñōmō tōmengā adoyōmō Betānia quēwēnongāimpa. 2 Itota pongā adinque waodāni māniñōmō quēwēnāni, Itota ingante waa amōnipa, ante tōmengā beyæ ææmæ cægadānimpa. Wadāni tōnō Datado adobai Itota tōnō godongāmæ

tæ contate cæññänanite Mäadota iññömö tömënäni inänite cænguï godongä cænänitapa. ³ Ayæ Mäadiya iññömö mëedio ditodo ganca nāni oguï wapæ öni pæquïmæ nädodopæ nänö nanguï godonte ænimæ incæ ænte mämö Itota önöwa gao cæwadinque tömengä ocaguï inte amimö cæcä iñinque oncönë tömancönë oguï waacönë ingatimpa. ⁴ Itota miñæ nē gocä adocanque Codaa Icadote nāni änongä iññömö edæ, Itota ingante æncæðänimpa, ante odömonte nē godonguingä inte ñöwo wææ apæñecantapa.

⁵ – Ìimæ nänö oguï wapæ quïante ömæpodäni beyæ ante godonte ænämaï ingantawo. Ìñæmpa waocä adoque wadepo cæte beyæ paga æninque todetiento deenadiota nänö ænimpota beyæ mänimæ godonte ænimæ imæmpa, ante wæcantapa.

⁶ Tömengä dicæ ömæpodäni beyæ ante pönëninque mänömainö ante apæñecantawogaa. Wæætë tömengä nē awëmö ænongä inte mäninö ante apæñecantapa. Tömënäni da wente æintaa næænongä inte tömengä iññömö, Tömënäni da wëninta incæ pancataa botö qui bacæimpa, ante awëmö ænongä inte mänömaï apæñecantapa. ⁷ Itota wæætë tömengä ingante,

– Onquiyængä ingante piinte änewënämaï incæbiimpa. Mänimæ botö daga wenguïönæ ante manguënengä inte tömengä botö baö nāni daga wenguinque ante eyepæ iññonte öni paacantapa. ⁸ Ömæpodäni cöwë minitö weca quëwënäni inänipa. Botö guiquënë wii cöwë minitö weca quëwëmo imopa, ante apænegacäimpa.

Datado ingante wænongæimpa, ante tedewënäni

⁹ Itota Betänia ponte ongongampa, ante apænedäni ëñëninque oodeoidi nanguï inäni tōmengä weca pōnäni incæte wïi tōmengä beyænque pōnänintapa. Wæætë adobaï Datado ingante angä nē ñäni ömæmōningä ingante acæte ante pongadänimpa. ¹⁰ Mänömaï beyæ Wængonguï quï, ante nē godönäni ñænænäni iñömö, Æbänö cæte Datado ingante adobaï wænömö wænguingäa, ante godongämæ tedewënanitapa. ¹¹ Iñæmpa oodeoidi nanguï inäni, Datado beyæ mönitö imönite emö cæte Itota ingante pönëninque tōmengä gämænö godänipa, ante wægadänimpa.

Itota Eedotadëe iñömö pongä

(Mäateo 21.1-11; Mäadoco 11.1-11; Odoca 19.28-40)

¹² Iimö ate, Eedotadëe iñömö poncæte ante Itota idömæ pongampa, ante apænedäni ëñëninque ææmæ beyæ ante tæiyænäni pöninäni iñömö, ¹³ yædëmæmäa wangö tate mäo bee tente taod-
inque yedæ aa pedinque,

—Möni quëwenguinque ante, Badogaa, ante tomönipa. Bitö Awënë Wængonguï emöwo beyænque pömi ininque bitö toquinque edæ Wængonguï bitö imite waa cæcæcäimpa. Bitö idægoidi Awënë inömi inte bitö toquinque ingæimpa.

¹⁴ Ante yedæ añönäni Itota iñömö bodo wengä ate æninque tōmengäa æi contate pongantapa. Wëenëñedë Wængonguï beyæ iïmaï ante nani yewæmonte angainö bai iinque cædinque pongantapa.

15 “Tiöno iñömö quëwëmini iñömö edæ guiñënämaï iedäni.

Minitö Awënë Odeye ñowo minitö weca pongä aedäni. Edæ bodo wengäa æi contate pongampa,”

ante yewæmongadänimpa. 16 Tömënanäni dodäni näni angai bai cædinque Itota ingante bee tencæ taodäni adinque Itota nänö në ëmiñænäni iñömö, Æbänö cædäni, ante mäniñedë ëñënämaï inte wædönänimpa. Wæætë edæ Itota Wængongui ñäö ëmönömö ocæ ëmænte gocä adinque tömengä ëmiñænäni mäniñedë ate edæ, Itota ingante waodäni ñowo näni cædönö ante dodäni wëenëñedë yewæmongadänimpa, ante pönente wædönänimpa.

17 Datado wodi ontatodë ongönongante Itota, Ta pöe, ante aa pecä ëñëninge në wæningä incæ ñäni ömæmöninque ta pongä adinque Itota weca godongämæ ongöninäni nanguï inäni iñömö, Itota mänömaï cæcä atamönipa, ante gode ä gode ä cædönänimpa. 18 Ìninqe edæ, Itota mänömaï bamönengæ cæcampa, ante apænedäni ëñente beyænque waodäni tæiyænäni Itota weca bee tencæ pönänitapa. 19 Mänömaï beyæ Paditeoidi iñömö nämanque godongämæ tedewënanitapa.

—Waadäni tömänäni æbänö tömengä miñæ tee empo godäni ante aedäni. Mänii beyæ ante, Mönö cædinö wii eyepæ impa, ante adinque, Mönö æbänö cæte godömenque cæquimöö, ante wægadänimpa.

Guidiegoidi pancadäniya Itota ingante diqui mïnäni

²⁰ Eedotadēē iñōmō tōmēnāni ææmæ cæyedē Wængonguī ingante waa ate apæ necæte ante nē pōnāni pancadāniya iñōmō guidiegoidi inōnānimpa.

²¹ Mānīnāni iñōmō Pedipe weca pōnīnque edæ,

—Awēnē, ēñēmi. Mōnitō Itota ingante ainēmōnīpa, ante ānānitapa. Māningā Pedipe iñōmō Betaida quēwēñōmō Gadideabæ quēwente pongā inongāimpa.

²² Tōmēngā iñōmō Æntade weca gote tōmēngā ingante guidiegoidi nāni ānīnō ante apæ necā ate tōmēna wæætē Itota weca guēa godīnque tōmēngā ingante āñōna, ²³ Itota wæætē,

—Wængonguī nānō cæōnæ do ba īnīnque tōmēngā pōnō cæcā beyænque botō Waobo ēñagaīmo iñōmō ñāō apāite ēmoncæboimpa. ²⁴ Mīnitō imīnite nāwangā āmopa. Tōmēmō onguipo quiyadīmō incæ yabæque ñōmāadāmaī ī baī ædō cæte tā bocate pædīnque tōmēmō nanguī pōnī imonguīī. Wæætē tōmēmō yabæque ñōmāate ate tā bocate pædīnque nanguī pōnī imōmpa. Botō adobaī wænguēnēmo imōpa. Botō wīī wæmo baī ædō cæte waodāni tæiyænāni botō quīnāni baquīnānīī.

²⁵ Nē, Nāmanque pōnente quēwēmote, ante pōnēngā iñōmō edæ tōmēngā nānō quēwēnguīmāmo incæ wo ēwente bacæcāimpa. Inguīpoga quēwēñedē nē, Wīī nāmanque pōnente quēwēmote, ante pōnēngā guīquēnē tōmēngā nānō wantæpiyæ quēwēnguīnō ante do ēadingā inte tōmēngā nānō wænāmaī quēwēngūnīnque gocæcāimpa. ²⁶ Æcānō botō imote nē cæda īna tōmēngā iñōmō edæ botō imote tee empo goquēnēngā ingāmpa. Ayæ æyōmōnō botō quēwēmo botō imote nē cædongā adoyōmō quēwēncæcāimpa. Botō Mæmpo iñōmō botō imote

nē cædongä ingante waa acæcäimpa, ante Itota apænegacäimpa.

Itota, Botö wæncæboimpa, ante apænecä

²⁷ Ayæ godömenque apænedinque Itota iïmaï apænecantapa. “Botö guiñēmāmo entawēninque wæbo inte quinö anguïmo. ‘Botö Mæmpo ēñēmi, äninque, Botö nantate wæwenguïönæ oo pönï ba incæte bitö pönö ö æmi ate wæwēnāmaï bacæboimpa,’ ante botö wïi mänömaïnö ante ancæboimpa. Edæ botö wæwenguïnö beyæ ante pontabopa. ²⁸ Mæmpo, Bitö æbänö ñäö apäite ëmömi ïmii, ante odömömi acædänimpa,” aŋgantapa.

Äñongä öönædē ïnö tedepāmo apænedinque, “Botö æbänö ñäö apäite ëmömo ïmopa, ante do odömöntabopa. Ayæ wæætē adodö cæcæboimpa,” ante apænecä ēñēnänitapa.

²⁹ Mänïñömö godongämæ ongönäni nangui ïnäni ïñömö mänimāmo ēñēninque edæ, Detæbo tæï tēmāmo bai impa, ante wædänitapa. Wadäni guiquēnē,

—Anquedo ïñömö tömengä ingante apænecantapa, ante änänitapa.

³⁰ Itota ïñömö wæætē,

—Mänimāmo wïi botö beyæ ante apænecampa. Wæætē mïnitö beyæ ante apænecampa.

³¹ Ñöwoyedē Wængongui inguipoga quëwēnāni ïnänite apænte nänö panguïnö ïñömö edæ oo baquïnö anguēnē. Inguipogaque quëwēnāni awēnē ïñongante wēnæ ingante Wængongui ñöwoyedē, Gobäwe, angä gocæcäimpa. ³² Botö ïmote awäa timpodinque ængæ gantidēnāni wægömo ate

botö waodäni tömänäni inänite, Minitö botö weca poncæminimpa, ante aa pecæboimpa, ante Itota apænecantapa.

³³ Mänömainö ante apænedinque tömengä, Æbänö wænguïmoo, ante eñencæðänimpa, ante apænecantapa. ³⁴ Eñëninque mänĩñömö ongönäni nanguï inäni,

—Mönitö inæmpa, Mönö Codito cöwë ee on-goncæcäimpa, ante dodäni nani wææ angainö ante yewæmonte ongompa, ante eñentamönipa. Incæte bitö inñömö nämanque äninque, Botö Waobo eñagaimo inñömote botö imote awäa timpodinique gö cæðäni wægonguïmo imopa, ante ædö cæte ämii. Äninque, Ìngä Waocä në eñagaingä inæmpa ee ongönämaï wænte goquingä.

³⁵ Ante wæyönäni Itota tömënäni inänite,

—Botö, Waodäni mïmönë ñäö bai entawëninque quëwencæðänimpa, ante pontabopa. Wæðænque ayæ inñö botö mïnitö weca quëwëninque mïnitö iminite odömonte apænebopa. Mönitö taadö wëmö badämaï ingæimpa, ante mïnitö taadö ayæ ñäö inñedë goedäni. Edæ wëmö inñömö në gocä inñömö tömengä edæ, Ædönö goboo, ante eñënämaï ingampa. ³⁶ Botö ñäö bai emönömo imopa. Ñäö inñömö në cægömöni incæmönimpa, ante bacæte ante cæðinique mïnitö inñömö botö mïnitö weca ayæ ongönñömote botö imote pönëedäni ämopa, angantapa.

Tömengä inique apænete ate wadæ godinique wë womonte ongongacäimpa.

Oodeoidi Itota ingante ümaï cæte pönënämaï inänipa

³⁷ Itota oodeoidi weca nanguï bamönengæ cæte odömongä incæte tömënäni ayæ tömengä ingante pönënämaï inänitapa. ³⁸ Wængonguï beyæ nē apænecä Itaiya wodi iïmaï ante do nänö angainö bai iinque baquinque tömënäni mänömaï cædönänimpa.

“Awënë Wængonguï eñëmi. Mönitö apænemöni tömënäni nani eñënö ante edæ æcänö eñente pönengä. Iñæmpa nē pönengä iñömö edæ dæ angä awædö.

Ayæ Awënë Wængonguï nänö tæi piñænte cægainö ante æcänö ada iñömö edæ dæ angampa.”

³⁹ Iinque tömënäni ædö cæte pönenguinänii, ante Itaiya wodi edæ wayömö yewæmöninque, Wængonguï iïmainö ante cæcä beyæ pönënäni inänipa, ante yewæmongacäimpa.

⁴⁰ “Tömënäni botö gamænö ocæ emænte pönäni bai botö wæætë, Waa bacæminimpa, ante godö cæcædömoimpa.

Incæte mänömaï cædämaï incæboimpa, ante Wængonguï iïmaï cægacäimpa.

Tömengä godö cæcä beyænque waodäni babetamönäni bai adämaï bagadänimpa.

Adobaï mimönë nani pönënö ömæde badinque eñënämaï bagadänimpa.

Edæ, Tömënäni nani adinö ante eñënämaï incædänimpa, ante cædinque

ayæ edæ, Tömënäni nani eñënö ante eñënämaï incædänimpa,” ante wææ cægacäimpa.

ante Itaiya wodi yewæmongacäimpa. ⁴¹ Itaiya wodi Itota nänö ñäö emömämo æbänö inguï, ante do ate bai ingaingä inte edæ Itota ingantedö ante mäninö ante doyedë angacäimpa.

42 Ñöwo guiquënë oodeoidi awënëidi tæiyænäni Itota ingante pönänanima. Incæte Paditeoidi beyæ guiñänäni inte, Mönö odömöincönë go guiiyömönite tömënäni mönitö imönite wii tatodoncædänimpa, ante wææ cædinque tömënäni në pönänäni incæ waodäni ëññönäni pæ wëenete tededämaï inänimpa. 43 Edæ mäninäni, Waodäni mönitö imönite waa ate apæ necædänimpa, ante nanguï aïnente wædäni inönänimpa. Adodäni, Wængonguï mönitö imönite waa ate apæ necæcäimpa, ante pönömenque aïnente wædäni inönänimpa.

Itota nänö änö beyænque waodäni apænte wæccædänimpa

44 Itota yedæ äninque aa pecantapa. “Botö imote në pönengä iñömö wii botö adoboque imote pönëongä ingampa. Wæætë edæ botö imote në da pönongaingä ingante tömengä adobaï pönengä inongäimpa. 45 Adocä botö imote në acä iñömö tömengä botö imote në da pönongaingä ingante adobaï acä ingampa. 46 Botö imote në wede pönänäni iñönäni adocanque incæ wëmö iñömö wii godömenque ee ongoncæcäimpa, ante cædinque botö iñömö inguipoga quëwënäni weca ñäö bai inömo inte pontabopa.”

47 “Waocä botö änö ëñëninque wii ëñente cæcä ingä incæte botö tömengä ingante apænte änämaï imopa. Edæ botö wii inguipoga quëwënäni inänite apæ necæte ante pontabopa. Wæætë inguipoga quëwënäni inänite æmo beyænque quëwencæminimpa, ante pontabopa cæminii. 48 Botö imote në Baa angä iñömö tömengä botö

änönö ante, Dicæ pönëmogaa, angä iñongante tömengä ingante nē apænte änö incæ edæ mæ ongompā. Inguipoga iñque baquiönæ iñonte botö äninö incæ nē apænte anguingä bai ba iñique mäningä ingante, Bitö pante wæquinque Baa angabiimpa, ante bai apænete ingæimpa. ⁴⁹ Edæ botö wii nämanque pönëninge apænetabopa. Wæætē, Botö quinö apænequimoo, ante, Æbänö ante apænequimoo, ante botö Mæmpo botö imote nē da pönongaingä iñömö tömengä botö imote wææ angä ëñëninge apænetabopa. ⁵⁰ Tömengä nänö wææ angainö ëñente cæbo beyænque minitö wantæpiyæ cöwē quëwencæminimpa, ante do ëñëmopa. Iñique botö Mæmpo botö imote nänö angainö ante botö adodö ante apænebopa,” ante Itota mäniñedē iñque apænegacäimpa.

13

Itota incæ tömengä ëmiñænäni önöwa mënöwacä

¹ Patowa nani ämæ wantæyö bacæimpa, ante nani cæyedē Itota iñömö, Botö inguipoga quëwente ëmö cæte botö Mæmpo weca ocæ ëmænte æi goquiönæ do bacæimpa, ante do ëñëningäimpa. Itota ingante pönënanī nē inguipoga quëwënanī iñönänite tömengä tömënanī inänite waadete pönëninge ñöwoyedē, Botö æbänö nangui waadete pönëmo imoo, ante odömongäimpa.

² Gäwadecæ bayö Itota tömengä ëmiñænäni tönö godongämæ cæñönäni wënæ awënë cæcä beyænque Timönö wengä Codaa Icadote iñömö, Itota ingante odömonte godoncæboimpa, ante pönengä inongäimpa. ³ Itota iñömö, Quincoomē

ongoncoo incæ Wængonguï pönö cæcä beyænque botö tömancoo awënë badinque nämä tæi piñænte nē ämo imopa, ante eññongäimpa. Ayæ edæ Wængonguï weca quëwente wææ pönimo inte botö Wængonguï weca ocæ emænte goquïmo imopa, ante do eññongäimpa. ⁴ Mäninö ante eññongä incæ tömengä iinque cænte ate ængæ gantidique yabæcoo gä tadongadique wadæ caaincoo æninque önoncadeyæ inö goti padengantapa. ⁵ Ayæ ate æpæ mënongaquintadë pe ñiñæninque tömengä emiñænäni tömänäni önöwa mënöwadinque wadæ caaincoo goti padëincoo inte wadæ cæwacæ tæcæ cæcantapa.

⁶ Mänömaï cædinque tömengä Timönö Pegodo weca pongä adinque adocä iñömö tömengä ingante,

—Bitö botö Awënë imi incæte botö önöwa mënöwacæ pömitawo.

⁷ Ante añongä Itota wæætë,

—Ñöwoque botö æbänö cæboo, ante eññenämaï imipa. Incæte ayæ ate eññencæbiimpa.

⁸ Angä eññëninque Pegodo,

—Botö önöwa cöwë mënöwadämaï incæbiimpa, ante Baa ämopa cæbii.

Ante añongä Itota godömenque,

—Botö bitö önöwa mënöwadämaï imo bai bitö wii botö quïmi imaimipa, ante angantapa.

⁹ Mäninö angä eññëninque Timönö Pegodo wæætë,

—Awënë, Mänömaï i inique bitö wii botö önöwaque mënöwaquïmi. Wæætë botö önompo adobai mënompodique botö ocabo mënoncae.

¹⁰ Ante añongä Itota wæætë,

—Æpæ nē äadingä iñömö tömengä baö eñayö tömäñö waëmö impa. Ìinque tömengä önöwaque nämanque mënöwacä inte eyepæ impa. Minitö do mīmō mënongate waëmō entawënōmīni ïmīnipa. Incæte wīi tömāmīni waëmō entawēmīni ïmīnipa, angantapa.

¹¹ Edæ, Æcänö botö ïmote nē odömote godongingä ingää, ante tömengä do eñënongåimpa. Mänömaï beyæ tömengä, “Minitö wīi tömāmīni do mënongate waëmō entawënōmīni ïmīnipa,” angantapa.

¹² Ayæ tömënäni önöwa ïinque mënöwadinque tömengä yabæcoo wëñadinque tömengä adodö gote tæ contadinque tömënäni ïnänite,

—Botö mänömaï cædinque mīnitö beyæ ante quīnō cæboo, ante eñëmīnitawo, ante äinque Itota godömenque, ¹³ Minitö botö ïmote, Nē Odömömi ïmipa, äinque ayæ adobaï, Awënë ïmipa, ämīni ïmīnipa. Edæ botö mīnitö Awënë ïnōmo ïinque mīnitö mänömaïnō ante näwangä ante ämīnipa.

¹⁴ Botö iñömö mīnitö Awënë ïnōmo inte nē mīnitö ïmīnite Odömömo ïmo incæ mīnitö önöwa do mënöwabo ämīnipa. Ìinque botö mänömaï mënöwabo baï mīnitö adobaï wacä önöwa wacä önöwa mënöwaquënēmīni ïmīnipa. ¹⁵ Botö cæbo baï mīnitö adobaï cæcæmīnimpa, ante cædinque botö mīnitö beyæ ante cæbo aedäni. ¹⁶ Minitö ïmīnite näwangä ämopa. Awënë ñænængä ïnongä ïñongante tömengä ingante nē cæcä iñömö wīi godömenque ñænængä ingampa. Awënë nē da godongä ñænængä ïñongä tömengä nänö nē da godöningä wæætē wīi godömenque ñænængä ingampa. ¹⁷ Minitö ñöwo mäninö ante eñënimīni

inte edæ ado ante cæmīni īnīnque mīni toquinque bacæimpa, ante Itota apænecantapa.

¹⁸ Ayæ apænedīnque, “Botō wīi tōmāmīni beyæ antabopa. Botō apænte ænīnāni ædānidō īnānī, ante botō nē ēñēmo īmopa. Wængonguī angā ēñente nāni yewæmongainō bai īnque bacæimpa, ante īmaī bacæ cæpa. ‘Botō tōnō godongāmæ nē cængongā īñōmō botō imote nē pīinte cæcā bacantapa.’ ¹⁹ Mānōmaī ba adīnque edæ mīnitō botō imotedō ante apænedīnque, Tōmengā mōnō Codito īnongā ingampa, ante pōnencæmīnīmpa, ante cædīnque botō ñōwo ayæ badāmaī īñedē mīnitō imīnite āmopa. ²⁰ Mīnitō imīnite nāwangā āmopa. Æcāmenque botō nē da godongaingā ingante æna tōmengā īñōmō edæ botō imote adobaī ængā ingampa. Ayæ æcāmenque botō imote æna tōmengā īñōmō botō imote nē da pōnongaingā ingante ængā ingampa cæmīnī,” ante Itota apænegacāīmpa.

Itota ingante Codaa nē godonguingā ingampa, ante

(Māateo 26.20-25; Māadoco 14.17-21; Odoca 22.21-23)

²¹ Mānīnō angā ate Itota īñōmō tōmengā nānō wæwēmāmo entawēnīnque wæcā inte, Nāwangā ante apænebo ēñēdāni. Mīni cabo incæ adocanque, Æncædānīmpa, ante botō imote odōmonte pædæ godonguingā ingampa.

²² Ante apænecā wædīnque tōmengā ēmīñænāni, Æcānō ingante apænecāā, ante ēñēnāmaī inte godongāmæ wacā ingā wacā ingā adānitapa. ²³ Itota ēmīñænāni adocanque īñōmō Itota nānō nē waadete pōnengaingā īnongāīmpa. Tōmengā īñōmō Itota tōnō āāñōmonque tæ contate ongōnāīmpa.

²⁴ Timönö Pegodo iñömö iingä ingante ömö ömö cædinqe angampa. Bitö Itota ingante, Æcänö ingää, ante ämi angä eñente ate apænebi eñëmönie.

²⁵ Angä eñëninque mäningä Itota tönö äãñömonque nē tæ contacä iñömö,

—Awënē, æcänö ingää, ante apænebi eñëmönie, ante tömengä ingante äñongä.

²⁶ Itota wæætē,

—Botö iï päö owætaca müi cæte godömo nē ænguingä iñömö tömengä nē cæquingä ingampa.

Ayæ päö owætaca müi cædinqe Timönö wē Codaa Icadote ingante godongantapa. ²⁷ Codaa päö ængä ate Tatäna iñömö tömengäa do guiigacäimpa. Ìninque tömengä ingante,

—Bitö quinö cæcæ cæbii edæ quingæ cæe, ante Itota angantapa.

²⁸ Wadäni adoyömö nē cænäni iñömö, Itota quinante mäninö ante tömengä ingante angää, ante eñënämaï inönänimpa. ²⁹ Edæ Codaa tömënäni da wente æinta næænongä ingä beyæ tömënäni pancadäniya, Ææmæ beyæ ante mönö cænguï wii eyepæ ëamöni ìninque, Bitö godonte æncæbiimpa, ante Itota angampa, ante pönënönänimpa. Adobaï ömæpodäni inänite, Godömi ænguïnänimpa, ante Itota angampa, ante pönënönänimpa.

³⁰ Codaa päö ænte ate tao gogacäimpa. Do woyowotæ inönimpa.

Itota nänö wææ änönö ante ñöwo angampa

³¹ Codaa dæ gocä adinqe Itota,

—Botö Waobo eñagaïmo inte æbänö ñäö apäite ëmönömo imoo, ante ñöwo edonque bacæïmpa. Botö cæquinö beyæ Wængonguï æbänö ñäö apäite

ëmongä ingää, ante edonque bacæimpa. ³² Ayæ botö cæquinö beyæ Wængongui ñäo apäite nänö ëmönö edonque ba ïinque Wængongui cæcä ate botö ñäo apäite botö ëmönö adobaï edonque bacæimpa. Ayæ mänömaï Wængongui wantæyö cæcæcäimpa. ³³ Botö wëmini botö mïnitö weca wantæyö quëwëninque gobopa. Mïnitö botö ïmote ante diqui diqui mingüimïni ïminipa. Ayæ ood-eoidi ïnänite botö angainö bai ñöwo mïnitö ïmïnite adodö ämopa. Botö goquiñömö ante mïnitö ædö cæte ponguimïni ïminii. ³⁴ Botö wææ änönö ante ñöwo mïnitö ïmïnite ämopa. Wacä ingä wacä ingä waadete pönencæminipa. Botö mïnitö ïmïnite waadete pönënömo bai mïnitö adobaï wacä ingä wacä ingä waadete pönenguënëmïni ïminipa. ³⁵ Mïnitö wacä ingä wacä ingä waadete pönëmïni adinque wadäni tömänäni, Mïnitö Itota nänö në ëmiñæmïni ïminipa, ante ëñencædänimpa, ante Itota apænegacäimpa.

Pegodo incæ, Dicæ abogaa, anguingä ingampa, ante

(Mäateo 26.31-35; Mäadoco 14.27-31; Odoca 22.31-34)

³⁶ Timönö Pegodo tömengä ingante,

—Awënë, ædömë gobii.

Ante añongä Itota wæætë,

—Botö goquiñömö ante bitö ædö cæte botö ïmote ñöwo tee empo ponguimi ïmii. Ayæ ate guiquënë bitö botö ïmote tee empo ponguimi incæbiimpa, angantapa.

³⁷ Pegodo godömenque,

—Awënë, äninque, Botö quinante bitö imite ñöwo tee empo godämaï imoo, ante wæcampa. Botö Ao äninque bitö beyæ ante nämä wænguïmo imopa.

³⁸ Ante äñongä Itota wæætë,

—Bitö Ao äninque botö beyæ ante näwangä wænguïmi imiyaa. Bitö imite näwangä ante apænebo ëñëe. Tawadiya pedämaï iñonte bitö iñömö botö imotedö, Dicæ abogaa, ante mempoga go adopoque anguïmi imipa, ante apænegacäimpa.

14

Mæmpo weca mönö godö ante Itota taadö bai ingampa

¹ Itota tömengä ëmiñænäni inänite, “Mimönë guñente wädämaï iedäni. Wæætë Wængonguï ingante wede pönëedäni, angantapa. Ayæ adobaï botö imote wede pönëedäni. ² Botö Mæmpo nänö quëwëñömö onconcoo bacoo pönï mä ongompa. Mänömaï impa, ante wïi näwangä i bai botö mïnitö imïnite ancädömoimpa. Mïnitö beyæ ante botö, Mïni ponte quëwenguï onconcoo ante tömäa ædæmö badoncæte ante mäniñömö gocæboimpa. ³ Ayæ mïnitö quëwenguï onconcoo tömäa ædæmö mänoncæte ante gobo ininque botö ocæ ëmænte poncæboimpa. Pöninque mïnitö botö quëwëñömö adoyömö botö tönö godongämæ quëwencæmïnipa, ante botö mïnitö imïnite ænte mäibo æicæmïnipa. ⁴ Botö goquïñömö æyömönö i, ante ayæ mäniñömö gocæte ante taadö godö ante mïnitö do ëñëmïnipa,” ante Itota apænecantapa.

⁵ Apænecä ëñëninque Tömato iñömö tömengä ingante,

—Awënë, Ædömë goquimii, ante mōnitō eñēnāmaī imōni inte mōnitō māninō bitō goquinō ædōnō ī, ante taadō ædō cæte eñenguimōnii.

⁶ Æñongä Itota wæætë,

—Botō iñōmō tōmēmo nē taadōmo bai inōmo imopa. Ayæ botō adobo nē nāwangä änō bai inōmo bai iñōmote mīnitō æbānō nāwangä impa, ante eñenguimīni imīnīpa. Botō edæ nē Quëwēmo inte pōnō cæbo beyænque mīnitō quëwenguimīni imīnīpa. Botō wīi pōnō cæbo bai waocä æcāmenque incæ botō Mæmpocä weca godāmaī incædongäimpa. ⁷ Botō imote do ate pōnēmīni inique mīnitō botō Mæmpo ingante adobai ate pōnēmīni imaimīnīpa. Nōwo tōmengä ingante tæcæ ate bai pōnēmīni inte mīnitō tōmengä ingante cōwë nē agaimīni incæmīnīpa, ante apænecantapa.

⁸ Māninō apænecä eñēnīnque Pedipe iñōmō,

—Awënë, Mæmpocä ingante odōmōmi amōnie. Māninque adīnque idæwaa. Eyepæ impa.

⁹ Æñongä Itota wæætë,

—Pedipe eñēmi. Botō mīnitō weca wantæpiyæ quëwēmo incæ bitō ayæ botō imote adāmaī inte bai pōnēnāmaī imitawo. Nē botō imote acä iñōmō tōmengä adobai Mæmpocä ingante nē acä ingampa. Inique bitō iñōmō, Mæmpocä ingante odōmōmi amōnie, ante ædō cæte botō imote ämii. ¹⁰ Wæmpocä nempo botō nē quëwēmo imopa, ante ayæ, Wæmpocä ingante botō entawēmo imopa, ante bitō pōnēnāmaī imitawo. Botō mīnitō imīnite, Æbānō apæneboo, ante wīi nāmanque pōnēnīnque apænebopa. Wæætë botō Wæmpocä

incæ botö tönö nē äawocaque bai quëwëngä inte edæ tömengä nänö cædö ante nē cæcä ingampa.

¹¹ Tömengä nempo quëwëmo ïmopa, ante ayæ, Tömengä ingante botö entawëmo ïmopa, ante mïnitö ïmïnite apænebo ëñëninque pönëedäni. Wæætë edæ mïnitö botö änö beyænque ayæ pönënämaï ïmïni incæte botö bamönengæ nanguï cædinö adinque mäninö beyænque pönëedäni.

¹² Mïnitö ïmïnite näwangä ämopa. Botö ïmote nē wede pönengä ïñömö tömengä botö cæbai adobai cæcæcäimpa. Ayæ botö Mæmpocä weca ocæ ëmænte gobo beyæ nē wede pönengä ïñömö edæ wïi önonque botö cæbai cædinque godömenque cæquiringä ingampa. ¹³ Mïnitö botö ëmowo ante apænedinque quiëmë æncæte ante apænemïni ëñëninque botö Wængongui Wëmo ïnömo inte edæ, Mæmpocä nänö ñäö ëmömämo edonque pönï acædänimpa, ante cædinque mïnitö änö bai edæ do cæcæboimpa. ¹⁴ Mïnitö, Ænguimöni, ante quiëmë beyæ ante botö ëmowo ante botö ïmo apænemïni ëñëninque do cæcæboimpa, ante Itota apænegacäimpa.

Wængongui Tæiyæ Waëmö Önöwoca poncæcäimpa, ante

¹⁵ Ayæ godömenque apænedinque Itota ïmaï ante apænecantapa. “Mïnitö botö ïmote waadete pönëmïni ïninque botö wææ angainö ante ëñente cæquimïni ïmaïmïnipa. ¹⁶ Ayæ, Wacä botö beyæ ante mïnitö tönö godongämæ cæquiringä, ante botö ïñömö botö Mæmpocä ingante, Da godömi gocæ, ante apænecæboimpa. Ayæ tömengä botö änö ante do ëñente cædinque edæ, Tömengä mïnitö

tönö cöwë ongonte godongämæ cæcæcäimpa, ante cædinque adocä ingante mīnitō weca da pōnongä pōnguingä ingampa. ¹⁷ Wængonguī nē nō cæcä ingampa, ante nāwangä impa, ante Wængonguī Tæiyæ Waëmō Önōwoca incæ nē odōmongä īnongä ingampa. Incæte waodāni nē inguipogaque quëwënāni īñömō tōmengä ingante adāmaī īnāni inte pōnēnāmaī īñōnāni inte edæ ædō cæte tōmengä ingante Ao ante ænguīnānii. Wæætē edæ tōmengä mīnitō weca quëwënongä īñongante mīnitō tōmengä ingante nē entawenguīmīni inte tōmengä ingante do ate bai pōnēmīni īmīnīpa,” ante Itota apænecantapa.

¹⁸ Ayæ apænedinque, “Botō wīī mīnitō nōwamīni bai mīni baquinque ante edæ ëmō cæte goquīmo īmopa. Wæætē mīnitō weca ocæ ëmænte poncæboimpa. ¹⁹ Wantæ ate waodāni nē inguipogaque quëwënāni īñömō edæ botō īmote adāmaī inguīnāni īnānīpa. Mīnitō guiquënë botō īmote aquīmīni īmīnīpa. Edæ botō quëwëmo beyænque mīnitō adobai quëwencæmīnīpa. ²⁰ Ayæ Wængonguī Tæiyæ Waëmō Önōwoca nānō pōnguiōnæ īñonte mīnitō īñömō edæ, Mōnō æbānō āanque bai quëwëmō īmōö, ante ëñencæmīnīpa. Edæ, Botō Mæmpocä nempo quëwëmo īmopa, ante ayæ edæ, Mīnitō botō nempo quëwëmīni īmīnīpa, ante ayæ, Mīnitō imīnite adobai botō entawëmo quëwënōmīni īmīnīpa, ante mīnitō ëñencæmīnīpa. ²¹ Æcānō botō wææ angainō ö ænīnque ëñente cæda tōmengä īñömō botō īmote nē waadete pōnengä ingampa. Botō īmote nē waadete pōnengä ingante botō Mæmpo nāëmæ waadete

pönencæcäimpa. Ayæ botö adobai mäningä ingante waadete pönencæboimpa. Ayæ, Botö æbänö imoo, ante tömengä ingante odömömo acæcäimpa,” ante Itota apænecantapa.

²² Codaa iñömö edæ wii Codaa Icadote wacä Codaa iñömö edæ Itota ingante apænecantapa.

—Awënë iñæmpa bitö mönitö imönite apænedinque, Botö æbänö imoo, ante odömömo acæminimpa, äninque quinante wæætë, Inguipogaque quëwënanäni inänite odömönämaï incæboimpa, ante pönëninque cæbitawo, angantapa.

²³ Itota wæætë,

—Waocä botö imote në waadete pönengä ininque tömengä iñömö botö odömönte apænedö ante ëñente cædongä imaingampa. Botö Mæmpo adocä ingante waadete pönengüingä ingampa. Ayæ mönatö tömengä tönö cöwë godongämæ quëwencæte ante tömengä weca ponguimöna imönapa. ²⁴ Botö imote në waadete pönënämaï ingä guiquënë tömengä iñömö botö odömönte apænedönö ante ëñënämaï cædongä ingampa. Mäninö botö odömönte apænebo mïni ëñëninö iñömö wii botö nämä pönëninque apænedinö impa. Wæætë botö imote në da pönongaingä nänö angainö impa, ante Itota apænecantapa.

²⁵ Ayæ apænedinque, “Minitö weca botö quëwëñedë botö mäninö ante mïnitö imönite apænetabopa. ²⁶ Botö Mæmpocä botö ëmowo beyæ ante tömengä Tæiyæ Waëmö Önöwoca ingante da pönongä ponguingä inte tömengä mïnitö tönö godongämæ në cædongä ingampa. Adocä mïnitö imönite tömänö ante odömönte apænecä ëñencæminimpa. Ayæ botö apænedö mïni ëñëninö

tömänö ante tömengä adodö apæ necä wæætë pönencæminimpa,” ante Itota apæ necantapa.

²⁷ Ayæ apænedinque, “Botö pönö cæbo beyænque mīnitö gänë entawente quëwëedäni, ante pönö cædinque gobopa. Botö gänë entawëmämo incæ mīnitö imīnite pönömo æninque mīnitö gänë pönente quëwencæminimpa. Botö inguipogaque quëwënäni nāni godönö bai wīi pönömo imopa. Nö cæte pönömo imopa. Mīnitö mīmönë guiñente wädämaī inte piyænë cæte quëwencæminimpa. ²⁸ Botö mīnitö imīnite emö cæte godinque mīnitö weca ocæ emænte poncæboimpa, ante botö apænebo ëñëmīnitapa. Botö edæ, Botö Mæmpocä weca gocæboimpa, ante apænebo ëñënīmīni inte mīnitö botö imote waadete pönëmīni īninque botö beyæ ante watapæ tobaīmīnīpa. Edæ botö wīi botö Mæmpo bai inömo inte wädämo inömo imopa. ²⁹ Mänömaī īinque ba adinque mīnitö, Nāwangä impa, ante pönencæminimpa, ante botö ñöwoque ayæ badämaī īñedë mīnitö imīnite apænetabopa,” ante Itota apæ necantapa.

³⁰ Ayæ apænedinque, “Īi inguipogaque quëwënäni awënë īñömö wënæ inongä inte oo poncæ cæcampa. Īininque botö mīnitö imīnite wīi wantæpiyæ ayæ apænebopa. Edæ tömengä ædö cæte botö imote nāmä tæi pīñænte në angä inguingä. ³¹ Incæte botö, Waodäni inguipogaque quëwënäni īñömö īīmaī ante ëñencædānīpa, ante cæbopa. Botö Mæmpo ingante botö waadete pönëmopa, ante ayæ, Botö Mæmpo botö imo wææ angä bai botö adodö cæbo imopa, ante tömënäni ëñenguënänäni inānīpa,” ante Itota īinque

apænegacäimpa.

Ayæ, “Ñöwo edæ ængæ gantidique mönö gocäimpa,” angacäimpa.

15

Itota näwä yowementa bai ingampa

¹ Ayæ godömenque apænedinque Itota iïmaï apænecantapa. “Botö näwä yowementa bai imopa. Ayæ botö Mæmpo yowementa në aacä bai ingampa. ² Botö imote pönänäni tömänäni iï yowementa gädëmænto bai inänipa. Æcänö wii botö emiñængä bai cæda tömengä iñömö gädëmænto ömæcato bai ingampa. Botö Mæmpo gädëmænto ömæcato bai iñongante wangö topænte bai cædinque tömengä ingante wido cæcampa. Æcänö botö emiñængä bai cæda guiquënë tömengä gädëmænto tömenca incato bai ingampa. Gädëmænto tömenca incato incæ godömenque waa pædinque nanguï incacäimpa, ante wææ topæ wææ topæ cædäni bai botö Mæmpo iñömö adobai cæcampa. Botö në emiñængä wii eyepæ cæcä adinque tömengä ingante wadæ cæcampa. ³ Botö änö ante minitö iminite botö apænedinö beyæ minitö mimönë do mënongate quëwëmini iminipa. ⁴ Minitö botö nempo ee quëwënömini incæminimpa. Ayæ adobai minitö botö imote cöwë entawente quëwënömini iminipa. Gädëmænto yowementa adoyömö ibænte odæ yate bai pæte incate bapa. Edæ gädëmænto adotoque iñonte ædö cæte nämä cædinque incaquinto. Minitö iñömö, Tömenca incate bai mönö nanguï cæcäimpa, ante cædinque

botö nempo ee quëwenguënëmïni ïminipa,” ante Itota apænecantapa.

⁵ Ayæ apænedinque, “Botö yowementa bai ïmopa. Mïnitö guiquënë gædëmænto bai ïminipa. Waocä botö nempo ee quëwënongå inte ayæ botö ïmote cöwë entawënongå ingä ïninqe tömengä tömenca incate bai nanguï cæbaingampa. Wæætë edæ botö nempo quëwënämaï ïmïni ïninqe mïnitö tömää cædämaï ïmaïminipa töö. ⁶ Në botö nempo ee quëwënämaï ingä ïñömö tömengä gædëmænto nani wido cædinto bai ingampa. Mäninto amïmö bay-onte gæte mämö gongapamö ñö cædäni wo bæco bai cædinque tömengä ingante botö Mæmpo adobaï wido cæcä ingampa,” ante Itota apænecantapa.

⁷ Ayæ apænedinque, “Mïnitö guiquënë botö nempo ee quëwëninque botö angainö ante ee entawente quëwëmïni ïninqe mïnitö quiëmë æncæte ante äinëmïni incæ Wængonguï ingante apænemïni inte tömengä wæætë pönongä æmaïminipa. ⁸ Mïnitö nanguï pönï tömenca incate bai ïmïni inte, Mïnitö botö emïñæmïni ïminipa, ante edonque pönï ingæimpa. Mänömaï cæmïni ïninqe, Botö Mæmpo ñäö apäite emönongä ingampa, ante odömonte ingæimpa. ⁹ Botö Mæmpo ïñömö botö ïmo waadete pönengä ingaingä bai botö adobaï mïnitö ïminite waadete pönëmo intabopa. Botö në waadete pönëmo ïñömote mïnitö ïñömö botö nempo ee ongöedäni. ¹⁰ Botö Mæmpo në waadecä ïñongante botö tömengä nänö wææ angainö ante ëñente cædïmo inte tömengä nempo ee ongömopa. Mïnitö adobaï botö në waadete pönëmo ïñömote mïnitö botö wææ angainö ante ëñente cæmïni

ïninque edæ botö nempo ee ongömini ïmaïminipa,”
ante Itota apænetapapa.

¹¹ Ayæ apænedinque, “Botö watapæ topämo
ante mïnitö mïmönë entawëninque watapæ
tocæminimpa, ante ayæ, Mïni watapæ topämo
eyepæ ingæimpa, ante botö mïnitö ïminite mäninö
ante apænetapapa. ¹² Botö wææ änö ïñömö
ïmaï ante impa. Mïnitö ïminite botö waadete
pönëninö bai mïnitö adobai wacä ingä wacä ingä
waadete pönëdäni. ¹³ Æcänö nänö æmigoidi
beyæ ante, Botö Ao äninque nämä incæ tömënäni
beyæ ante wænguïmo, ante cæcä ïñömö tömengä
nänö waadete pönëmämo wïi waodäni tömänäni
waadete pönëmämo bai impa. Tömengä ïñömö edæ
godömenque nanguï waadete pönengä ingampa.
¹⁴ Mïnitö botö wææ angainö ëñente cæmïni ïninque
botö guidëmini ïmaïminipa. ¹⁵ Mïnitö botö ïmo
në cædömini ïminipa, ante botö mïnitö ïminite
godömenque apænedämaï ïmopa. Edæ awënë
ingante në cæcä ïñömö, Awënë æbänö cæcää, ante
ëñënämaingä ingampa. Wæætë edæ botö Mæmpo
nänö angainö ante botö ëñëninö tömänö ante
mïnitö ïminite apænebo ëñëmini beyæ botö, Mïnitö
botö guidëmini ïminipa, ante apænedïmo ïmopa.
¹⁶ Mïnitö wïi botö ïmote apænte ænimini ïminipa.
Wæætë botö ïñömö, Mïnitö botö ëmiñæmini
ïnömini inte tömenca nanguï incate bai nanguï
cæcæminimpa, ante mïnitö ïminite apænte ænïmo
ïmopa. Mïnitö botö ëmiñæmini ïnömini inte cöwë
cæmïni ïninque mïnitö quiëmë ante botö ëmöwo
beyænque apænemini ëñëninque Mæmpocä ïñömö
do pönongä æncæminimpa. ¹⁷ Botö wææ änö ïñömö
ïmaï ante impa. Mïnitö wacä ingä wacä ingä

waadete pönëedäni,” ante Itota apænecacäimpa.

Inguipogaque nē quēwēnāni Itotaidi inānite nāni pīimāmo

¹⁸ Mänömaïnō ante apænedinque Itota godömenque iïmaï ante apænecantapa. “Inguipogaque nē quēwēnāni iñömō mīnitō imīnite pīināni adinque mīnitō guiñēnāmaï inte edæ, Itota ingante do pīingadānimpa, ante pönēmīni imīnipa. ¹⁹ Waodāni nē inguipogaque quēwēnāni nāni cabo wacā ingā wacā ingā waadete pönēnāni inānipa. Mīnitō inguipogaque nāni quēwencabo tönō adomīni imīni bai tōmēnāni mīnitō imīnite adobai waadete pönencædōnānimpa. Wæætē mīnitō inguipoga nāni quēwencabo tönō adomīni ināmaï imīnipa. Iñæmpa wēenēñedē mīnitō inguipoga quēwēñōmīnite botō do mīnitō imīnite apænte æntabopa. Mänömaï beyæ nē inguipogaque quēwēnāni iñömō mīnitō imīnite pīināni inānipa. ²⁰ Botō änō ante mīnitō imīnite, Æbānō apæneboo, ante ñōwo wæætē pönëedāni. ‘Awēnē ñænængä inongä iñongante tōmengä ingante nē cæcä iñömō wīi godömenque ñænængä ingampa.’ Waodāni botō imote pīināni wæwēmo bai mīnitō imīnite adobai pīināni wæwēmīni incæmīnimpa. Botō odōmonte apænecainō ante eñente cædāni bai mīnitō odōmonte apænedō ante adobai eñente cæcædānimpa. ²¹ Mīnitō botō quīmīni iñōmīnite edæ botō emōwo beyænque iināni, Botō imote nē da pönongaingä, Æbānō ingää, ante eñēnāmaï ināni inte mänömaï edæ cæquināni inānipa,” ante Itota apænecantapa.

²² Ayæ apænedinque, “Botö tömënäni inänite wii ponte apænebo bai tömënäni nani wentamö mongænguimämo mongænämaï incædönänimpa. Ñowo iñömö, Botö apænebo në eñëninäni inte tömënäni nani wentamö mongæmämo do mongænänipa. Iñæmpa Itota apænecä eñënämaï imönipa, ante ædö cæte anguinäni. ²³ Botö imote në pïingä iñömö tömengä adobaï botö Mæmpocä ingante pïingä ingampa. ²⁴ Wacä, Botö bamönengæ botö cæbaï adobaï cæcä iñömö cöwë dæ angampa. Inique botö wii tömënäni weca bamönengæ cæbo bai tömënäni nani wentamö mongænguimämo mongænämaï incædönänimpa. Incæte, Botö æbänö cæboo, ante do adäni incæ tömënäni botö imote pïinique botö Mæmpo ingante adobaï pïinänitapa. ²⁵ Dodäni nani wææ yewæmongaintaa yewæmöninque iïmaï ante nani apænegainö bai ñowodäni nani cædö beyæ edæ iinque batimpa. ‘Botö imote önonque pïinänitapa,’ ante yewæmongadänimpa,” ante Itota apænecantapa.

²⁶ Ayæ apænedinque, “Botö edæ botö Mæmpo weca ocæ emænte gote ate mïnitö beyæ ante mïnitö tönö godongämæ cæquingä ingante da pönoncæboimpa. Mäningä iñömö Wængongui Tæiyæ Waëmö Önöwoca inongä inte edæ, Æbänö näwangä i, ante apænecä eñencæminimpa. Tömengä botö Mæmpo weca quëwente ponguingä ingampa. Pöninque tömengä, Botö æbänö cæboo, ante apænecä eñencæminimpa. ²⁷ Mïnitö adobaï wëenëñedë botö mä cæyedë do botö miñæ godimïni imïni inte edæ, Botö æbänö cæboo, ante

apænequënēmīni imīnīpa,” ante Itota tōmengä nänö nē emīñænāni inānite apænegacäimpa.

16

¹ Godōmenque apænedinque Itota iīmaī apænecantapa. “Mīnitō oda cædāmaī tæi gongænte ongoncæmīnīpa, ante cædinque botō mīnitō imīnite mānīnō ante tōmānō apænetabopa. ² Mīnitō odōmōincōnē go guīiyōmīnite wadāni, Mōnitō tōnō godongāmæ ongōnāmaī iedāni, ante mīnitō imīnite tatodōnāni gocæmīnīpa. Wīi mānīnonque cæquīnānīpa. Wæætē iīncayæ ate æcāmenque mīnitō imīnite nē wænonguīna ina iñōmō tōmengä, Botō Wængonguī nänö cædō ante cæbopa, ante pōnencæcäimpa. ³ Botō Mæmpo ingante wīi adinque pōnēnāmaī ināni inte ayæ botō imote adāmaī inte bai pōnēnāmaī ināni iñōmō tōmēnāni iñōmō mīnitō imīnite mānīnō cæquīnāni inānīpa. ⁴ Edæ mānīōnæ bayonte mīnitō, Botō wææ angainō ante æbānō āmoo, ante wæætē pōnencæmīnīpa, ante botō mīnitō imīnite mānīnō ante do apænetabopa,” ante Itota apænegacäimpa.

Wængonguī Tæiyæ Waēmō Öñōwoca nänö cædō

Ayæ godōmenque apænedinque Itota iīmaī apænecantapa. “Mīnitō tōnō wēēnēñedē godongāmæ ongōmo beyæ botō mānīnō ante māniñedē apænedāmaī intabopa. ⁵ Botō imo nē da pōnongaingä weca botō ñōwo pōni ocæ emænte goquīmo incæte, Bitō æyōmōnō goquīmi, ante mīnitō tōmāmīni botō imote änāmaī imīnīpa. ⁶ Botō mānīnō āmo beyæ mīnitō nanguī pōni wæwēmīni imīnīpa. ⁷ Incæte botō mīnitō imīnite

nāwangä ämopa. Minitö beyæ waa ingæimpa, ante botö goquimo imopa. Botö wadæ godämaï imo bai minitö tönö godongämæ nē cæquiringä iñömö minitö weca pönämaï incædongäimpa. Wæætē edæ cōwē goquimo inte godinque botö tömengä ingante minitö weca da pönömo ponguingä ingampa. ⁸ Pöninque Wængongui Tæiyæ Waëmö Önöwoca cæcä beyænque inguipogaque quëwënäni, Mönö wënæ wënæ cædomö inte wentamö mongæmö awædö, ante wæcædänimpa. Ayæ tömengä cæcä beyænque, Wængongui weca æcänö nö cæte quëwëna ina, ante ëñencædänimpa. Ayæ Wængongui apænte ante pancæcäimpa, ante adobai ëñencædänimpa. ⁹ Edæ botö imote nani pönënämaï inö beyænque inguipogaque quëwënäni iñömö edæ, Mönö wënæ wënæ cædonque ante cædinque pönënämaï imopa, ante wæcædänimpa, ante adocä cæcæcäimpa. ¹⁰ Ayæ edæ, Botö iñömö botö Mæmpo weca gote quëwëñömote minitö botö imote adämaï inguimini iminipa. Ininque botö Mæmpo weca gote quëwëmo beyæ Wængongui Tæiyæ Waëmö Önöwoca incæ, Æbänö nö cæte quëwenguï, ante inguipogaque quëwënäni inänite odömonte apænecä ëñencædänimpa. ¹¹ Ayæ inguipogaque quëwënäni awënë iñongante wënæ ingante Wængongui, Botö pancæboimpa, ante do apænte angacäimpa, ante Wængongui Tæiyæ Waëmö Önöwoca godö odömonte apænecä beyænque ëñencædänimpa,” ante Itota apænecantapa.

¹² Ayæ apænedinque, “Botö minitö iminite nanguï ayæ apæneinente wæbo incæte minitö

ñowo ganca ædö cæte eñenguimīnii. ¹³ Wængonguī Tæiyæ Waëmō Önowoca pongä ate tömengä iñömō, Æbänō nāwangä impa, ante tömänō ante mīnitō imīnite odömōnte apæ necä eñencæmīnimpa. Adocä, Æbänō apænequimoo, ante wīi nāmā pönēninque apæ necæcäimpa. Wæætē Wængonguī tömengä ingante angä nänō eñēninō ante Wængonguī Önowoca iñömō mäninonque ante mīnitō imīnite odömōnte apæ necä eñencæmīnimpa. Ayæ, İncayæ ate æbänō baquīi, ante tömengä mīnitō imīnite apæ necä eñencæmīnimpa. ¹⁴ Botō æbänō ñāō apāite emönōmo imopa, ante edonque pōni bacæimpa, ante cædinque tömengä iñömō botō entawēnō ante mīnitō imīnite odömōnte apæ necä eñencæmīnimpa. ¹⁵ Botō Mæmpo nänō eadoncoo iñömō edæ tömancoo botō quincōo impa. Mänōmaī beyæ iīmaī apænetabopa. Tömēmo entawencōo ante Wængonguī Önowoca iñömō mīnitō imīnite odömōnte apæ necä eñencæmīnimpa, ante apænetabopa,” angantapa.

¹⁶ “Ayæ wantæ ate mīnitō botō imote adāmaī inguīmīni imīnīpa. Ayæ ate wantæyō iñonte botō imote wæætē acæmīnimpa,” ante Itota apænegacäimpa.

Mini wæwēmāmo incæ wæætē mīni toquinque bacæimpa

¹⁷ Tömengä emīñænāni pancadāniya nāmanque godongāmæ apænedinque,

—Mäninō āninque tömengä, Mīnitō wantæ ate botō imote adāmaī inguīmīni imīnīpa, ante æbänō ancæte ante apæ necäā, ante wædānitapa. Ayæ, Wantæ iñonte mīnitō botō imote wæætē

acæminimpa, ante ayæ, Botö Mæmpo weca gote quëwëmo beyæ impa, ante Itota apæ necä awædö, ante apænedänitapa. ¹⁸ Tömënäni wæætë wæætë, Mäninö tömengä, Wantæyö, ante nänö änö iñömö edæ æbänö ante apæ necää, ante wædänitapa. Tömengä æbänö ancæte ante apæ necää, ante eñenämäi imönipa, ante wædänitapa.

¹⁹ Tömënäni mäninö ante pönëninque botö imote eñencæte ante äinënäni inänipa, ante wædinque Itota tömënäni inänite,

—Wantæ ate minitö botö imote adämaï inguimäni iminipa, ante botö änö ante ayæ, Wantæyö iñonte minitö botö imote wæætë acæminimpa, ante botö æbänö ämoo, ante minitö nämanque godongämæ tedeminitawo. ²⁰ Minitö iminite näwangä ämopa. Inguipogaque quëwënäni iñömö watapæ toyönäni minitö caate wæquimäni inte Ca ca wæcæminimpa. Minitö wæwenguimäni iminipa. Incæte mimi wæwëmämo incæ mimi toquinque bacæimpa.

²¹ Onquiyængä iñömö tömengä wëñæ eñacæ cæyedë nanguï nantate wæcä inte wæwengä bacä incæte tömengä wëñæ eñacä adinque tömengä, Botö wë eñacä ingampa, ante watapæ tote beyæ tömengä nänö wædinö ante edæ pönënämäi ingampa. ²² Minitö tömengä bai adobai iminipa. Nöwoyedë mimi caate wæyedë impa. Incæte botö wæætë minitö iminite aquimo imopa. Mänömaï beyæ minitö watapæ tocæminimpa. Mäniñedë, Minitö todämaï incæminimpa, ante æcämenque incæ wææ cädämaï incæcäimpa.

²³ Godömenque apænedinque Itota, “Mäniñedë minitö botö imote, Æbänö i, ante eñencæte ante godömenque änämäi incæminimpa. Minitö

iminite näwangä ämopa. Botö Mæmpo ingante minitö quiëmë æncæte ante botö ëmöwo ante apæneyömini tömengä iñömö do pönongä æncæminimpa. ²⁴ Nöwo ganca minitö quiëmë æncæte ante botö ëmöwo ante apænedämaï inimini iminipa. Nöwo iñömö edæ, Pönömi æmönie, ante Wængongui ingante apæneedäni. Apænemini ëñëninque tömengä pönongä æninque minitö eyepæ pönï mini watapæ toquinque ænguimini incæminimpa,” ante Itota apænegacäimpa.

Itota në tæi ëmönongä ingampa

²⁵ Mänömainö ante apænedinque Itota iïmaï apænecantapa. “Minitö iminite inguipoga quëwënäni näni cæbainö ante odömonte apænedimo incæte botö wantæyö baquiönæ inque bayonte mänömainö ante godömenque odömonte apænedämaï incæboimpa. Wæætë botö tömëmo Mæmpo ingantedö ante apænedinque minitö iminite edonque pönï apænecæboimpa. ²⁶ Mänionæ minitö botö Mæmpo ingante botö ëmöwo beyænque apænequimini iminipa. İinque botö, Minitö beyæ ante botö Mæmpo ingante apænequimo imopa, ante mänömaï beyæ botö änämaï imopa. ²⁷ Edæ botö Mæmpo incæ minitö iminite waadete pönengä ingampa. Botö imo waadete pönëninque minitö iñömö edæ, Wængongui weca quëwëninque Itota pongaingä ingampa, ante pönënimini beyæ botö Mæmpo adobaï minitö iminite waadete pönengä ingampa. ²⁸ Botö edæ Mæmpocä weca quëwente inguipoga iñömö pönimo inte ñöwo pönï inguipoga quëwëninque wadæ godinque Mæmpocä weca ocæ ëmænte goquimo imopa,” ante Itota apænecantapa.

29 Tömengä emiñænäni,

—Nöwo inguipoga quëwënäni nänäni cæbainö ante odömonte apænedämaï inte bitö edonque pönï apænebi eñëmönipa. 30 Bitö tömänö ante eñëmi imipa, ante nöwo eñëmönipa. Inique mönitö, Æbänö i, ante eñencæte ante bitö imite änämaï iñömöni bitö iñömö do nē eñëmi imipa. Mänömaï beyæ mönitö, Bitö Wængonguï weca quëwente pönimi inte nē eñëmi imipa, ante do pönëmöni imönipa.

31 Ante äñönäni Itota wæætë,

—Nöwo tæcæ pönëmïni iminitawo. 32 Wantæyö bayedë iñömö edæ nöwo pönï batimpa. Mäniñedë mïnitö botö imote emö cæte panguimæ panguimæ wodii winöningue tömëmïni oncönë go guiquimïni imïnipa. Botö imo adoboque emö cæte gomïni incæte botö iñæmpa wïi adoboque ongömopa. Edæ botö Mæmpo botö tönö godongämæ ongongampa. 33 Mïnitö iñömö botö nempo quëwëmïni inte gänë pönente quëwencæmïnipa, ante cædinque botö mäninö ante mïnitö iminite apænetabopa. Ii inguipoga quëwëningue mïnitö caate wæcæmïnipa. Incæte mïni wæwenguimämo ante guiñenämaï iedäni. Edæ inguipogaque ante nänäni wënæ wënæ cædönö ante Baa äningue botö godömenque tæi emönömo inte nē gänä cægaimo imopa. Mänömaïnö ante Itota tömengä nänö emiñænäni inänite iinque apænecä eñengadänipa.

17

Itota Mæmpo ingante mönö beyæ ante apænecampa

¹ Itota mänömainö ante iinque apænedinque öönædē æmō adinque iīmaī apænecantapa. “Mæmpo ēñēmi. Bitö, Æbänö baquī, ante bitö angainö bai do batimpa. Botö edæ, Bitö Wëmo inömo iñömote bitö pönö cæbi ate botö ñäö apäite bai botö emönö iñömö edonque pönī bacæimpa, ante apænebopa. Mänömaī cæbi adinque botö wæætē bitö beyæ pönö cæbo ate bitö ñäö emömämo edonque pönī bacæimpa. ² Bitö pædæ pönömi botö nē ængaināni inänite botö cöwē wantæpiyæ nāni quëwenguinö ante godömo æncædänimpa, ante bitö botö tönö godongämæ cæbi beyænque botö waodāni tömänāni inänite nē ämo batabopa. ³ Waodāni cöwē wantæpiyæ nāni wænāmaī quëwenguinö ante iīmaī impa. Mæmpo, bitö adobique nāwä Wængonguī inömi iñömote tömēnāni bitö imite ate bai pönencædänimpa. Ayæ botö Itota Coditobo bitö nē da pönongaīmo iñömote do adinque tömēnāni pönencædänimpa. Tömēnāni mänömaī nāni pönēnö beyænque edæ cöwē wantæpiyæ nāni wænāmaī quëwenguimämo edæ do ëadänipa,” ante Itota apænecantapa.

⁴ Ayæ Mæmpo ingante godömenque apænedinque, “Bitö, Iīmaī cæe, ante bitö angainö ante botö inguipoga quëwëninque do iinque cæbo beyæ bitö ñäö emömämo edonque pönī bagatimpa. ⁵ Wëēñēdē pönī inguipoga badönāmaī iñedē bitö weca ongöninque botö ñäö emongaīmo inte ñöwo bitö weca ocæ emænte pömo adinque bitö pönö cæbi ate botö adobo ñäö apäite bai emömo ate edæ edonque pönī acæimpa,” Mæmpo ingante apænecantapa.

⁶ Ayæ, “Inguipoga quëwēnāni bitö quīnāni

inänipa, ante bitö pædæ pönömi æninque botö wæætë, Wængongui æcänö ingää, ante tömënäni inänite odömömo ëñënänitapa. Adodäni bitö quinäni iñönänite bitö tömënäni inänite pædæ pönömi æntabopa. Tömënäni bitö angainö ante ëñente cædinäni inänipa. ⁷ Bitö pönömi æninque botö ewocagaincoo ante iinäni iñömö edæ, Mänincoo tömancoo edæ Mæmpocä pönongä æninque Itota ewocacampa, ante ñowo do ëñënänipa. ⁸ Edæ Mæmpo bitö pönö apænebi botö ëñente ængainö ante botö adodö ante edæ tömënäni inänite godö apænebo ëñëninque tömënäni do ænänitapa. Botö bitö weca quëwente pongaïmo imopa, ante ëñëninque tömënäni ædæmö ëñënänitapa. Ayæ, Bitö botö imote da pönömi në pongaïmo imopa, ante pönënänitapa,” ante Itota Mæmpocä ingante apænecantapa.

⁹ Ayæ, “Mæmpo, botö tömënäni beyæ ante bitö imite apænebopa. Botö wii ingui-pogaque quëwënäni beyæ ante apænebopa. Wæætë edæ, Bitö në pædæ pönömi botö ængainäni iñömö edæ bitö quinäni inänipa, ante botö tömënäni beyæ ante bitö imite apænebopa. ¹⁰ Botö quinäni tömänäni bitö quinäni inänipa. Ayæ bitö quinäni tömänäni botö quinäni adobai inänipa. Tömënäni cædäni beyænque botö ñäö emömämo edonque pöni batimpa.”

¹¹ Ante apænedinque Itota godömenque apænecantapa. “Botö ingui-poga iñömö godömenque ongönämaï incæboimpa. Wæætë bitö weca ocæ emænte ponguïmo imopa. Botö emiñænäni guiquënë ingui-poga iñömö ayæ ongönäni inänipa. Mæmpo bitö në Tæiyæ

Waemö inömi inte eñemi. Bitö emöwo bitö pönö pemongaiwo beyænque botö tæi piñænte nê ämo imopa. Inique mönatö äawoqaque bai ewocate quëwëmöna bai mäninäni adobai äawoqaque bai ewocate quëwencädänimpa, ante cædinque bitö tæi piñæmi inte tömënäni inänite wææ aacæbiimpa, ante bitö imite apænebopa. ¹² Mäninäni weca botö quëwëñedë botö iñömö bitö emöwo bitö pönö pemongaiwo beyænque botö tömënäni inänite wææ aatabopa. Ayæ, Wë womönämaï incädänimpa, ante adodäni inänite wææ gampotabopa. Inique tömënäni tömänäni wë womönämaï inänipa. Önonque adocanque iñömö æmæwo wë womonguëngä incæ tömengä iñömö edæ Wængonguï angä eñente nani yewæmongainö bai ñöwo inque baquinque ante edæ æmæwo wë womongantapa,” ante Itota Mæmpocä ingante apænecantapa.

¹³ Ayæ, “Botö ñöwo bitö weca ocæ emænte ponguïmo imopa. Tömënäni botö watapæ topämo tömämämo entawëninque quëwencädänimpa, ante botö mäninö ante inguipoga ayæ quëwëñedë apænebo imopa. ¹⁴ Mæmpo, bitö angainö ante botö tömënäni inänite godö apænebo eñënanitapa. Botö inguipogaque nani quëwencabo tönö adobo inämaï imo bai tömënäni edæ adobai inguipogaque nani quëwencabo tönö adodäni inämaï inäni adinque inguipogaque quëwënäni wæætë tömënäni inänite piñänitapa. ¹⁵ Mæmpo eñemi. Bitö botö emiñænäni inänite, Minitö inguipoga iñömö ayæ quëwënämaï incæminimpa, ante ænte mäobi gocädänimpa, ante botö bitö imite apænedämaï imopa. Wæætë,

Wënæ awënë nē wīwa cædongä iñömö tōmënäni inänite, Oda cæcædänimpa, ante cæyongante bitö wææ aabi ate tōmënäni wæætë oda cædämaï incædänimpa, ante bitö ïmite apænebopa. ¹⁶ Botö inguipogaque nāni quëwencabo tönö adobo ināmaï ïmo baï tōmënäni edæ adobaï inguipogaque nāni quëwencabo tönö adodäni ināmaï inänipa. ¹⁷ Bitö änö iñömö edæ nāwangä ante impa. Ìninqe bitö godö cæbi ate nāwangä bitö änö beyænque tōmënäni iñömö tōmëmi cædonque ante cædinque tæiyæ waëmö ëwocate quëwënäni incædänimpa, ante bitö ïmite apænebopa. ¹⁸ Bitö botö ïmote inguipoga iñömö bitö da pönömi pömo baï botö adobaï tōmënäni inänite inguipoga quëwënäni weca da godömo godänitapa. ¹⁹ Tōmënäni iñömö bitö cædonque ante cædinque tæiyæ waëmö ëwocate quëwënäni incædänimpa, ante botö iñömö edæ bitö cædonque ante Ao äninque, Botö nāmā incæ tōmënäni beyæ ante wænguïmo ïmopa,” ante Itota apænecantapa.

²⁰ “Mæmpo ëñëmi. Botö wīi botö ëmiñænänique beyæ ante bitö ïmite apænebopa. Wæætë tōmënäni botö angainö ante apænedäni ëñente pönëninque wadäni nē wede pönenguināni iñönänite botö iināni beyæ ante adobaï bitö ïmite apænebopa. ²¹ Mæmpo, Bitö ïmite botö entawëmo ïmo baï ayæ botö bitö nempo quëwëmo ïmo baï mänināni tōmānāni adobaï äawocaque baï ëwocate quëwëmainānipa, ante cæcæbiimpa, ante bitö ïmite apænebopa. Ayæ inguipoga quëwënäni iñömö, Bitö botö ïmote da pönömi pongaïmo ïmopa, ante pönencædänimpa, ante cædinque bitö godö cæbi ate tōmënäni mönatö nempo quëwencædänimpa,

ante bitö imite apænebopa. ²² Bitö pönö cæbi beyænque botö ñäö bai entawëninque, Mönatö äawoqaque bai ewocate quëwëmöna bai tömënäni adobai äawoqaque bai ewocate quëwencæðänimpa, ante botö iñömö bitö pönönimämo botö ñäö entawëmämo tömënäni inänite adopämo godömo ænte entawënänipa. ²³ Tömënäni äawoqaque bai ewocate quëwencæðänimpa, ante tömënäni botö imote entawënänipa. Ayæ botö bitö imite entawëmo imopa. Tömënäni mänömaï äawoqaque bai ewocadäni adinque inguipoga quëwënäni iñömö, Bitö botö imote në da pönömi pongaïmo imopa, ante ëñencæðänimpa, ante apænebopa. Ayæ botö imote waadete pönengaïmi imi bai bitö tömënäni inänite adobai waadete pönengaïmi imipa, ante ëñencæðänimpa, ante apænebopa,” ante Mæmpocä ingante Itota apæncantapa.

²⁴ Ayæ, “Mæmpo, Bitö pædæ pönömi botö në ængainäni iñömö botö ñäö ëmömämo acæðänimpa, ante botö, Tömënäni botö quëwëñömö adoyömö quëwencæðänimpa, ante ainente wæbopa. Wëenëñedë pönï inguipoga badönämaï iñedë bitö iñömö edæ botö imote waadete pönëninque botö ñäö ëmömämo pönömi botö ængaïmämo tömënäni adopämo acæðänimpa, ante ainente wæbopa. ²⁵ Mæmpo në nö cædömi imi ëñëmi. Inguipogaque quëwënäni bitö imite wii adinque pönënämaï inäni incæte botö iñömö edæ bitö imite do ate pönëmo imopa. Botö ëmiñænäni iñömö, Bitö botö imote da pönömi në pongaïmo imopa, ante do ëñënänitapa. ²⁶ Botö cæbo beyænque mäninäni iñömö, Bitö imite ate bai pönënanitapa. Botö imote bitö waadete pönënö ante adodö waadete pönënö tömënäni

mimönë entawente quëwencædänimpa, ante ayæ, Tömënanï botö ïmote entawencædänimpa, ante botö ayæ cæbo beyænque tömënanï iñömö, Bitö ïmite ate bai pönencædänimpa,” ante Itota Mæmpo ingante iinque apænegacäimpa.

18

Itota ingante bæi ongonte ænte godänipa

(Mäateo 26.47-56; Mäadoco 14.43-50; Odoca 22.47-53)

¹ Wængonguï ingante iinque apænedinque Itota tömengä ëmiñænänï tönö wadæ godinque Quedodöo biyönæ æmæ wedeca godänitapa. Æmæ wedeca odibowæncodë nänï ancodë i iinque Itota tömengä ëmiñænänï tönö mänincodë pö guiidänitapa. ² Itota ingante në odömonguingä Codaa iñömö Itota tömengä ëmiñænänï tönö mänincodë wantæ iñö wantæ iñö gote ongönänï iinque Itota ingante në odömonguingä Codaa iñömö mänincodë do adingä inongäimpa. ³ Iinque tontadoidi adocaboque inänite æninque Codaa iñömö edæ täno beyænte adocodë pongantapa. Ayæ, Wængonguï qui, ante në godönänï ñænænänï tönö Paditeoidi nänï wææ wänönänï inänite Codaa nempo godönänï æningä inte tömengä tömënanï inänite tontadoidi tönö ænte mämongä pönänitapa. Pöninque tömënanï gonga ticainë næænte gongapæncade ticainë nææninque yaëmë næænte Codaa miñæ pönänitapa. ⁴ Itota nämä ante, Æbänö bate wæquimoo, ante tömää ëñëongä inte awænë tao godinque tömënanï inänite,

—Æcänö ingante ante diqui diqui minte pömïni.

⁵ Ante añongä tömënanï wæætë,

—Itota Näatadeta në quëwëningä ingante ämönipa.

Änäni ëñëninge,

—Botö tömëmo ïmopa, ante Itota apænedintapa.

Ayæ në odömonguingä Codaa ïñömö tömënäni weca a ongönongäimpa. ⁶ Itota ïñömö, “Botö tömëmo ïmopa,” ante äñongä tömënäni gä godinque onguipoga tæ go wæænänitapa. ⁷ Tæ go wæænäni adinque tömengä adodö,

—Æcänö ingante ante diqui diqui minte pömïni.

Ante äñongä tömënäni wæætë,

—Itota Näatadeta quëwëningä ingante ämönipa.

⁸ Änäni ëñëninge Itota wæætë,

—Botö tömëmo ïmopa, ante do antabopa. Minitö ïñömö botö ïmote ante diqui diqui minte pömïni bai mänïnäni ïnänite bæi ongönämaï ïedäni.

⁹ Itota Mæmpocä ingante do apænedinque, “Bitö edæ pönömi botö ængäinäni ïnänite wææ aabo beyæ adocanque incæ wë womönämaï ïnänitapa,” ante nänö angäinö bai ñöwo ïinque bacæimpa, ante mänömaï angantapa. ¹⁰ Timönö Pegodo ïñömö në yaëmë næængä inte pædæ guipote yaëmë æninque, Wængongui qui, ante në godongä ñænængä pönï ïnongä ingante në cæcä ingante tæi päninque tömëmonca ïnö wangö tamoncacantapa. Pegodo nänö në wangö tamoncadingä ëmowo Mäadoco ëmongä ïnongäimpa. ¹¹ Itota wæætë Pegodo ingante,

—Bitö yaëmë adodö da wëe, äninque, Botö wæwenguimämo ante botö Mæmpo pönongä ænïmo inte wæwenguënëmo ïmopa, angacäimpa.

Itota ingante bæi ongöinque Änato weca ænte godäni

(Mäateo 26.57-58; Mäadoco 14.53-54; Odoca 22.54)

¹² Ayæ odömäno tontadoidi tönö tömënäni awënë ayæ oodeoidi awënëidi tönö Itota ingante bæi ongöinque ænänitapa. Æninque tömengä ingante goto wimpote cädänitapa. ¹³ Ayæ adodäni Änato nänöwäa Caiapato weca Itota ingante ænte mäo godänitapa. Edæ Caiapato iñömö, Wængongui qui, ante nē godongä ñænængä pöni inongä mänii wadepo iñonte inongäimpa. ¹⁴ Caiapato wëenëñedë oodeoidi awënëidi inänite iimaï ante nē änongä inongäimpa. Mönö waocabo beyæ ante adocanque onguiñængä wængä ininque waa imaimpa.

Pegodo incæ, Dicæ abogaa, angampa

(Mäateo 26.69-70; Mäadoco 14.66-68; Odoca 22.55-57)

¹⁵ Itota nänö emiñængä wacä tönö Timönö Pegodo iñömö tömëna iñömö Itota ingante tee empo godatapa. Mäningä iñömö Itota nänö emiñængä iñömö, Wængongui qui, ante nē godongä ñænængä pöni nänö nē adingä inongäimpa. Ininque Itota tönö pöninque tömengä Wængongui ingante nē godongä ñænængä pöni inongä oncö yacömöñäa iñömö pö guicantapa. ¹⁶ Pegodo guiquënë odemö yabæ inö a ongönongäimpa. Wacä Itota miñæ nē gocä iñömö, Wængongui qui, ante nē godongä ñænængä pöni inongä nänö nē adingä iñömö tömengä ocæ emænte pöninque baquēcä odemö nē wææ aacä ingante apænecantapa. Pegodo ingante ämi guicæe, angä eñëninque baquēcä wi ænecä ate tömengä Pegodo

ingante ænte manguicä guicantapa. ¹⁷ Manguicä guiyongä baquēcä odemö nē wææ aacä iñömö Pegodo ingante,

—Bitö adobaï mäningä onguiñængä nänö nē emiñænömi imipa töö.

Äñongä tömengä wæætē,

—Botö wabo imopa, angantapa.

¹⁸ Yogueite ingatimpa. Ayæ nē cædönäni tönö oodeoidi awënëidi wææ wänönäni gongapamö ootoqui, ante nāni tadönī gäänē adiyæ ongonte ootodönänimpa. Pegodo adobaï tömēnāni tönö godongämæ adiyæ ongonte ootocantapa.

Nē godongä ñæncængä Itota ingante angampa
(*Mäateo 26.59-66; Mäadoco 14.55-64; Odoca 22.66-71*)

¹⁹ Mäniñedē Änato iñömö, Wængongui qui, ante nē godongä ñæncængä pönī iñömö Itota ingante, Bitö nē emiñænāni diyæ, änogäimpa. Ayæ Itota nänö odömonte apænegainö ante, Æbänö i, ante tömengä ingante adobaï angantapa. ²⁰ Itota wæætē,

—Woadäni eñeñönänite botö edonque pönī apænebo eñenänitapa. Botö cöwē minitö odömöincönē incæ Wængongui oncö ñæncæncönē incæ oodeoidi tömänāni nāni pöincönē pö guidinque odömonte apænebo eñenänitapa. Botö cöwē awēmö apænedämaï intabopa. ²¹ Bitö botö imote, Æbänö i, ante quinate ämii. Botö imote nē eñenänāni inänite ämi eñente apænedäni eñencæbiimpa. Edæ mänināni ædæmö eñenāni inänipa.

²² Mänömainö angä eñëninque wææ wänongä adocanque iñömö Itota gäänë ongöninque tömengä ingante tæi tamöninque apæ necä,

—Wængonguï quï, ante në godongä ñænængä pöni inongä ingante ædö cæte mänömai ante wæætë anewëë töö.

²³ Ante añongä Itota wæætë,

—Botö wënæ wënæ änimo imo bai bitö botö wënæ wënæ äninö ante, Æbänö i, ante apænebi eñëmoe. Wæætë edæ nawangä ante apænebo inique bitö quinante botö imote tæi tamömipææ, angantapa.

²⁴ Ayæ, Wængonguï quï, ante në godongä ñænængä pöni Caiapato weca gocæcäimpa, ante Änato iñömö Itota ingante ayæ goto wimpoingä iñongante angä eñëninque tömengä ingante ænte gogadänimpa.

Pegodo incæ, Dicæ abogaa, wæætë angampa

(Mäateo 26.71-75; Mäadoco 14.69-72; Odoca 22.58-62)

²⁵ Timönö Pegodo ayæ adiyæ ootoyongante wadäni,

—Bitö tömengä emiñænömi adobai imipa töö.

Änäni eñëninque tömengä,

—Wabo imopa, angantapa.

²⁶ Wængonguï quï, ante në godongä ñænængä pöni inongä ingante në cædäni iñönänite adocanque iñömö Pegodo nänö në wangö tamoncad-ingä guidengä inongäimpa. Tömengä iñömö Pegodo ingante,

—Bitö tömengä miñæ odibowæncodë ongöñedë bitö imi atabopa. Bitö wii imitawo.

27 Ante añongä Pegodo wæætë, Wabo imopa, ante tæcæ anewëñongä tawadiya dobæ pegatimpa.

Pidato weca Itota ongongä

(Mäateo 27.1-2; Mäadoco 15.1-5; Odoca 23.1-5)

28 Tæcæ ñäo bayonte Itota ayæ Caiapato weca ongöñongante oodeidi iñömö, Mönö tömengä ingante odömäno gobedönadodo awënë Pidato weca ænte gocæimpa, ante cædinque awënë oncö boyæ mäodäni gocantapa. Incæte tömënäni dodäni nani wææ angainö beyæ ante guiñente wædinque, Pidato oncönë guuite bai mönitö mimö wentamö ewocamöni incædömönimpa. Ìñæmpa mänömaï cæmöni ïninqe mönitö Patowa mönö ææmæ cæyedë cænguï ædö cæte cænguïmönii, ante wædinque guiidämaï ïñanitapa. 29 Ìninqe Pidato tömënäni weca oncö boyæ taodinqe tömënäni ïñanite,

–Ìngä onguïñængä iñömö quinö wënæ wënæ cæcantawo.

30 Añongä tömënäni wæætë,

–Mäningä wii wënæ wënæ cæcä inte bai mönitö tömengä ingante wii ænte mämö pædæ godömöni æncædömiimpa.

31 Änäni ëñëninque Pidato,

–Minitö tömëmini tömengä ingante ænte godinque mini wææ yewæmongainö bai ante cædinque, Tömengä ingante pangæimpa, ante apænte æedäni.

Äñongä oodeidi awënëidi,

–Ìñæmpa minitö wææ ämini iñömini mönitö cöwë tacamöni wænäni möni cægainö bai ædö cæte

æcämenque ingante wænömöni wænguingää, ante wædänitapa.

³² Odömänoidi mänifnedë wënæ wënæ cædäni inänite awäa töö godömænte timpodinque wææ tüwadinque godö wænönäni inönänimpa. Ininque odömänoidi inänite pædæ godöningue oodeoidi wæætë Itota, Æbänö cædäni wænguimoo, ante do nänö angainö bai ñöwo iinque baquinque cædänitapa. ³³ Mäninö änäni ëñëningue Pidato wæætë oncönë ñænæncönë guidingue Itota ingante añecä pongä adinque, Pidato,

—Bitö oodeoidi Awënë Odeyebi imitawo.

³⁴ Angä ëñente Itota wæætë,

—Bitö nämä pönëningue apænebitawo. Wabänö wacä botö imotedö ante bitö imite apænecä ëñëmitawo.

³⁵ Ante añongä Pidato,

—Botö dicæ oodeobo imogaa. Tömëmi guidënäni tönö Wængongui qui, ante në godönäni ñænænäni iñömö bitö imite mämö pædæ pönönäni æntabopa töö. Bitö quinö wënæ wënæ cæbitawo.

³⁶ Añongante Itota wæætë apænedinque,

—Wii inguipoga quëwënäni änäni beyæ botö Awënë Odeyebo në ingaimo imopa. Botö inguipoga quëwënäni Awënë Odeyebo inte në ämo imo bai botö nempo quëwënäni iñömö botö imote, Bæi ongonte ænte godämaï incædänimpa, ante wææ cædinque oodeoidi tönö guëa wæætedö wæætë cæcædönänimpa. Incæte wii inguipoga quëwënäni änäni beyæ wæætë edæ wayömö quëwengaimo inte botö tömëmo nämä incæ Awënë Odeyebo në ingaimo imopa.

³⁷ Mänömainö ante Itota apænecä iinque Pidato,

—İñæmpa Awënë Odeyebi bitö imitawo.

Äñongante Itota wæætë,

—Bitö tömëmi änö bai botö Awënë Odeyebo inömoimpa. Näwangä ämipa. Botö inömö Wængonguï nänö angainö ante, Näwangä impa, ante inguipoga quëwënanï inänite apæ necæte ante edæ mänii beyænque ante inguipoga inömö pö ëñagaimo imopa. Wængonguï näwangä ante nänö angainö ante Ao ante ëñente në cædäni inömö edæ tömënanï tömänäni botö imote në ëñënanï inänipa, angantapa.

³⁸ Äñongante Pidato,

—Æcämë näwangä angää, angacäimpa.

Itota wæncæcäimpa, änänipa

(Mäateo 27.15-31; Mäadoco 15.6-20; Odoca 23.13-25)

Pidato mänömaï apænedinque wæætë oodeoidi weca oncö boyæ taodique apæ necantapa.

—İngä quïnö wënæ wënæ cæcä ingampa, ante ëñënanämaï imopa. İninque botö dicæ tömengä ingante apænte anguïmo imogaa. ³⁹ Wadepo inö wadepo inö Patowa mini ææmæ cæönæ minitö, Ædänidö tee mönete ongönänii, ante pönëninque adocanque ëmöwo ante botö imote apænedinque, İngä ingante ñimpo cæbi goquingä, ante cöwë äminipa. İninque adocanque ingante, İngä inömö mini apænedongä ingampa, ante botö tömengä ingante ñimpo cæbo ate ænte gomini inöminimpa. İninque ñöwo diyæ. Minitö, Oodeomöni Odeye inöngante pönö ñimpo cæbi abæ tawænte goguinga, äminitawo.

⁴⁰ Äñongante tömënanï yedæ tededinque,

—Mäningä ingante dicæ ämöniyaa. Wæætë Badabato ingante ñimpo cæbi gocæe, ante tedewengadänimpa.

Badabato wëenëñedë wadäni tönö, Odömäno tæiyæ awënë ingante wido cæcæimpa, ante cædingä inongäimpa.

19

¹ Ayæ Pidato angä ate Itota ingante bæi ongonte mäo æmontaiya tæi tæi pänänitapa. ² Tontadoidi daa mongæmenca æninque que que cædinque, Awënë poganta, ante pönö da wencadänitapa. Awënë weocoo wëñacæbiimpa, ante badete tote bai cædinque Itota ingante opatawæ ëmoncoo pönö daga wëñadänitapa. ³ Daga wëñadinque tömënäni wæætë wæætë tömengä weca ponte äninque,

—Badogaa, bitö oodeo awënë odeyebi imipææ.

Ante badete todinque tömengä ingante tæi tamönänitapa.

⁴ Pidato tömënäni weca oncö boyæ adopoque ayæ tadinque oodeoidi inänite apænedinque,

—İngä iñömö æbänö cæcantawo, ante ëñencæte ante cæbo ate tömengä wënæ wënæ nänö cædö ante dicæ abogaa. Minitö mänömainö ante ëñencæminimpa, ante botö tömengä ingante minitö weca ænte mantabo tacä aedäni, angantapa.

⁵ Itota daa mongæmenca poganta encadinque opatawæ ëmoncoo mongænte tayongä Pidato tömënäni inänite,

—İngä onguïñængä ongongä aedäni.

⁶ Tömengä ingante adinque, Wængonguï qui, ante në godönäni ñænænäni tönö adodäni inänite në wææ wänönäni iñömö yedæ tedewëninque,

—Awæ ñænquedimæ cæte ämi wænönäni wængæe. Ämi wænönäni wængæe.

Ante ancaa änewänäni eññinque Pidato wæætë,

—Minitö iñæmpa tömengä ingante æninque awæ ñænquedimæ cæte wænömïni wængæe. Botö guiquënë iingä wænæ wænæ nänö cædö ante dicæ abogaa.

⁷ Pidato añongä oodeoidi wæætë iïmaï tedewänanitapa.

—Mönitö wææ yewæmongainö ante eññente quëwëmöni imönipa. Iingä iñömö edæ nämä ante edæ, Wængonguï Wëmo inömo imopa, ante cædinque edæ mäninö möni wææ yewæmongainö ante eññenämaï cæcampa. Mänömaï eññenämaï inte cæcä beyæ tömengä nē wænguënengä ingampa.

⁸ Mänömainö änäni eññinque Pidato godömenque guïñente wædinque, ⁹ oncönē ñænæncönē adodö pö guiidinque Itota ingante,

—Bitö ædönö quëwente pömi imii.

Ante añongä Itota guiquënë pæ wëenecä.

¹⁰ Adinque Pidato tömengä ingante,

—Bitö quïnante botö imo tededämaï imii. Botö nämä nē tæï piñænte ämo inömo inte ämo ininque ñimpo cædäni gobaimipa. Botö wadö ante ämo ininque bitö imite do awæ ñænquedimæ cæte wænönäni wæmaïmipa, ante eññenämaï imitawo.

¹¹ Añongante Itota wæætë,

—Wængonguï bitö tæï piñænte ämämo ante godönämaï ingä bai bitö tömömi tæï ämi imi diyæ botö imote anguïmiyaa. Mänömaï beyæ bitö imite, Wænömi wæncæcäimpa, ante botö imote nē pædæ

pönöningä iñömö edæ godömenque wënæ wënæ cæcä ingampa, ante apæncantapa.

¹² Mänömainö angä eñëninque Pidato, Æbänö ñimpo cæbo goquingää, ante cædongäimpa. Cæyongä oodeoidi wæætë godömenque yedæ änönänimpa,

—Bitö mäningä ingante ñimpo cæbi bai bitö odömäno tæiyæ awënë Tetædo æmigo dicæ imiyaa. Æcämenque iñömö edæ, Botö awënë inömoimpa, ante nē angä inte tömengä iñömö Tetædo ingante nē pñinongä ingampa.

¹³ Mäninö änäni eñëninque Pidato iñömö, Itota ingante ænte tao godinque awënë nänö apænte äimpaa gote tæ contacantapa. Pidato nänö tæ contayömö iñömö, Dicacoo ayadi bai nāni caayömö impa, ante nāni añömö ininque ebedeo tededö, Gabata, nāni añömö inönimpa. ¹⁴ Patowa nāni ææmæ cæyedë inque bayö oodeoidi, Ìimö ate guëmanguionæ inguimpa, ante mönö ñöwoönæque cæcæimpa, ante nāni cæönæ inönimpa. Ìionæ wodo tæcæ bæcä bayonte Pidato oodeoidi inänite,

—Ìingä iñömö mīnitö Odeye inongä ingampa.

¹⁵ Añongante yedæ äninque tömënäni,

—Tömengä ingante wænömi wængæ. Tömengä ingante wænömi wængæ. Awäa timpote ämi wænönäni wængæ.

Ante ancaa anewëñönäni Pidato wæætë,

—Botö iñömö mīnitö Odeye iñongante awäa timpote ämo wænönäni wængæ, ante anewëmīnitawo.

Angä eñëninque Wængonguī quī, ante godönäni ñænænäni iñömö,

—Tetædoque incæ mönitö awënë odeye inongä apa cæbii, änewënönänimpa.

¹⁶ Ancaa änewëñönäni Pidato, Awäa ämo timpote wænömöni wængæedäni, ante Itota ingante tontadoidi inänite pædæ godongä ængadänimpa. Ayæ tömönäni Itota ingante ænte gogadänimpa.

Itota ingante awäa timpodäni wængäimpa

(Mäateo 27.32-44; Mäadoco 15.21-32; Odoca 23.26-43)

¹⁷ Itota incæ tömengä timpoquiwæ æninque mongænte taodinqe “Ocatainö” mönö äñömö pongantapa. Mänñömö ante ebedeo tededö, Godogota, näni äñömö impa. ¹⁸ Mänñömö pöñongante tömönäni awæ ñænquedimæ cædinque tömengä ingante töö godonte timpodinqe wææ tiwadinque ængæ gantidänäni ongongantapa. Ayæ wada inate tömengä weca æmataæ inö æmataæ inö mämö adobaï cæte ængæ gantidänäni wægöñöna Itota tæcæguedë wægongä ingantapa. ¹⁹ Pidato angä yewæmöinta, Näni ëñenguinta, ante yewæmonte æninque ñænquedimæ iwäa wo cædänitapa. “Itota Näatadeta quëwëningä oodeoidi Awënë Odeye inongä ingampa,” ante yewæmonte wo cæte ongongatimpa. ²⁰ Itota ingante näni timpodinñömö eyequei i ininque oodeoidi nangui inäni tömönäni näni quëwëñömö ta pöninque Pidatoidi näni yewæmöninta adänitapa. Mäninta inñömö ebedeo tededö datii tededö guidiego tededö ante yewæmonte ingatimpa. ²¹ Oodeoidi beyæ ante, Wængongui qui, ante në godönäni ñænænäni inñömö Pidato weca godinqe tömengä ingante,

–Bitö, “Oodeoidi Awënë Odeye inongampa,” ante yewæmönämaï inguënë quëwëë. Wæætë tömengä nämä nänö angainö bai, “Botö oodeoidi Awënë Odeyebo inömoimpa, ante nē änewëningä ingampa,” ante yewæmöe.

²² Ante änewëñönäni Pidato wæætë,

–Botö yewæmöninö ante yewæmönimo inte botö wæætë wadö ante yewæmönämaï incæboimpa.

²³ Tontadoidi iñömö tömengä ingante awäa timpote ængæ gantidëñäni wægöñongä tömënäni tömengä weocoo inï æninque mencooga go mencooga cönöninge adocanque adocooque adocanque adocooque æninque tömänäni ænönänimpa. Täno mongæincoo guiquënë ayæ öñoncoopa. Mänincoo iñömö bæbængapaa badönämaï incoo tömancoo adocooque da wëñaque badöi inimpa. ²⁴ Adocooque wänä ñænämaï ingæimpa, ante adodäni godongämæ tedingue,

–Æcänö quince nö ta adingue tömengä mänincoo æncæcäimpa, ante wææntodönänitapa.

Edæ Wængongui angä ëñente dodäni iïmaï ante näni yewæmongainö bai ñöwo iinque baquinque tontadoidi mänömaï cädänitapa. “Edæ botö weocoo inï ö æninque tömënäni näni caboque wacä ingä wacä ingä nēnempodänitapa. Ayæ, Æcänö quince nö ta adingue tömengä mänincoo æncæcäimpa, ante wææntodöninge ænänitapa,” ante näni yewæmongainö bai tontadoidi ñöwo cädänitapa.

²⁵ Itota ingä näni ængæ gantidëñömö tömengä wäänä tönö wäänä tönñacä näna caya ayæ Codeopato nänöogængä Mäadiya tönö wacä

Mäadiya Mäagadadēnā māniñömö pōninque eyequei
a ongōnānitapa. ²⁶ Itota iñömö tömengä wäänä
inante acantapa. Ayæ botö tömengä miñæ nē
godimo iñömö tömengä nänö nē waadebo inōmo
inte tömēnā weca ongōmo adinque Itota tömengä
wäänä inante,

—Badä eñēmi. Māningä iñömö minö wengä
bacæcäimpa.

²⁷ Äninqe tömengä emiñænimo iñömote,

—Botö emiñænimi eñēmi, Māninä iñömö botö
badä incæ bitö badä bacædäimpa, angacäimpa.

İninqe botö Itota nänö nē emiñænimo inte
tömengä nänö änöñedē tāno ænte māmōmo
pōninque tömengä wäänä iñömö botö oncönē cōwē
owodōnāimpa.

Itota incæ wængäimpa

*(Mäateo 27.45-56; Mäadoco 15.33-41; Odoca
23.44-49)*

²⁸ Quinö bacæimpa, ante ñöwo iinque batimpa,
ante nē eñēnongä inte Itota iñömö edæ, Wængongui
angä eñente nāni yewæmongainö bai ñöwo iinque
bacæimpa, ante cædinque,

—Botö gæwænte awædö, ante apænecantapa.

²⁹ Adoyömö biinömæ nāni ämæ bai wædænque
godonte nāni ænimæ owætadē engate ongö
adinque tömēnāni dayömö bai æninque
mānimænē pædæ guidonte aa beyonte wëä
tadonte æninque iitopowænca nāni äwænca
ongontoca goto wencadodinque Itota önöne pædæ
æænö pæ mǎnānitapa. ³⁰ Pæ māñōnāni Itota oo
guēmante bedinque,

—Ñöwo iinque batimpa.

Ante apænedinque tömengä ocabo ædæ wææncadinque tömengä önöwoca wadæ goyöwoca do wængäimpa.

Itota betagonta inö tontado boo tænongä

³¹ Iimö ate, Mönö guëmanguïönæ iñömö Patowa inguïönæ beyæ godömenque waa ëönæpa, ante oodeoidi, Ñöwoönæque cæcæimpa, ante nani cæönæ inimpa. Oodeoidi awënëidi, Awäa nê ongönäni baö mäniwäa guëmanguïönæ ongönämaï incædänimpa, ante Pidato weca godinque tömengä ingante, Iinani nani timpodiwäa nê ongönäni quingæ wæncædänimpa, ante cædinque bitö tömënäni önömënë bamë ämi wadäni taa mænäni do wæncædänimpa. Ayæ tömënäni baö o togænte pædæ wæænonte ämi ænänie, änänitapa. ³² Mänii beyæ tontadoidi pöninque Itota weca täno nani nê ængæ gantidëningä önömënë bamë taa mæninque edæ ayæ nani nê timpodingä wægongä önömënë bamë taa mænänitapa. ³³ Taa mæninque Itota weca pöninque tömengä do wængäi adinque tömengä önömënë taa mænämaï inönänimpa.

³⁴ Wæætë tontado adocanque Itota betagonta inö boo tænöñongä wepæ tönö æpæ guï gotimpa. ³⁵ Botö mäninö bayonte nê adïmo inte, Æbänö näwangä batimpa, ante nö apænebopa. Ayæ, Botö änö ante näwangä impa, ante do ëñëmopa. Minitö adobai ëñente pönencæminimpa, ante apænebopa. ³⁶ Edæ, “Tömengä bamë adomenque incæ taa mænte wædämaï incæcäimpa,” ante Wængongui angä ëñente nani yewæmongainö bai bacæimpa, ante mänömaï batimpa. ³⁷ Ayæ edæ, “Wadäni nani nê boo tænöningä ingante

aquïnäni inänipa,” ante Wængonguï angä eñente wataa näni yewæmongainö bai linque bacæimpa, ante mänömaï batimpa.

Itota wodi baö inï mäo daga wënänipa

(Mäateo 27.57-61; Mäadoco 15.42-47; Odoca 23.50-56)

³⁸ Ayæ ate Adimatea quëwengä Ootee inñömö oodeoidi awënëidi inänite guñente awædö, ante awëmö Itota emiñæningä inongäimpa. Tömengä inñömö Pidato Awënë ingante, Itota wodi baö pönömi ænte wëmoe, angantapa. Pidato Ao angä eñëinque Ootee do pöinque Itota wodi baö timpodiwäa ongöñongante o togænte pædæ wæænonte ængantapa. ³⁹ Ayæ Nïicodemö wëenëñedë Itota weca woyowotæ eñacæ në pöningä inñömö Ootee miñæ pongantapa. Tömengä miidamö näni änömö nanguï ti nämö tönö aadoemö näni änömö nanguï oguï wamö tönö adoyömö näni wempo cædimö todëinta quido ganca ænte pongantapa. ⁴⁰ Ootee tönö Nïicodemö inñömö Itota wodi baö æninque ninocoo näni ancoo guiyancoo incæ doyæncoo mänincoo oguï wamö näna ænte pönimö ænte wäne cædedatapa. Ayæ oodeoidi daga wencæte ante näni cægai bai adobai cædinque tömëna näna wäne cædincoo inte tömengä baö wïni wïni cægadaimpa. ⁴¹ Itota ingante näni timpodinñömö eyequei gönea inimpa. Adodea inñömö miintatodë näni ææ wodinñömö önontatoque inimpa. ⁴² Iimö ate guëmanguionæ inguimpa, ante oodeoidi, Nöwoönæque cæcæimpa, ante näni cæönæ impa, ante beyæ, Ontato eyequei impa,

ante tömënäni Itota wodi baö mäniñömö daga wengadänimpa.

20

Itota nē wæningä incæ ñäni ömæmonte quëwengä

(Mäateo 28.1-10; Mäadoco 16.1-8; Odoca 24.1-12)

¹ Oodeoidi guëmanguïönæ Tabado go ate mönö Dominco tæcæ ooque pönente bayedë Mäadiya Mäagadadënë Itota wodido ponte ayongä dicabo ontato tee mönocæte ante näni da pæñæninca incæ do wëä godö concæi intapa. ² Botö Itota nänö nē waadedïmo tönö Timönö Pegodo iñömö Itota miñæ möna nē godincaya iñömönate Mäadiya Mäagadadënë wæætë, Mänömaï impa, ante adinque mönatö weca pogodo ponte apænecantapa,

—Awënë Itota wodi baö ontatodë öñöñongante ænte taodinqe ædönö mäo ñö cædäni, ante ëñënämaï imönipa.

³ Ante apæneyongä Pegodo tönö botö Itota miñæ möna nē godincaya iñömö tömengä wodido quingæ gote pogodo pontamönapa. ⁴ Guëa pogodo gomöna incæte tömengä ëmiñænïmo botonque quingæ tömengä wodido täno pontabopa. Pegodo ayæ pongantapa. ⁵ Mäniñömö täno pöningque ædæ wæænte guiite ayömo iñäna näna wïni caadincooque öñö abo incæte guidämaï intabopa.

⁶ Timönö Pegodo botö miñæ ayæ nē pöningä Itota wodido ontatodë ponte wäänë guicantapa. Wäänë guiyongante doyæncooque iñäna näna wïni caadincooque mäniñömö öñö acantapa. ⁷ Ayæ Itota wodi ocabo näna ñäni cæcadincoo adobai öñö acantapa. Mänincoo doyæncoo tönö wïi adoyömö

ñönonte intapa. Wæætë iincoo nää wënente nänënë ñö cæte öñö acantapa. ⁸ Ìninqe botö tömengä wodido ontatodë tãno në pönimo incæte ñowo tæcæ adobaï wäänë guiitabopa. Guiite ayömo, Itota nänö öñöniñömö æbänö ì, ante adinque, Tömengä ñäni ömæmonte quëwengä ingampa, ante pönentabopa. ⁹ Edæ Wængongui angä ëñente yewæmöninqe dodäni, Mönö Codito iñömö do wæningä incæ ñäni ömæmonte quëwenguëngä incæcäimpa, ante mönatö mäniñedë ayæ ëñënämaï inömönaïmpa. ¹⁰ Ayæ mönatö tömengä miñæ në godimöna iñömö wadæ godinque tömëmöna oncönë ocæ ëmænte gotamönapa.

*Itota iñömö Mäadiya Mäagadadënë weca pongä
(Mäadoco 16.9-11)*

¹¹ Mäadiya guiquënë Itota wodido ontatodë yabæ inö a ongonte wædongäïmpa. Mänömaï wædinque tömengä, Abote, ante ædæ wæænte guiite ¹² adinque Wængongui anquedoda näämæntacoo mongæna inte Itota wodi baö öñöniñömö tæ contada ina acantapa. Adocanque Itota wodi ocabo öñöniñömö tæ contayongä wacä Itota wodi önöwa öñöniñömö tæ contate ongongä acantapa. ¹³ Tömëna iñömö tömengä ingante,

—Onquiyæmi, minö quinante wæmintawo.

Äna ëñëninque tömengä wæætë,

—Botö Awënë wodi baö ini ö ænte godäni awädö. Ädönö mäo ñö cädäni, ante ëñënämaï wæbopa.

¹⁴ Mäninö äninque Mäadiya dadi ëmænte ayongä Itota mäniñömö a ongongä adinque Itota incæcä tömengä ëñënämaï ingantapa. ¹⁵ Itota iñömö,

Minö quĩnante wæmintawo. Æcänö ingante ante diqui diqui mĩmintawo.

Ante angä eñëninque Mäadiya, Ìingä ìñömö wabänö gönea ömæ wite nē aacä ingampa, ante önöwēnenque pönëninque,

—Eñëmi, bitö tömengä wodi baö ìni wayömö ænte mäobi inte bai ædönö gote ñö cæbitapa, ante apænebi eñëmoe. Apænebi eñëninque botö tömengä wodi baö do gote æmaimopa.

¹⁶ Æñongante Itota tömengä ingante,

—Mäadiya, angantapa.

Angä eñëninque tömengä weca dadi emænte ebe-deo tededö äninque,

—Adaböni, angantapa. Mäninö mönö tededö, “Awënë nē Odömömi ìmi,” ante impa.

¹⁷ Itota ìñömö,

—Edæ botö ayæ botö Mæmpo weca ocæ emænte godämaï ìmopa, ante adinque minö botö ìmo pæ mänämaï ìedä, angantapa. Wæætè minö botö tönĩñadäni weca godinque tömënäni ìnänite ìmaï apænebi eñencädänimpa. Botö ñöwo botö Mæmpo weca ocæ emænte goquïmo ìmopa. Tömengä ìñömö mĩnitö Mæmpo adobaï ìnongampa. Botö ñöwo botö Wængonguï weca ocæ emænte goquïmo ìmopa. Tömengä ìñömö mĩnitö Wængonguï adobaï ìnongampa, angantapa.

¹⁸ Itota angä ate Mäadiya Mäagadadënë ìñömö Itota nänö nē emĩñænĩnänäni weca pöninque, Awënë Itota ingante atabopa, äninque, Tömengä ìmaïnö ante apænecä eñentabopa, ante tömënäni ìnänite mäo apænegacäimpa.

*Itota iñömö tömengä emiñænināni weca pongä
(Mäateo 28.16-20; Mäadoco 16.14-18; Odoca
24.36-49)*

¹⁹ Guëmanguiönæ go ate iimö ate wëmö bayö tömengä emiñænināni adoyömö pöningue, Oodeidi awënëidi inānite ancai guiñente awædö, ante odemö tee mönete ongönānitapa. Itota tömēnāni weca pö guite tæcæguedē a ongöninque,

—Guiñēnāmaī inte gänē pönencæminimpa, angantapa.

²⁰ Māninö angä ate tömengä önonpo odömöningue tömengä betagonta odömongä adānitapa. İinque mönö Awënë ingante adinque tömengä emiñænināni nangui watapæ todānitapa.

²¹ Itota wæætē adodö,

—Guiñēnāmaī inte gänē pönencæminimpa, angantapa. Botö Mæmpo iñömö botö imote nānö da pönongaīmo imo bai botö adobai mīnitö imīnite da godömo goquimīni imīnīpa.

²² Ante apænedinque tömēnāni baonga woo öongate apæneçä,

—Botö ñöwo pöni mīnitonga Wængongui Tæiyæ Waëmö Önöwoca ingante pönö pönömo æedāni.

²³ Nē wēnæ wēnæ cæçä ingante adinque mīnitö tömengä ingante godö ñimpo cæmīni ininque Wængongui adobai tömengä ingante godö ñimpo cæçä quëwëmaingampa. Mīnitö wæætē nē wēnæ wēnæ cæçä ingante godö ñimpo cædāmaī imīni ininque Wængongui adobai cædāmaī inte tömengä ingante pönö ñimpo cædāmaī imāingampa.

*Itota ñāni ömæmonte nē quëwengä ingante
Tömato açä*

24 Itota ëmiñænïnäni adoyömö a ongöñönäni tömengä pö guiite tömënäni weca tæcæguedë a ongöñongä tömengä ëmiñæningä adocanque Tömato mëwoga ëmongä Åancadënaque iñömö dæ angampa. 25 Ayæ ate Itota nänö në ëmiñænïnäni wadäni iñömö,

—Mönö Awënë ingante atamönipa, ante Tömato ingante apænedäni ëñëninge tömengä wæætë,

Botö iñömö tömengä önönempo näni daagö timpodinömö, Æyömönö empocä, ante adinque önongompoca gampodique ayæ tömengä betagonta inö näni tapa tænonte codiñömö botö tömëmo önongompoca gampote ate pönëmaï wädö, angantapa.

26 Wacä tëmäna go ate Itota ëmiñænïnäni wæætë oncönë adoyömö pö guiite a ongöñönäni Tömato tömënäni tönö godongämæ pö guiite a ongongan-tapa. Odemö tee mönete ongö incæte Itota iñontobæ pö guiite tömënäni weca tæcæguedë a ongöninge,

—Guiñenämaï inte gänë pönencæminimpa, angan-tapa.

27 Ayæ Tömato ingante,

—Bitö tömëmi önongompoca pædæ pompodinque botö önombo ae. Pædæ guipote botö betagonta inö gampoe. Ayæ, Wabänö incädö, ante änämaï incæbiimpa. Wæætë pönëe.

28 Ante añongä Tömato,

—Botö Awënë inömi imipa. Ayæ adobaï botö Wængongui inömi imipa, angantapa.

29 Ayæ Itota tömengä ingante,

—Botö imote ate pönemi imipa. Wæætë nē adāmaï ināni incæ botö imote pönēnāni ininque tōmēnāni nāni toquinque ingæimpa, angacäimpa.

Wäo nānō yewæmongainta quīnante yewæmongacäi

³⁰ Tōmengä emiñænināni weca Itota, Eñencädänimpa, ante wadö wadö cædinque tōmengä nānō bamönengæ ayæ godömenque nangui pōni cægacäimpa. Botö iñömö iintaa yewæmōninque mäninō tōmengä nānō cægainō ante wii tōmää yewæmontabopa. ³¹ Wæætë mäninō ante yewæmōninque botö, Itota mōnō Codito inongäimpa, ante ayæ, Tōmengä Wængongui Wengä inongä ingampa, ante mīnitō pōnencæminimpa, ante yewæmontabopa. Edæ tōmengä emōwo beyænque mīnitō mänōmainō ante pōnēninque cōwē wænāmaï quēwencæminimpa, ante botö iinta yewæmōmopa.

21

Itota tōmengä emiñænināni 7 ganca ināni weca pongä

¹ Ayæ ate tōmengä emiñænināni Tibediapæ nāni ämæ yæwedeca emōnaiboga ongōñönāni Itota iñömö tōmēnāni weca pōninque a ongongä adānitapa. Edæ iīmaï batimpa. ² Timönö Pegodo adocanque, Tōmato Äancadēnaque nāni änongä tönö Gadide-abæ Cānaa nē quēwengä Näatānaedo mēnaa, Tebedeo wēna nāna caya mēnaa, ayæ Itota nānō nē emiñænina wada mēnaa mānimpodāni adoyömö ongönönänimpa. ³ Timönö Pegodo iñömö tōmengä tönö ongönāni inānite,

—Botö ñöwo gæyæ dadoncæ tao gobopa.

Angä ëñëninque tömënäni iñömö,

—Bitö miñæ gocæmönimpa.

Äninque, Ægodöedäni gomompa, ante tao godinque wipodë godongämæ guiidique tömäa woyowotæ gæyæ dadoncæ cædäni incæte gæyæ dæ ænämaï inönänimpa. ⁴ Ñäo bayonte Itota iñömö ëmönaiya yæwedeca a ongongä adinque, Itota ingampa, ante tömengä ëmiñæninäni incæ ëñënämaï inänitapa. ⁵ Ayæ tömengä tömënäni inänite yedæ aa pedinque,

—Iñänäni, gæyæ æmïnitawo.

Äñongante,

—Ænämaï imönipa.

⁶ Änäni ëñëninque tömengä wæætë,

—Minitö dicamonca wipo tömëmæ inö æpænë wo guitodonte gæyæ dadonte æedäni.

Tömengä nänö ämaï cædinque tömënäni nanguï pöni gæyæ dicamonca date owo adinque ædö cæte dicamonca wëä pönonte ænguïnäni. ⁷ Itota ëmiñænimo tömengä nänö në waadebo inömo inte botö Pegodo ingante apænedinque,

—Iingä iñömö mönö Awënë Itota ingampa.

Ämo ëñëninque Timönö Pegodo iñömö tömengä yabæcoo nänö gä tadongate cönönincoo æninque daga wëñate æpænë to go ti wææninque ömaa taocantapa. ⁸ Wadäni Itota nänö në ëmiñæninäni iñömö yæwedeca obo pöni tiëë mëetodo ganca bai iñömö wäi wocædäni ininque wipodë ayæ owodäni iñömö Pegodo miñæ wogaa godinque dicamö gæyæ eyede pöni wëä pönö pönänitapa.

⁹ Tömënäni wipodë inte pædæ æænoncado ponte

ayönäni, Æænongui, ante gonga emõñömö gæyæ öñö adinque adoyömö wædænque päö cö cæte öñö adänitapa. ¹⁰ Itota tömënäni inänite,

—Gæyæ mïni ñöwo æni wædænque ænte pödäni.

¹¹ Angä eñëninque Timönö Pegodo wipodë pö guidinque dicamö ænte emönaiya wëä tadongan-tapa. Edæ tiento tincoenta i todee ganca inäni mänimpodäni gæyæ ñænængade dicamö iñömö eyede owodäni incæte dicamö wangö temönämaï inimpa. ¹² Itota iñömö tömënäni inänite,

—Pö cæedäni,

Äñongante tömengä emiñæninäni tömänäni, Mönö Awënë Itota ingampa, ante eñëninque, Æbidö imii, ante tömengä ingante ædö cæte anguinäni.

¹³ Itota gongapamö iñömö pöninque päö ænte tömënäni inänite pædæ godongä ænäni ininque tömengä ayæ gæyæ öñö æninque tömënäni inänite pædæ godongä cænänitapa.

¹⁴ Mänömaï cædinque Itota do wæningä incæ ñäni ömæmonte quëwente mempoga do ponte a ongöningä inte ñöwo tömengä emiñæninäni weca mempoga go adopoque pongacäimpa.

Timönö Pegodo ingante Itota apænecä

¹⁵ Tömënäni inque cænäni ate Itota iñömö Timönö Pegodo ingante,

—Timönö Wäo wëmi eñëmi. Botö imo mäninäni pönömenque waadete pönëñönäni bitö iñömö näwangä botö imote godömenque waadete pönëmitawo.

Äñongä,

—Awënë, Ao ämopa. Bitö imite botö waadedö ante bitö do eñëmipa.

Angä eñëninque Itota,

—Waadäni iñömö botö obegaidi wënäni bai iñönänite bitö tömënäni inänite botö angainö ante odömonte apænebi eñencædänimpa, angantapa.

¹⁶ Ayæ wæætë,

—Timönö Wäo wëmi eñëmi. Bitö näwangä botö imote waadete pönëmitawo.

Äñongä,

—Awënë, Ao ämopa. Bitö imite botö waadedö ante bitö do eñëmipa.

Angä eñëninque Itota,

—Waadäni botö obegaidi bai iñönänite bitö tömënäni inänite aacæbiimpa, angantapa.

¹⁷ Itota mempoga go adopoque tömengä ingante,

—Timönö Wäo wëmi eñëmi. Bitö botö imote waadete pönëmitawo, ante angantapa.

Itota mempoga go adopoque tömengä ingante, Bitö botö imote waadete pönëmitawo, ante angä eñëninque Pegodo wæwente inongäimpa. Incæte Itota ingante,

—Awënë bitö tömää eñëmi imipa. Bitö imite botö waadedö ante bitö do eñëmipa.

Ante wæyongä Itota wæætë,

—Waadäni iñömö në botö obegaidi bai iñönänite bitö tömënäni inänite botö angainö ante odömonte apænebi eñencædänimpa. ¹⁸ Bitö imite näwangä ämopa. Bitö wëñæmiyedë tömëmi nämä daga wëñadinque, Ædönö goinëmo, ante bitö goinënonque do gobi imitapa. Nöwo iñömö bitö picæmi bayedë bitö pædæ gopoyömi wacä incæ bitö imite godö daga wëñadinque bitö goinënämai iñömö maniiñömö bitö imite mäocä gocæbiimpa.

19 Pegodo ingante mänömaïnö ante apænedinque Itota iñömö, Tömengä ingante æbänö wænönäni wæñongä Wængongui ñäo apäite bai nänö emönö edonque bacæimpa, ante odömoncæte ante apænegacäimpa. Ayæ godömenque tömengä ingante,

Botö miñæ tee empo pöe, angacäimpa.

Itota emiñæningä nänö nē waadecä

20 Pegodo guiquënë dadi emænte botö Itota emiñænimo nänö nē waadebo iñömö tömëna miñæ tee empo pömo acantapa. Mänimo iñömö do möni cæñedë Itota tönö ääñömonque tæ contadinque, “Awënë bitö imi æcänö godö odömonguinaa, apænebi eñëmönie,” ante nē apænedimo inömoimpa. 21 Pegodo botö imo adinque Itota ingante,

—İngä iñömö nē tee empo pongä diyæ æbänö tömengä beyæ bacæimpa.

22 Äñongä Itota wæætë,

—Botö ocæ emænte ponguinganca tömengä ayæ quëwencæcäimpa, ämo bai bitö wæætë ædö cæte nē ämi inguimii. Botö iñömö nē anguimo imopa. Bitö guiquënë botö miñæ tee empo ponguënëmi imipa, angantapa.

23 Mänömaï beyæ pancadäniya möni tönïñadäni weca godinque gode ä gode ä cædinque botö imotedö ante apænedinque, İngä iñömö cöwë wænämaï quëwenguingä ingampa, ante tedewengadänimpa. Itota iñæmpa, İngä iñömö wænämaï quëwencæcäimpa, ante änämaï ingacäimpa. Wæætë, “Botö ocæ emænte ponguinganca tömengä ayæ quëwencæcäimpa,

ante ämo bai bitö ædö cæte anguïmii. Botö anguïmo ïmopa,” ante mäninque angacäimpa.

²⁴ Tömēnāni, Īngā wænāmaī quēwengā ingampa, ante nāni nē apænedīmo ĩñōmō edæ botö tōmengā nānō nē ēmiñænīmo adobo ïmopa. Tömēmo, Æbānō batimpa, ante botö apænedö ĩñōmō nāwangā ante nē apænedīmo inte botö adodö ante tōmänō ante nē yewæmōnīmo ïmopa. Mäninō ante botö angainō ĩñōmō nāwangā impa, ante mönitö ēñēmōnipa.

²⁵ Itota ĩñōmō nanguī pōnī godōmenque wadö wadö cægacäimpa. Æbānō cæcää, ante tōmää nānō cægainō ante adinque yewæmōmōni bai mänintacoo möni yewæmōnintacoo ñōnonguī ante edæ inguipoga tōmāo incæ wīī eyepæ incædōnimpa, ante pōnēmopa. Mäninque ante yewæmōmopa.

Wængonguī nänö Apænegainö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

9bedab5a-39ff-5163-a35b-8056cbbe8690